

**NATIONAL ASSEMBLY OF
SEYCHELLES**

Wednesday 23rd July 2025

The Assembly met at 0931am

National Anthem

Moment of Reflection

Mr Speaker in the Chair

MR SPEAKER

Bonzour tou bann Onorab. Bonzour nou bann zofisye Lasanble. Bonzour nou piblik ki pe swiv nou parey labitid. E bonzour tou nou bann envite ki dan Galeri, ki en group Grand Anse. Wi, avan nou al dan lezot keksoz mon a donn Onorab William laparol pou dir en mo byenveni.

HON WAVEN WILLIAM

Mersi Mr Speaker. Bonzour tou dimoun ki a lekout. Mr Speaker, mon oule swet labyenveni bann etidyan sorti Lekol Primer Grand Anse Mahe. En si ki *Headteacher* Ms Louisette Azemia avek Ms Monica Hoareau. E Mr Speaker, sa bann etidyan se sa bann etidyan ki'n sorti premye, dezyenm e trwazyenm dan zot laklas. E mon anvi dir zot pou kontinyen sa bon travay. E mon kontan ki zot in vini. E fotespere zot pas en bon moman avek nou. Mersi.

MR SPEAKER

Mersi Onorab. Byenveni bann etidyan Grand Anse, e zot *Headteacher*. Nou annan en *Revised Order Paper*. E i annan *First Reading Public Bills* e *Members Bills*, Madanm Clerk i ava fer *First Reading*.

MADAM CLERK

Mersi Mr Speaker. Bonzour Mr Speaker. Bonzour tou bann Manm. Tou bann *staff* Lasanble e osi nou bann envite dan Galeri. Nou 2 Prozedlwa ki pe ganny entrodwir *for First Reading* ozordi i;

Immigration Decree (Amendment) Bill, 2025 e Liberation Memorial Fund Decree (Repeal) Bill, 2025.

This Act may be cited as the Immigration Decree (Amendment) Act, 2025.

This Act may be cited as the Liberation Memorial Fund Decree (Repeal) Bill, 2025 and shall come into operation on the 01st August 2025. Mersi Mr Speaker.

MR SPEAKER

Mersi Madanm Clerk. Nou a rebran lo Mosyon ki nou ti komanse yer. E mon annan 2 Manm ki po upran laparol. Onorab Aglae.

HON EGBERT AGLAE

Mersi Mr Speaker. Mon a dir bonzour tou dimoun ki a lekout. Tou Manm, nou bann

envite ki dan Galeri spesyalman Miss Monica avek lot miss. Mr Speaker, Mosyon ki la devan nou i pe tret en size an referans avek en lot Mosyon ki nou ti diskite oparavan kot i konsern deklarasyon bann *assets* anba Lalwa Deklarasyon.

E ozordi Mosyon pe tret so bann *Terms of Reference* ki'n dayer in ganny ekrir par ou menm Speaker, ki zot anvi kre en Komite pou regard dan lafason ki i annan Manm ki pa'n deklare zot *asset* ki dayer sa i louvraz ki sipoze fer par ACCS ki'n ganny *mandate* ki nou ki ti pas sa Lalwa.

E letan mon'n ekout bann entervenans yer Mr Speaker, i annan 2 keksoz ki mon'n sezi avek sa Mosyon pou preparasyon sa TOR. Premyerman zot in fer resorti ki sa TOR sete pou zis etabli bann fe bann koz par deryer *non-adherence*. Me Selman lo zot bann largiman zot in fer en pake letour kot zot in target nou lo sa kote latab.

E dezyenman, zot in dir pou dir i pa zot lentansyon pou target okenn Manm. En kontradiksyon lo zot kote latab premyerman. Mon war sa Mosyon koman en Mosyon visye e dezespere par en lekip LDS ki zot in pres latransparans, bon repitasyon dan zot lapros.

Me selman sa ki nou, nou war se le kontrè. Taler mon pou tous 2 pwen enportan ki dan sa TOR. 4an edmi LDS in dan sa Lasanble, i pa'n reisi *challenge* son prop Gouvènmman, letan pep ti dan problem, ti pe soufer. Ni en Mosyon, letan nou dan kote US ti pe lager kont premyerman letan zot in koup sa bann *long service allowance* - letan zot in koup sa bann trezyenm mwan saler; letan zot in fer monte pri bis, letan zot in ogmant bann kou bann lezot servis, napa enn antre zot ki ti kapab anmenn en Mosyon kont zot Gouvènmman poudir be tenir, be gete nou pep pe soufer annou redressiteyasyon. 4an edmi pa'n ganny fer sa.

Ozordi lavey en eleksyon zot in war poudir zot bann siporter pe degrengole. Dayer, mon felisit tou nou bann siporter e bann ki'n *join the Club US* pou vin sa gran rally Dimans le 20. Mersi.

(APPLAUSE)

HON EGBERT AGLAE

Sa ki mon'n ganny dir Lendi atraver bokou ki mon'n zwenn i dir set fwasi le 14 Septanm lo *Gordon Square* zot pa pe manke.

(APPLAUSE)

HON EGBERT AGLAE

Akoz zot in war poudir *LDS* in servi zot. In servi en pon depi 2015 ziska 2020 pou zot ariv kot zot ete i pirman lo en filozofi mansonz mon pou dir.

Mr Speaker, si sa Mosyon pa pe target okenn Manm aköz i la devan nou ozordi? Aköz ou ti kapab pran kan ou ki ansarz Lasanble i annan bann kad ladministratif ki ti kapab ganny fer pou ki sa ki pa'n arive i arive. Me non, zot in anvi fer en politik. E yer Onorab Woodcock atraver ou Mr Speaker, i vomi. Dan plas dir ACCS, i nonm Komisyon Eleksyon.

Me nou konnen zot M game nou. Zot *end game* se pou *disbar* sa bann Manm ki dapre zot pa'n *adhere* pou ganny tire lo lalis eleksyon. E ki sirtou 2 Manm par a partisip dan eleksyon. *This is the end game LDS*. Zot in arive vin ek en politik desann dan rigol ozordi *LDS*, aköz zot dezespere aköz zot war poudir pouvwar pe kit zot.

Mr Speaker, dan *TOR*...

(comments off-mic)

MR SPEAKER

Ou komanse la. Ou komanse en. Bon...

HON EGBERT AGLAE

Zot kapab dir sa ki zot oule laverite zot pa kapab kasyet.

Dan referans *TOR* i dir pou determine okenn lenplikasyon avek Lasanble Nasyonal lo si limaz Lasanble, repitasyon Lasanble e bann privez bann Manm in ganny afekte par aksyon an relevans ek deklarasyon.

Mr Speaker, nou serye la nou? Repitasyon, privez Manm? Mr Speaker, Egbert Aglae pa'n zanmi fer vis dan Biro Gouvernman li.

(APPLAUSE)

HON EGBERT AGLAE

Egbert Agale ek bann Manm *US* ki lo sa latab la, pa'n zanmen komet okenn vyolans domestik ni koudpye person li. Egbert Aglae ek son lekip ki la pa'n zanmen tap okenn Manm par deryer kalot ouswa koudpye.

(APPLAUSE)

HON EGBERT AGLAE

Egbert Aglae ek son bann Manm ki la pa'n zanmen kraz okenn baro, swa tay ek gran kouto dan semen ouswa demi touni li. Egbert Aglae ek sa bann Manm ki la, la pa'n zanmen zour son prop siporter ouswa malprop son prop fanmir, ouswa son paran.

(APPLAUSE)

HON EGBERT AGLAE

Alors Mr Speaker, avan zot koz lo repitasyon la parey zot touf tou sa bann lensidan ki'n arive lo zot kote la. Zot ti dir zot pou *deal* avek li dan en kad administratif, al tir salte devan zot prop laport avan vin tir salte devan laport *US* Mr Speaker.

Mr Speaker, Lalwa i kler kot i konsern deklarasyon *asset*. E Seksyon 12 sa Lalwa i dir ou okenn Manm ki annan en *breach of* sa Lalwa ACCS ki li i ganny mandate, akoz li ki annan sa pouvwar legal pou anmenn en *case* devan Lakour. E i osi kapab swazir pou pa anmenn, e servi son Lalwa menm pou li *deal* avek sikonstans ki devan li.

Me li Lasanble io oule vin pouvwar kwa Zidisyer? Pou li al dir ACCS ki pou fer. E letan zot pou fer rekomandasyon. Wi, zot ki pou dir dan zot rapor ki ACCS pou fer. Me ACCS, ou menm Mr Speaker pare pou ti dir kot Komisyon Eleksyon zot endepandan, zot pa reponn lo Lasanble, be la ki ou pe fer la?

Ou pe fer lanvers sa ki ou ti dir akoz i *suite the needs of LDS* politikman. Li ki'n ekrir *TOR* mon pa konnen mwan.

Mr Speaker, dezyenm ACCS atraver sa bann Manm ki pa'n deklare in annan kontak avek ACCS. E ACCS li pou 2025, in vin anmas bann form of *asset* la deklarasyon ki tou Manm in sinyen.

E ACCS in dir dayer espere, mon pa konnen si petet i sir les Mosyon pase apre zot a deside baze lo Mosyon ler i pase ki aksyon zot pour pran....

MR SPEAKER

10minit Onorab.

HON EGBERT AGLAE

Be i annan en keksoz drol la Mr Speaker. Letan ou'n fer keksoz si ou pa ti anvi me ou pa ti ava aksepte pou 2025. Ou war poudir i annan en malis ki pe ganny fer e se sa ki mon'n dir en Mosyon visye. E pou terminen Mr Speaker, vi ki letan pa dan mon faver, mon ti pe ekspekte *LDS* en pti pe pli *wise* politikman.

Zot pe retourn sa Lasanble an aryer kot zot ti lager pou zot sorti kot sa bann manipilasyon opresyon e target zot oponan politik ozordi pe retournen. E plen dimoun pe ganny arete ozordi malapropo.

E letan yer Minis dan Lasanble nou demann li en senp rezon akoz ki i pa ti ferm en semen ki letan zot fer *Constitutional Day* ki annan zis bann lenvitasyon bann *dignitaries*...

MR SPEAKER

Konklir Onorab.

HON EGBERT AGLAE

Mon pe konklir Mr Speaker. Zot pa ferm sa semen. I montre ou poudir letan keksoz i dan zot faver la i *ok*. Letan pou kont *US* la zot rod tou fason. Mon dir zot kontinyen, bonn sans. Mersi.

(APPLAUSE)

MR SPEAKER

Laparol pou Onorab Georges.

HON BERNARD GEORGES

Mersi Mr Speaker. Bonzour Mr Speaker. Bonzour tou bann koleg Onorab. Bann *staff* Lasanble Nasyonal. Bann dimoun ki pe ekout nou. E en bonzour partikilye pou bann zenn lorea mon kapab dir sorti dan lekol Primer Grand Anse. *Well done*, e kontinyen zot bon letid.

Mr Speaker, nou pa bezwen okenn Komite Lasanble akòz 2 ou 3 Manm ti'n par en mankman bliye fer zot *declaration of assets*. Me zot in rektifye sa e zot regret zot omisyon. Se koumsa ki mon ti ava ekspekte ki *Leader* Lopoziyon ler in pran laparol ti ava komans son lentervansyon. Setou, setou.

Setou ki sa Mosyon ek son *TOR* pe rode ozordi. Si i ti'n fer sa Mr Speaker, nou ti pou'n war en nouvo tournir dan lafason ki sa deba pe prosede. Olye fer sa, zot tou enn apre lot zot in vin zwe

viktim. Zot ki viktim, e zot in fer zot lentervansyon avek egrer, mansonz, dezespwar, panik ek lakizasyon.

(APPLAUSE)

HON BERNARD GEORGES

Setou ki nou'n tande. Mr Speaker, sel keksoz ki pa'n ganny dir dan sa Lasanble, se ler ou'n park ou loto lo en laliny zonn e ou ganny ou tiket, aksepte ou fot, pa vin lager ek *traffic warden*, pa vin lager ek sa gard, pa vin lager avek sa Lalwa, pa vin lager avek Lasanble ki'n pas sa Lalwa. Zis fer li.

(APPLAUSE)

(comments off-mic)

HON BERNARD GEORGES

Senp. Aret zwe viktim Mr Speaker, akòz la napa viktim. Ou'n fer en fot aksepte ou fot, koriz ou fot e *move on*. *That's all*, mwan mon'n lir mwan osi sa *Terms of Reference*, mon pa war okenn landrwa ladan ki nou pe rod fer sir ki bann Manm pa pe al *stand* dan eleksyon. Mon pa war okenn naryen ladan mwan.

O kontrè, sa ki mon war se determine ki mezir i ava ganny pran anba Lotorite Lasanble. E mon pa konpran akòz depi ler zot in komans koze zot in al dan Lalwa ACCS

zot in al dan Komite Anti-Viktimizasyon. Tousala napa naryen pou fer Mr Speaker avek sa ki nou pe fer la bomaten. E zot tou zot konn sa tre, tre byen. Si ou pa - si ou pa anvi dimoun montre ou ledwa, akòz ou pa'n deklare ou *assets*, me deklare ou *assets*. I senp. E personn pa pou montre ou ledwa.

Pa vin lager akòz i annan en omisyon. Me solman annou mazin tre byen, annou mazin tre byen, i annan 2 fason Mr Speaker, ki en dimoun i kapab mank deklarasyon son *assets*. Enn se par senp omisyon – in en *oversight*, in bliye. E sa nou tou nou imen i kapab arive avek nou tou. E nou pa kapab montre ledwa ler sa in arive avek enn parmi nou.

Me i annan en dezyenm - en dezyenm kategori osi. E sa se ler ou deliberaman refize pou ou deklare ou *assets*, sa i en lot zafer konpletman diferan. *Ok*, sa nou pa konnen. I annan 2 fason ki ou kapab mank deklare ou *assets*. Enn, se par ou'n fer li par omisyon, lot se ki ou'n fer li par ekspresyon - deliberaman akòz ou, ou pa kontan deklare ou *assets* alor ou pa pou fer li. Oubyen akòz ou pa dakor ek sa Lalwa ki'n tir *spouse* eksetera ladan.

Alor, ou pe montre ki ou pa pe fer li. Sel keksoz ki sa Mosyon in ganny anmennen, pe demande se annou

determinen. Koman en Lasanble annou determinen si in annan Manm ki pa'n deklare, nou konnen ki i annan *at least* 1 akòz in avoue li devan sa Lasanble. Menm 2 zot in avoue li devan sa Lasanble. Dezyenmman akòz zot pa'n fer li? E ki mannyer ki nou kapab met an plas en striktir ki pou ede ki sa pa arive ankòr. Pa zis pou pini me ki pou alerte bann Manm atan pou ki zot bezwen fer li, dan en fason ki okenn parmi nou, nou pa pou tonm dan sa mankman ankòr.

Oubyen okenn parmi nou, nou pa pou deliberaman al fer en keksoz ki nou pa devret fer. Olye regard sa dan sa senplisite, sa Mosyon dan son senplisite - ki nou'n fer Mr Speaker ki nou'n tande nou'n al rod tout sort largiman akòz ki nou koman Lasanble nou pa devret pe fer sa travay. I nou mank en largiman prensipal. Pa nou zot, in man ken largiman prensipal.

E sa se koman en Lasanble nou annan en lotonmi legal, e en lotonmi konstitisyonnel ki permet nou fer sa bann kalite keksoz. Mr Speaker, zot in bliye ki nou en brans Gouvernman separe avek larestan Gouvernman e avek larestan bann lenstitisyon dan pei.

Annefe nou dezyenm, nou dezyenm brans

Gouvernman. Zis apre Legzekitif i vin nou. E nou devan Zidisyer. E zot bliye ankò en lot keksoz se ki nou en *self policing and self-regulating assembly*.

Se nou ki ansar z nou regilasyon, pa person. Ni ACCS, ni Zidisyer. Napa enn ki permet ki kapab vini e dir nou sa ki nou pe fer pa byen. E trwazyenm keksoz ki zot in bliye, se ki sa ki nou pe sey fer la se en keksoz entèn ki napa naryen pou fer avèk ni ACCS, ni avèk Zidisyer, ni avèk Legzekitif.

Si zot in konpran sa, nou pa ti pou ale dan tou sa bann *polemic* depi yer. Tou sa bann lakizasyon, tou sa bann revandikasyon, tou sa bann viktimizasyon dapre zot. Pa ti pou ale ladan, akòz zot ti pou'n konpran ki koman en Lasanble nou annan en drwa regle nou kondwit.

Par egzanp Mr Speaker, zot in koz lo *Constitutional Court*. Lakour in dir ki Komite Anti-Viktimizasyon pa ti Konstitisyonnel. Me i vre, Komite Anti-Viktimizasyon avèk sa enn pa parey ditou, i de keksoz konpletman diferan. Ou pa kapab fer en lekivalans kot lekivalans pa egziste.

Komite Anti-Viktimizasyon ti pe fer travay Zidisyer. Ti pe *investigate case* ki Zidisyer ti kapab *investigate*. Se pou sa rezon ki

zot in dir non. Sa pa pe al fer okenn travay Zidisyer li. I pa pe al fer okenn travay ACCS li. Sa ki sa Mosyon ek sa *Terms of Reference* pe fer, se en Lasanble ki pe al *investigate police* son prop lekòr.

E mon a donn en legzanp Mr Speaker, sa ki mon pe dir akòz sa ki mon pe dir i vre. Si ou Mr Speaker, si ou, ou demann enn parmi nou pou kit lasal pou lèrdtan oubyen pou en zour, napa en dimoun deor, ni Sef Ziz, ni Zidisyer, ni person ki kapab dir sa ki ou'n fer i mal. Akòz sa ki ou'n fer i anba nou Lalwa Lasanble. *We are self policing*.

Me si ou olye dir sa dimoun sorti, sa Manm sorti, ou dir sa manm pe al prizon pou 3 mwan, sa i en lenterferans ki lakour pou kapab vin regard ladan. Akòz sa i pa tonm dan nou kad *self policing*. Me sa ki nou pe war la ozordi se pa sa ditou. Sa ki nou pe vwar se senpleman, e nou pa pe target person. Mon pa vwar akòz zot krwar ki zot bann viktim dan sa zafer.

Premyèman se zot ki pa'n *comply* avèk Lalwa, pa nou. Me menm si zot pa'n *comply* avèk Lalwa mon pa konpran akòz zot krwar ki zot bann viktim dan sa zafer. Sel keksoz ki nou pe fer, se demann avèk en Komite Lasanble zot kapab vin dan sa

Komite, zot ki'n prefere pa vini e eksplik sa ki'n arive ladan.

Demann avek sa Komite Lasanble pou regarde premyerman eski in annan mankman par Manm? Dezyenmman pou ki rezon in annan mankman par Manm? E trwazyenmman, ki mannier nou kapab fer pou ki sa pa ariv ankor, *Under the authority of the National Assembly*. Se tou Mr Speaker.

Mon pa konpran aköz ki sa Mosyon in bezwen al dan tou sa bann direksyon. E avek sa pti gin letan ki reste mwan Mr Speaker, permet mwan pou reponn en keksoz. Nou'n ganny dir la bomaten nou'n tandè ki nou Gouvernman, e nou koman en Lasanble nou pa'n met nou Gouvernman o pa ler nou Gouvernman in swadizan *fail* oubyen in fer ek keksoz ki pa byen.

Me sa Mr Speaker, se zot travay se zot ki Lopozisyon dan sa pei. Se pa nou ki Lopozisyon. Nou, nou la pou sipòt program nou Gouvernman e pou fer sir ki i delivre pou Lepep Seselwa.

Me akfer nou ti pou vin isi pou may mon Gouvernman zanbek ler en Gouvernman in fer monte lapey travayer 2 fwa lannen pase? Akfer ki nou ti pou vin may nou Gouvernman zanbek ler in fer monte lasistans sosyal *right across the board*?

MR SPEAKER

10 minit Onorab.

HON BERNARD GEORGES

Aküz... Mersi Mr Speaker. Mon pe al terminen. Aküz ki nou ti pou vin may nou Gouvernman zanbek ler Gouvernman in donn *breakfast* tou bann marmay lekol? Aküz ki nou ti pou vin may Gouvernman zanbek ler in fer sa kantite lakaz, sa kantite semen, Por partou Sesel? Aküz nou ti pou vin may Por Peser partou, akfer nou ti pou vin may Gouvernman zanbek?

Mr Speaker, nou la aköz nou fyer pou travay ki sa Gouvernman in fer. E le 27 Septanm 2025, nou pou kit li lanmenm.

(APPLAUSE)

HON BERNARD GEORGES

Aküz nou lo sa kote latab nou pa zanmen les tonbe. Mersi Mr Speaker.

(APPLAUSE)

MR SPEAKER

Onorab Andre, i ava fer son repons lo deba.

HON CLIFFORD ANDRE

Mersi Mr Speaker. Bonzour Mr Speaker. Bonzour tou Manm Onorab, tou dimoun a lekout. *Staff* Lasanble, bann zanfan

sorti Lekol Grand Anse ek zot *teacher*.

Mr Speaker, mon ti a kontan remersye tou bann entervenan lo sa Mosyon ki parey mon ti'n menm ganny privez pou mwan dir ou, mon war li i senp, e i sipoze kourt. Me tournir ki sa Mosyon in pran i obliz mwan pou fer serten repons ki a koriz serten sa bann parey mon dir mansonz ki'n ganny mete devan piblik Seselwa.

Mr Speaker, ou konnen en Lasanble en Mosyon ti'n pase e sa Mosyon ti'n kre en Komite. E ou ti'n demann tou lete kote latab pou donn zot bann Manm ki pou asiz lo sa Komite. Swit a sa, prosedir ki Lasanble i bezwen fer, se ki Clerk i *convene* premye miting en *Chairperson*, *Vis-Chairperson* ensidswit i ganny elekte. E sa prosedir in ganny fer.

Swit a sa prosedir, sa Komite i bezwen - i obligatwar ki i vin devan Lasanble avek en *TOR*. E se sa ki sa Mosyon in fer, e mwan koman *Chairperson* sa Komite mon manda se pou anmenn sa *TOR* devan Lasanble.

Dezyenm keksoz, ou koman Speaker Lasanble Nasyonal ou en Manm Lasanble Nasyonal. Me Selman ou annan en pozisyon ki nou tou nou'n dakor, enkli Lopozisyon letan ti vini, ti

dakor pou ki ou, ou vin Speaker Lasanble Nasyonal.

Napa naryen dan lareg ki dir ou pa kapab kominik avek nou. Napa naryen dan lareg ki dir ou pa kapab donn nou en dokiman pou nou gete. Napa naryen dan lareg, irespektiv ki zot pe dir. So, i enportan ki nou met sa kler lo rikord ki poudir en Speaker, Lasanble Nasyonal son pouvwar i parey Onorab Georges in dir - *regulate* nou Lasanble dan en konteks kot nou tou nou kapab santi nou par e ou osi ou santi ou par nou Lasanble. Pa zis asize laba e dir nou koze pa koze, arete oubyen sorti deor. Non.

So, si ou'n donn nou en dokiman, oubyen si ou'n sirkil en dokiman Mr Speaker, mwan personnelman mon pa vwar naryen mal ladan. Me i enportan pou fer resorti ki sa Komite letan in zwenn nou, nou ki'n fer nou *Terms of Reference* ki devan Lasanble ozordi. Se nou ki'n asize ki'n vwar ki sa Mosyon ti pe demande. E war ki mannyer nou pou *tackle* li. Pa neseserman mon pou dir la pa neseserman ki nou'n dakor ek tou keksoz ki'n sorti dan sa Mosyon.

Se sa ki nou'n fer li 2 paz. Nou pa'n fer li 10 paz, nou'n fer li 2 paz aköz nou'n esey rod en pti pe bann responsabilite ki nou bezwen fer, e pou nou

vin donn Lasanble en rapor lo la.

Trwazyenm pwen Mr Speaker, Onorab Loze atraver ou Mr Speaker, letan in koze yer in dir ki poudir PS Matatiken ti ganny fer e sa mo ki ti ganny servi “*fou le camp*” apre i ti servi “poz pti bet”.

E mwan mon war PS Matatiken, s ai pa pe montre respe pou son *professionalism* ki i annan. E letan mon get PS Matatiken mon war li i en gro garson, i pa en pti bet. Akoz mon dir sa osi Mr Speaker, se semen pase osi letan mon ti absan Lasanble mon ti dan en *reunion* ki li osi i ti la. E nou’n ganny sans koze e enterakte, e nou tou le de nou’n fer nou bann pwen sorti dan sa *reunion*.

So, mon pa war li koman en poz pti bet. E mon sir ki li osi i pa vwar mwan koman en pov pti bet. Me Selman mon pou eksplike Mr Speaker, dan miting ki nou ti pe fer koman *Bills Committee*, enn bann pwen ki mwan mon ti leve sete “PS eski sa *Bill* ki ou pe anmennen “*Chemical Hazardous Chemical*” eski i *time sensitive*? Onorab Georges pa ti la li. So, PS ti dir nou ki poudir *it is not time sensitive*.

E koman Chair Komite, mon ti dir li be si i pa *time sensitive*, akoz nou bezwen tay avek en *Bill* sa groser. Annefe

nou pa ti ankore fini pas lo la nou. Sa i en keksoz ki pa’n ganny fer resorti. *Panel* pa ti ankore fini pas lo sa *Bill*, pou nou al kot ABC e dir avek ABC wi ou kapab met li lo *Order Paper*.

So, nou bezwen fer kler avek pep Seselwa ki poudir nou koman *Bills Committee*, nou pas lo en *Bill* ki swa son Minis i la, ki swa son PS i la avek son bann teknisyen e reprezantan *Attorney Zeneral*.

Nou fer li ki letan i vin kot Lasanble, omwen nou’n kapab pas lo sa *Bill* antye. E fer sir ki nou menm nou satisfè son konstitisyonalitye, e nou pas lo la dan Lasanble. So, i enportan pou fer resorti ki PS Matatiken pa ti ganny dir alae avek son *Bill* ki ti’n ganny ki ti’n ganny pibliye.

I ti ganny demande, nou pa ni ti dir li poudir son *Bill* pa *time sensitive*. *At least* mwan mon ti demann si son *Bill* i *time sensitive*, kot repons sete non. E letan Onorab LGB ti vini i ti re demann li si sa *Bill* i *time sensitive*. Larepons ti afirmativ e ti reste parey. Alors, pou dir avek pep Seselwa, oubyen poudir avek zot siporter ki nou, nou’n fer taye, nou’n fer “*fou le camp*” PS Matatiken i fo.

E sa i lalang. Yer Mr Speaker, se sa landrwa ankore nou ti pe fer sa prezantasyon avek sa Mr Marc ki sorti dan

enn bann pli gro demokrasi dan lemonn Lanmerik. E se sa keksoz ki i ti dir nou. Nou bezwen koriz bann mansonz ki ganny dir e fer.

(comments off-mic)

HON CLIFFORD ANDRE

Mr Speaker, yer mon ti ekout trankilman, mon pa ti enteronpe. So, mon ti a kontan menm zafer. Ekoute ki mon pe dir Onorab. Kekfwa, ou a ganny en pti pe plis konpran kote mon pe sorti.

E Mr Marc yer ti dir nou ki poudir nou bezwen koriz bann mansonz ki ganny fer lo nou e lo nou lenstitisyon. Alors, letan i dir *Bills Committee* savedir mon pe pran ki li osi i enplike ladan. Akoz li osi i en Manm *Bills Committee*, e i ti dan miting. So, nou pa kapab dir en keksoz ki nou pa'n fer pou nou fer marse oubyen nou azanda pou nou sey fer dimoun *attend* zot *rally* ki zot annan ki Onorab Aglae in dir pou ganny fer. So, mansonz pa pou ed ou ranpli sa lapenn, konpran ou?

(APPLAUSE)

HON CLIFFORD ANDRE

O kontrer mansonz pou fer ou perdi siporter ankore. E zot pou vin kot nou letan nou fer *next time*. Mr Speaker, i annan en lot pwen ki *LOTO* in fer sorti

yer se ki an referans avek Komite Anti-Viktimizasyon. Mon ti a kontan dir *US* ki ti dan Gouvernman sa lepok. Lasanble ti 15 lo 10.

E lo sa Komite Mr Speaker, ti annan Manm *US*. E enn ladan sete Onorab Aglae. So, nou ti'n komans fer en travay baze lo en Mosyon ki ti'n anmennen dan Lasanble e en *TOR* ki ti'n anmennen dan Lasanble ganny aprouve i normal. E sa i montre vre demokrasi, akoz si dimoun in anmenn nou Ankour pou deklar ki sa Komite. I pa'n dir tou Komite li, in dir sa Komite ki a pe fer luvraz ki parey Onorab Georges in dir ki Zidisyer ti pe fer.

Me selman mwan letan ki Vis Chairman e defen Speaker Patrick Pillay ti *Chair*, son nanm repoz an pe, nou ti fer en travay ki mwan mon konsider sete pou vwar en pti pe ki soufrans lezot dimoun in pas atraver pandan letan ki lezot Gouvernman ti o pouvwar. Annefe, Gouvernman Parti Lepep, *SPPF* e la ozordi *US* i la.

So, bann dimoun ti pe vin kot nou akoz zot ti pe sey rod en lot rekour pou zot kapab ganny en gidans pou zot sey kapab vwar kote ki zot kapab ale pou kapab annan serten rekour e sey gete ki mannyer zot kapab ganny en

soulazman pou serten zot bann problemm.

Mr Speaker, bokou in ganny dir an referans avek ACCS. Onorab Georges in koz lo la ki aköz nou'n al lo Act ACCS. E sa TOR, i kler i dir ki travay ki nou annan pou fer. E ladan i pa dir ki nou, nou pe viktimiz e sa ki'n monte yer. Nou pe fer en Komite, nou TOR i montre ki nou anvi viktimiz zot.

Mon'n lir sa TOR i an Angle mon pa tro konpran si kekfw zot tou zot ganny mwan letan mon lir swam on lir an Angle. Selman mwan konnen ki i annan nou koleg i annan detrwa nou koleg isi ki ofe oubyen *fluent* an Franse. Me mon a demann zot pou tradwir sa an Franse apre nou a sey sirkile, kekfw i ava ed lezot ki konpran Franse pli byen e kapab konn sa.

Mr Speaker, en lot keksoz ki'n sorti - en lot keksoz ki'n sorti se ki nou, nou pe dir determine ki mezir. Letan ou get dan sa provizyon kot i dir "*further to information received the Committee shall determine what measures if any - if any*" ekspre nou'n met sa mo - sa detrwa mo. Pou nou montre ki poudir nou pou sey anmenn keksoz nou. Me Selman si i annan nesesite, si nou kriy mon fer en lapel la dan Lasanble nou dir bann ki pa'n fer zot deklarasyon vin

kot nou, vin kot sa Komite eksplike.

Kekfw vre in annan serten omisyon lo zot par. Zot in en pti pe okipe, aköz i arive ek mwan tou sa. Mon pa pou dir, me selman mwan mon deklarasyon assets toultan mon'n fer sir ki si mon pa pe ganny sans fer letan i dir. Me mon'n notifie, parey sa enn ki 2025, mon ti notifie Lasanble e ACCS poudir mon pa pe kapab fer aköz mon ti'n fek ariv dan pei son bomaten; mon pa pe kapab fer sa, a zour. E ACCS ti sonn mwan en lot apwentman mon ti bezwen sorti dan Lasanble al apwentman pou mwan al kot ACCS kot Mrs De Silva, pou mwan fer sir ki mon soumet mon deklarasyon.

E mon pou osi dir ki letan mon fer deklarasyon par lefe ki mon en avoka, en noter piblik - mon osi annan bann kontra ki vini ant, ant pandan letan ki mon'n deklar mon'n fer deklarasyon ek sa *next assets*.

E mon'n diskrit sa avek Mrs De Silva. E in *advise* mwan ki letan ou ganny sa fer *addendum* anmenn kot zot. Ki fer ki demen si en dimoun i war ki mon'n benefisye ek en keksoz oubyen mon'n aste en lot keksoz i krwar ki poudir i annan *corruptive practice* i ava al fer son konplent laba kot ACCS.

E i ava kapab...

(comments off-mic)

HON CLIFFORD ANDRE

ekoute. I ava kapab demann ACCS pou ouver e gete akòz e kan ki Onorab Andre in benefisyè avèk sa enn keksoz. So, mon pe dir sa Mar Speaker, akòz i annan en konvèsasyon ki kapab ganny fer avèk ACCS Mrs De Silva laba - kot zot organize. Si nou pa'n ganny sans fer letan in dir i pe vin kot Lasanble i kapab fer alternativ kot nou vini nou deklare nou *assets*.

So, pou pa deklare ou *assets* pou mwan i en keksoz ki serye. E declaration of *assets* i pa en keksoz ki tou dimoun i fer. I annan en *selected few Constitutional Appointee*, ki fer deklarasyon zot *assets*. E sa i annan bann rezon spesifik sa, pou fer sir ki napa koripsyon ki arive dan nou travay, i vreman enportan.

Alors, sa ki pa'n fer i ganny konsidere sirtou koman Manm Lasanble, e in dir ladan pou determinen si sa in afekte limaz. Si i annan lenplikasyon lo limaz Lasanble Nasyonal. Me si piblik deor i konnen poudir Manm Lasanble ki enn son louvraz se deklare son *assets*. Sa i dan en Lalwa spesifik, i pa ni koman en *businessman* me Selman i koman en Manm Lasanble

Nasyonal pou li deklare son *assets*.

E si nou pa fer sa, i annan en lenpak, akòz si nou sa ki nou'n fer Lalwa pou fer nou pa delivre alors i fer ki nou bezwen gete ki mannyer nou Lenstitisyon, parey Onorab Georges in dir nou *self regulate* nou lekor. Pou fer sir ki demen sa sityasyon pa ganny repete, akòz si i kontinyelman ganny repete par diferan Manm, i fer ki nou Lenstitisyon pa pe perform alaoter.

En lot keksoz ankor ki mon ti a kontan souleve Mr Speaker, se ki Onorab Pillay in dir Onorab *Leader* Lopozisyon in dir ki ladan i mete konpozisyon "*shall be*." So, si i dir konpozisyon "*shall be*", ou bezwen form par. Ou ava met ou pwen lo sa Komite ki poudir ou pa dakor ek sa, ou pa dakor avèk sa. En vot i a ganny pran e i ava ganny *carried forward* si i neser. Si i pa ganny *carried forward*, i pa pou ganny *carried forward*.

So, i enportan ki zot annan en reprezantasyon pou zot fer zot lavwa tandè. Me letan zot napa reprezantasyon, zot pa kapab demen vin blanm nou akòz nou, nou'n fer pase sa ki nou, nou santi i apropriye. E ki nou, nou santi i dan lentere pep Seselwa, zot pa kapab von blanm nou demen.

Zot pa oule... Mr Speaker, en keksoz ki mwan mon panse akòz zot pa partisipe se akòz sa Komite pa peye.

(laughter)

(APPLAUSE)

HON CLIFFORD ANDRE

E i paret - i paret Mr Speaker, ki tou Komite ki pa peyant zot pa partisipe.

(laughter)

(APPLAUSE)

(comments off-mic)

HON CLIFFORD ANDRE

Food Security kot i enportan pou nou annan lagrikiltir sekirite manze alimanter, sanzman klimatik, nou bezwen fer sa travay akòz nou, nou enterese avek nou pei, nou pep alòrs nou, nou fer li irespektiv si i peye oubyen i pa peye.

Annefe mwan mon chair lo la, i pa peye. So, mon fer sa volonterman akòz mon konnen demen mon zanfan, mon pti zanfan, e zanfan mon bann koleg zot pti zanfan osi pou benefisye. So, alòr dan sa konteks Mr Speaker, mon pou demann tou Manm enkli mon bann koleg lot kote pou donn nou sipor. E par azar parey

mon ti dir letan mon ti fer mon lentrodiksyon. Mon ti dir si i annan sa 2 plas nou ava pran.

Be ankòr enn fwa mon pe demann zot mon pe pled avek zot pou pran sa 2 plas lo sa Komite, e fer zot lavwa, zot konsern tandè, akòz si zot pa fer sa Le 27 Septanm “*No Turning Back! LDS Sesel!*” E alòrs mon dir annou donn sipor en Mosyon ki ti annan son senplisite pou fer sir ki nou delivre pandan sa 30zour. E mwan mon ti a kontan ki nou fini sa pli vit posib. E nou vini nou rann rapor.

So, avek sa detrwa mo Mr Speaker, mon pou demann tou Manm Lasanble, tou Manm Lasanble pou sipòrt sa Mosyon ki a fer ki nou a komans nou travay. E nou a delivre, nou a fer rann nou rapor dan dele letan ki’n ganny donn nou. Mersi Mr Speaker.

(APPLAUSE)

MR SPEAKER

Mersi. Yes, ki *point of order* Onorab Loze?

HON JOHAN LOZE

Mersi Mr Speaker. Mr Speaker, anba *Order 8* nou *Standing Order* mon oule met a ou latansyon koman sa dimoun ki prezid Lasanble Nasyonal ki *Bills Committee* pa’n *meet* ditou semenn pase.

Nou ti annan nou Mardi e Merkrede pou nou termin *Hazardous Chemicals Bill regardless* ki groser i ete. Nou abitye fer li, nou en Komite ki travay. Mon pa konnen ki prezan nou pa'n *meet*, me selman leskiz ki en gro *Bill* Komite pa ti ankor fini.

Nou ti annan 2 zour semen pase. E defwa nou menm *schedule* zour an plis pou nou travay. So, i pa en leskiz i en mansonz sa ki Onorab in dir nou pa'n *meet* aköz li i ti bezwen vwayaze. Mersi Mr Speaker.

MR SPEAKER

Ok. Mon a permet ou reponn koman *Chairman*.

HON CLIFFORD ANDRE

Mersi Mr Speaker. Mr Speaker, Onorab i dir mwan mon'n koz mansonz avek Lasanble. Mr Speaker, parey mon'n dir, mon ti zwenn *PS* Matatiken *Nairobi* semenn pase en *PS* in dir avek mwan ki poudir zot pe *withdraw the Bill* pou zot al...

(comments off-mic)

MR SPEAKER

Terminen Onorab.

HON CLIFFORD ANDRE

Pou zot travay lo la. E zot in anvoy zot let kot *Attorney* Zeneral pou verifye si i byen

avan zot anvoy kot Lasanble. Mon pa konnen si Lasanble in gannyen sa let. So, pou vin dir an piblik ki mwan mon'n koz mansonz, i pa korek. Aköz li ki'n koz mansonz. E le 27 Septanm nou pou montre li son mansonz. Mersi.

(APPLAUSE)

MR SPEAKER

Nou ava aret la. Mwan lo *point of order* ki'n ganny leve, mon zis bezwen dir ki Komite i regle son program travay li menm. E napa naryen *ruling* Speaker, pou fer ladan. Mersi. Nou ava apel Manm pou vot...

(comments off-mic)

MR SPEAKER

Mersi Onorab Pillay. Nou ava apel Manm...

(comments off-mic)

MR SPEAKER

Onorab Pillay trankil silvouple.

Mon ava apel Manm pou vot lo sa Mosyon. Manm ki an faver lev lanmen? Mersi. Manm ki kont lev lanmen?

(Interruptions)

MR SPEAKER

Order! Lo Mosyon propoze par Onorab Clifford Andre, pou form pou aprouv *Terms of*

Reference pou Komite ki'n ganny etabli dan Lasanble. 23 Manm in vot pour. 8 Manm in vot kont, 0 in *abstain*. Sa Mosyon in aprouve par Lasanble.

(APPLAUSE)

MR SPEAKER

Lasanble i ava *adjourn*. E nou a rebran 11er pou kontinyen lo lezot Mosyon. Mersi.

(BREAK)

(Mr Deputy Speaker in the Chair)

MR DEPUTY SPEAKER

Bonzour tou Manm Onorab. *Staff* Sekretarya e piblik a lekout. *Welcome back* pou kontinyasyon nou sesyon travay pou sa Merkrede le 23 juillet. Prosen *item* lo nou *Order Paper* ozordi, se en Mosyon ki dan non Manm Elekte pou *Inner Islands*. Donk, mon a demann Onorab Rocky Uranie pou prezant son Mosyon ganny segonde avan ki nou pas lo prezantasyon.

HON ROCKY URANIE

Mersi Mr Speaker. Mon Mosyon i lir koumsa. Lasanble Nasyonal Sesel i demann Gouvernman pou met an plas en Progranm Reabilitasyon konpreansiv pou ede tir nou lafors travayer zenn dan

adiksyon e s ai ava soulaz lafanmir Seselwa. Mersi Mr Speaker.

MR DEPUTY SPEAKER

Mersi Onorab. Mon ava demann Onorab Larsen...

HON CECILE LARSEN

Mersi Mr Speaker. Mr Speaker bonzour. Yes, Mr Speaker, mon oule segonn Mosyon anmennen par Onorab Uranie. Mersi Mr Speaker.

MR DEPUTY SPEAKER

Mersi Mr Speaker. Donk Onorab Uranie mon ava don nou laparol pou fer prezantasyon ou Mosyon.

HON ROCKY URANIE

Mersi Mr Speaker. Mr Speaker, mon fer referans ek rapor Minister Lasante *Division for Substance Abuse Preventions, Treatment and Rehabilitation (DSAPTR), Substance Use Disorder Treatment Statistics Report* pou lannen 2024 ki komans le 1 Zanyve 2024 ziska le 31 Desanm 2024.

Rapor i fer resorti ki zot annan 4847 kliyan ki annan problemn drog ek lalkol ki anrezistre avek *DSAPTR*. Parmi sa 4847 kliyan ti annan zis 2998 kliyan ki ti aktiv e pe akse servis *DSAPTR*. Pli zenn ti laz 13an e pli aze ti 74an. Sa rikord Mr Speaker, i zis fer ou

mazinen ki kantite osi ki pou en rezon ou en lot pa'n anrezistre avek *DSAPTR* ki probableman sif i *double*.

Dan rapor i fer resorti ki dan *DSAPTR data* sistenm 137 kliyan in fin mor.

Mr Speaker, an premye mon salye sa bann travayer, sa bann dimoun ki pe travay avek bann adikt. E bann ki'n fer konpilasyon sa rapor pou donn nou sa bann *statistics*. Mr Speaker, rapor i fer resorti ki i annan en program. Me eski i en program rehabilitasyon konpreansiv ki menm kapab anmas sa bann adikt ki vreman anvi sorti dan adiksyon e pare pou swiv tretman ek tou sa ki vin avek pou anpes zot retoun dan adiksyon.

Mr Speaker, nou tou nou kapab vwar sa ki pe deroule dan nou distrik dan Sesel ozordi kot i konsern adiksyon drog e lalkol. Nou ti'n menm war en *video* lo *YouTube* kot sa sityasyon adiksyon drog ti'n ganny met o kler. E menm bann kominote enternasyonal in kapab war sityasyon drog isi dan Sesel.

Sa ti en *cry for help* e ki Gouvernman e tou Seselwa i bezwen pran o serye. Nou tou nou bezwen zwe nou rol pou anpese ki nou dimoun, nou lafors travayer sirtou zenn i kapab sorti dan adiksyon e repran kontrol zot lavi. Sa i a

fer ki zot ava zwe zot par e fer kontribisyon dan lafanmir e pei.

Mr Speaker, nou bezwen rekonnet ki adiksyon i en maladi ki afekte plizyer laspe lavi en dimoun. Son laspe fizik, son laspe mantal, son laspe sosyal, son karyer, lalis i long. An gro i annan 2 adiksyon prensipal. Sa i adiksyon sibstans, kot dimoun i abiz sibstans parey lalkol sigaret. I osi servi diferan kalite drog.

Lot form adiksyon napa naryen vreman pou fer avek labi sibstans. Me plito adiksyon fizik, sosyal lo anna nou fer avek konportman parey bann ki kontan *gambling* zot kapab vin adikt. I annan ki adikt ek legzersis oubyen fer ladyet, *shopping*, *video game*, adiksyon servi *internet*. Bann ki kit latansyon antyerman lo zot telefonn, sa i zis detrwa legzanp.

A sa pwen i ti ava bon ki nou fer en pti refleksyon, en pti legzanmen konsyans, e gete kwa ki nou adikt avek aköz bokou fwa nou pa konnen nou en adikt ziska le ren dimoun i dir ou. E la ou aksepte ki ou annan en adiksyon ki parfwa difisil. Klerman pou swiv tretman rehabilitasyon an premye ou bezwen rekonnet e aksepte ki ou annan en problem adiksyon.

Mon Mosyon Mr Speaker, i annan pou fer avek nou lafors zenn ki dan adiksyon. E la i labi sibstans sirtou drog ki anpes zot al travay sirtou dan lanplwa formel pou zot vin prodiktiv. Sa group zenn i reprezant nou lafors travayer, me zot pa pe travay aköz zot lo sibstans. E nou ti a kontan ki zot swiv en Programm Reabilitasyon konpreansiv pou ede tir zot dan sa adiksyon.

Met zot dan en lanplwa pou ed zot prop lekor, e sa i ava soulaz lafanmir Seselwa par fer plis kontribisyon ki ariv kot lakour. Bann ki papa ouswa manman ava kapab zwe zot rol pli byen, pou fer fanmir viv anba mwens presyon lavi. Zot kapab pas plis letan ek zanfanki ki ava ede anmenn pli bon disiplin. Sa i ava osi ede avek laprantisaz pou anmenn pli bon rezilta pou zot menm e pei.

En sosyete san labi lalkol e drog i pou vin enn ki pli meyer e atir pli bokou plis viziter pou ogmant larises nou lekonomi.

Mr Speaker, adiksyon drog i vin avek konsekans kriminel parey vol, vol avek vyolans e menm komet mert.

Bann ki pran drog i a risk ganny maladi parey *Hepatitis C*, parfwa zot al dan koma, *overdose* e menm mor. La mon

a profite pou senpatiz avek bann paran e fanmir ki'n perdi enn zot pros an rezilta labi lalkol e drog. I vre ki lalkol i vann dan laboutik, e restoran aköz i en prodwir legal. Me si ou napa kontrol ou kapab vin adikt parey lalkol.

Labi lalkol i afekte lasante. I afekte bann organ parey lekor, lefwa, ronnyon e osi fer ou develop maladi parey dyabet e lezot ankor. Anba lenfliyans ou kapab fer aksidan e kout ou prop lavi oubyen lavi en inosan ki lo semen si ou anba en volan.

Ladiksyon i kout nou Sistenn Lasante e pei bokou larzan plizyer milyon. Alors, Gouvernman i bezwen pran en fer en desizyon serye pou met an plas en programm reabilitasyon konpreansiv pou ede tir nou lafors travayer zenn dan ladiskyon. E sa i ava ede soulaz nou lafanmir Seselwa. En programm prevansyon ki byen boner i vize ver ledikasyon a en tre zenn az, dan lekol depi premye lannen dan primer ziska *at least* S5.

Aprè nou bezwen servi bokou medya sosyal pou konpliment sa ledikasyon, pou dekouraz labi lalkol e pa servi drog. Me nou konnen ki bann ki deza lo sibstans byen rar zot ganny akse avek medya sosyal. Me la nou bezwen annan bann groupman ki

kapab al zwenn zot kot zot ete e sansibiliz zot lo sa problemn.

Bokou plis dialog, temwayaz, temwayaz paran e adikt zot menm; Bann *success stories* pou montre ki si ou serye ladiksyon i kapab ganny trete pou li ganny ekspoze avek piblik. Bann ki pa ankor komanse i bezwen byen ganny sansibilize e edike pou pa servi. Me pou bann ki deza adikt nou bezwen tret zot.

Zot la dan lasosyete avek nou, nou pa kapab zis anvoy zot lo zil pou elwanny zot ek nou. Zot dimoun zot bezwen nou sipor pou zot kapab sorti dan sa ladiksyon. Servis stigmatizasyon anver zot pa ede, aköz sa problemn i ladan nou sosyete. Ozordi i devan laport ou vwazen. Demen i pou kapab dan ou prop salon.

Napa en zanfàn ki ne koman en adikt, malgre i annan ki ganny konsevwar par paran ki adik e la zot a risk. Parfwa nou bezwen met nou dan soulye bann paran ki zot zenn garson e fiy in vin adikt, in vin viktim drog e lalkol. Zot osi zot soufer e zot bezwen nou sipor. Zot bezwen sipor Gouvernman e lasosyete an zeneral.

En program reabilitasyon i dir apepre 18 mwan. Alors, Gouvernman i bezwen angaz li serye, e konstri en sant pou reabilitasyon si vreman nou anvi reganny nou zenn lafors

travayer. E koumsa mwens larzan ava pe ganny depanse dan le fitir er mwens dimoun pe abiz sibstans.

I vre ki i deza annan bann sant. Eski zot vreman konpreansiv? Eski zot pe vreman ofer tou sa servis? I vre osi ki pou annan bann ki pou *relapse*, zot kapab re tonm dan ladiksyon apre premye tretman oubyen menm apre dezyenm tretman. Nou napa swa nou pou bezwen retret zot pou remet zot lo zot lipye.

I vre ki i pou pran en kantiteletan, me nou bezwen fer li i en problemn ki la pou nou tou. Ler ou redwir demann *supply* osi pou tonbe. Nou pou bezwen anmenn Lalwa pli serye, pli strik pou *deal* avek trafiker. Nou bezwen osi annan program *after care* ki pou ed sa zenn ki'n fini son tretman pou re antre dan lasosyete e ganny lanplwa oubyen loportinite fer biznes.

Nou bezwen get lwen koman en pei, bann adikt i la toulezour avek nou. Nou pa kapab zis koz lo zot me pa vreman anmenn en solisyon. I vre ki bokou i apre pou kritike, e poudir ki pran drog oubyen lalkol i en swa. Me ler in sot limit, kot zot in vin adikt koman en sosyete fonde lo bann bon valer nou annan responsabilite pou ed zot.

En Gouvernman i annan lobligasyon, en devwar anver

son pep pou asir en meyer Sistenm Lasante. E tou son dimoun pou viv pli byen e epanouir. Minister Lasante, si ou al lo son *website* ou pou vwar ki son vizyon i mon site “Ki tou dimoun dan Sesel”, mon repete – “Ki tou dimoun dan Sesel i reisi ariv pli o lasante fizik, sosyal, mantal e spirityel. E ki zot viv an larmoni avek lanatir”. Lafen sitasyon.

Ankor lo *website* Minister Lasante, son misyon i mon site “San arete pou promouvwar, proteze e retablir lasante, kalite lavi e dinyite tou dimoun dan Sesel avek partisipasyon aktiv nou bann parti prenan atraver kreasyon sa lanvironnman favorab pou sitwayen fer desizyon enformen lo zot lasante”. Fen sitasyon.

Sa vizyon ek misyon Minister Lasante i fer kler rezon aköz ki Lasanble Nasyonal i devret siport mwan pou en bonn koz, kot nou demann Gouvernman pou met an plas en Program Reabilitasyon konpreansif pou ede retir nou lafors travayer zenn dan ladiksyon. E sa an retour i ava ede soulaz lafanmir Seselwa. Sa i en pledwari ki nou devret fer avek nenport ki Gouvernman ki vin o pouvwar.

Konstrir en sant avek tou servis ladan i kout larzan. Me

si nou fer li i pouk out nou mwens dan lefitir. Demen ler sa program pe mars byen e nou pe vwar rezilta kot plis nou zenn pe sorti lo drog e pe antre dan lanplwa e kontribye dan sosyete nou ava fyer poudir ki nou ti form par en bon desizyon pou nou pei.

Avek sa mon demann tou Manm pou fer kontribisyon, sizesyon pou anmenn sa sanzman koman bann Manm Parlman responsab. Avek sa 2 mo refleksyon mon termin mon lentervansyon. Mersi Mr Speaker.

(APPLAUSE)

MR DEPUTY SEPAKER

Mersi Onorab. Lot Onorab ki’n endike i oule entervenir. Onorab Tamboo. *Unless* segonder Mosyon otomatikman i oule koz la. Oule koz la? *Ok*, Onorab Larsen mon ava don nou *next one* i pou Onorab Tamboo.

HON CECILE LARSEN

Mersi Mr Speaker. Ankor enn fwa bonzour tou dimoun espesyalman zabitan Au Cap ki a lekout. Mon santi ki mon annan en gran responsabilite pou siport sa Mosyon ki pe demann Gouvernman pou met an plas en Program Reabilitasyon konpreansiv, pou ede tir nou lafors travayer zenn dan adiksyon. E par sa

soulaz soufrans bokou fanmir Seselwa, akòz pa ni Mosyon *NISA*, ni Mosyon Deklarasyon *Asset*, ni Mosyon *Maison du Peuple* ki pou tir Seselwa dan sa soufrans ki sa Gouvènmàn in met nou ladan pandan 5an.

Nou tou nou konn gravite sa problem ladiksyon dan nou sosyete, i pa zis en problem sosyal i en kriz nasyonal ki pe afekte nou lekonomi, nou fanmir e pli enportan nou zenn. Zenn Seselwa i reprezant lespwar e lavenir nou pei. Me bokou parmi zot ozordi pe trouv zot dan en sib vyolan adiksyon swa drog, swa lalkol oubyen lezot sibstans ki pe detri zot lavi e tir zot lo bon semen.

I annan ki pa kapab gard en lanplwa. I annan ki perdi konfyans dan zot lekòr. E bokou fanmir pe viv dan fristrasyon, lape dan lakaz pe disparet. E soufrans i vin en realite toulezour ki ganny azoute lo sa margo anmer ki sa Gouvènmàn aktyel pe fors nou anvale.

Mr Speaker, enn bann pli gran defayans dan nou lalit kont adiksyon se man ken Sistèm Reabilitasyon ki entegre, ki soutenir, e ki donn en sans reel en sans reel pou bann zenn repran zot lavi. Nou bezwen plis ki zis tretman medikal. Nou bezwen sipor psikolojik, ledikasyon, konsiltasyon avek fanmir,

siport kominoter reentegrasyon dan lanplwa.

Mon kapab dir ki sa Program *URS* ti enn ki ti efektiv e ti pe fer tou byen. Me parey nou konnen, sa pa en program ki sa Gouvènmàn aktyel in kontiny avek, akòz pa ti dan zot benefis e benefis zot bann alye. Me plito pou benefis nou bann frer ek ser ki vilnerab e ki dan bezwen. En program reabilitasyon konpreansiv i pa en depans, i en lenvestisman; lenvestisman dan lafors travayer nou pei.

En zenn ki ganny sove atraver reabilitasyon i kapab vin en travayer. En paran, en kontribiter pou nou sosyete. Mr Speaker, mon krwar ki Gouvènmàn i annan sa kapasite pou met an plas en tel program, me lavolonte i napa. E nou Lasanble i bezwen donn en mesaj kler ki sa i pa en keksoz ki kapab esper ankor. Sak zour ki pase en fanmir i kase, en zenn i perdi son lespwar. E nou pe perdi son valer imen.

E nou pe kontinyelman war paran lo zot zenou e lanmen lo latet pou ki zot zanfàn i a ganny sove. Alors, mon lans en lapel avek tou Manm sa Lasanble, annou met politik dekote e fer sa ki drwat pou nou zenn pou nou fanmir, pou nou zanmi e pou lavenir Sesel. Annou siport sa Mosyon. Mersi Mr Speaker.

(APPLAUSE)

MR DEPUTY SPEAKER

Mon pou donn laparol aprezan Onorab Tamboo.

HON LOUISETTE TAMBOO

Mersi Mr Speaker. Bonzour Mr Speaker. Tou koleg Manm Onorab. Tou dimoun ki a lekout espesyalman zabitan Cascade. Mr Speaker, sa Mosyon in vin dan en bon moman. Annefe napa en pli bon moman ki la ozordi kot bokou nou frere e ser Seselwa is anti ki zot in ganny abandonnen par sa Gouvernman LDS.

En Mosyon ki bokou anplwayer Seselwa kontan tande. Zot pou santi zot soulaze. En Mosyon ki bokou paran e mer-d fanmir osi pou kontan tande. Zot pou santi zot rekonforte. Akoz Mr Speaker? Rezon i senp. A lafen defen Lasanble Nasyonal pe koz lo parmi enn bann pli gro problemn dan Sesel ozordi.

E se avek fyerte parey in toultan leka se *United Seychelles* ki anmenn bann tel size ki enpakte Lepep Seselwa. Akoz se nou *United Seychelles* ki vreman annan Lepep Seselwa a ker. Me mon pa pou kapab komans koz lo sa Mosyon san ki mon dir en pti keksoz. Depi ki LDS in pran pouvwar an 2020, partou Mr

Speaker, ko tou tyonbo i grennen dan ou lanmen. I pouri nepli bon, alor en keksoz pa bon, i pouri nou tir li e nou met lot.

Sa i fer mwan mazin sa zensek ki apel karya. Be LDS i menm zafer li. Avan eleksyon 2020 Mr Speaker, ou a rapel tre byen sa Program Reabilitasyon ki LDS ti vin avek pou Seselwa. Oli sa program? Sa Gouvernman LDS in fer en katastrof avek program reabilitasyon, bann ki lo sibstans e ki annan problemn adiksyon depi zour ki zot in vin o pouvwar an 2020.

Si ozordi problemn in ariv lo sa lanpler, se zot lafot LDS. Zot lenkonpetans ki'n anmenn nou sa zistans. Zot in koz manti avek Seselwa. Zot in donn Seselwa fo lespwar, e zot in *fail* sa pep. zot in fail sa group dimoun ki ti krwar avek zot LDS pou annan lespwar. Me zot pli gro fot Mr Speaker, se sa bann dirizan LDS i annan labitid ki si zot pa kontan en lot parti politik zot detri tou sa ki sa parti in fer. Bon pa bon, zot pa enterese.

Si zot pa kontan Gouvernman avan menm zafer. E la Mr Speaker, mon a dir ou si zot pa kontan en endividi pli move ankor. Les mwan dir Lepep Seselwa ki anba direksyon Patrick Herminie, sa problemn ti pe

ganny adrese dan en fason tre profeyonnel. Anba lorganizasyon ki li i ti dirize *APDAR* en kantite nou zenn ti kapab sorti dan ladiksyon e retrouv semen lanplwa.

En kantite nou zenn ki ti'n pri dan sa fleo ti kapab ganny re entegre dan zot fanmir, zot lakour, kominote, e osi dan lasosyete.

Me ozordi avek Gouvernman lenkonpetans *LDS* i nepli leka. Lakantite nou zenn ki pe perdi dan sibstans, i bokou fwa plis ki bann ki ep ganny sove. Parey mon'n dir Mr Speaker, *LDS* in vin o pouvwar zot in vin detri tou keksoz ki Gouvernman avan in fer, in batir bon pa bon zot pa enterese.

I pa zis ki zot pa enterese avek sa ki Gouvernman *United Seychelles* in batir li. I se ki zot pa enterese avek Lepep Seselwa. E sa Seselwa in war tre kler. Lafason ki *LDS* in abandonn sa pep i montre. E mwan mon pe dir ki fodre le 27 Septanm *LDS* i ale e i al net. Parey proverb Kreol i dir "zot zet pti baba ansanm avek delo!".

Legzanp Mr Speaker, pou bann ki pe gognarde mon pou dir zot. Ki'n arive avek bann Sant Reabilitasyon dir nou? Ki'n arive avek bann lezot landrwa ki ti ofer bann bon program reabilitasyon? Ki pe arive avek bann pli bon

program ek lenfrastruktir ki *LDS* li menm pa oubliye Mr Speaker, 2020 tou sa ki pe asiz lo sa kote latab laba ti koz menm parol. "Nou pou reabilit nou zenn, nou pou tir adiksyon, nou pou al *detox cold turkey*." Ki'n arive ek zot bann bon parol? Zot in manze? Zot in anvale? Be Lepep Seselwa, i war zot dan kler Mr Speaker.

Sesel i en pei kot son lafors travayer pe diminyen tro vitman. E mwan mon blanm Gouvernman *LDS*. Mr Speaker, zis parey Mosyon pe demande, fodre ki nou pei i met an plas en program konpreansiv pou tir nou bann zenn dan adiksyon.

E sa i nesese pou plizyer rezon. Seselwa pe von envalid tro zenn. Akoz sa Mr Speaker? Lafors travayer etranze i kontinyen grosi, zot pran nou *job* tou nou bann Sekter Prodiksyon e nou lekonomi. Anplwayer i perdi konfyans dan Seselwa.

Zot vin travay en zour landmen ou pa war zot. Si napa en bon Program Reabilitasyon an plas la sa zenn i kontinyen deroute.

Sa pa bon pou lavenir nou pei. Pa bon ditou. Mr Speaker, si napa en bon Program Reabilitasyon konpreansiv lalis dimoun ki bezwen lasistans sosyal pou toulezour agrandi.

Nou ti annan dan lefase *scheme* travay ki ti anmas en kantite bann viktim sibstans ki sa ti form parti zot reabilitasyon. Be dokter konn tou li ki in fer ler in vini? In pran pei in kennsel tou program ki ti pe soutenir, ki tie pe anmas sa bann viktim. E ki dan en fason ou en lot ti e ede avek reabilitasyon.

Me malgre tou mon pa krwar ki nou devret perdi lespwar. Akoz pa lwen Mr Speaker, apre le 27 Septanm Patrick Hermine pou vin rektifye sa gasi ki Wavel Ramkalawan in fer. Ou konnen Mr Speaker, sa *LDS* la zot ipokrit zot. Ou konnen kwa ki fer mwan dir sa? Ankor enn fwa mon pou dir mazin byen e ou ava rapel byen ki mannyer zot ti pou vin fer tou byen lo sa size.

Zot ti promet bokou paran ki zot pou ed sa bann viktim, ki zot ki annan pli bon plan pou reabilitasyon. Be li ozordi zour? I annan keksoz ki kapab ganny fer pou sekour bann ki deza dan sa ladiskyon. Atraver bann bon Program Reabilitasyon. Be Mr Speaker, *LDS* zot napa dirizan kalifye pou fer sa travay parey i pa kalifye pou diriz sa pei.

Annou donn lespwar nou bann frer e ser. Mwan menm pa siport sa Mosyon i montre ki mannyer mon annan konpasyon, konprenezon

anver sa group dimoun. Annou donn zot, zot valer koman en et imen. Annou tyonbo zot lanmen e vin sa zepol ki zot ava apiy lo la. Par lao tou Gouvernman *LDS* e tou son bann *MNA* ki pe kakaye laba lot kote i bezwen komans montre zot volonte pou al dan sa direksyon.

Zot pa'n montre sa volonte pou sa preski 5an ki zot in la o pouvwar, e sa i kler Mr Speaker. Mwan mon'n vin dan sa Lasanble pou vin defann Lepep Seselwa. E napa person ki pou anpes mwan fer li sa. I pa'n zanmen tro tar, nou dan sa Lasanble Nasyonal nou kapab komans fer sa travay ansanm. Nou tou nou devret vot pou sa Mosyon anmennen par onorab Rocky Uranie. Gouvernman *LDS* li osi i kapab zwenn nou dan sa demars.

Pou sa dernyen 2 mwan ki reste zot o pouvwar avan ki zot sorti net lo lasenn politik dan Sesel. I devret anmenn son sipor dan sa direksyon. Omwen i ava pe fer en keksoz ki bon pou Lepep Seselwa apre ki zot in zis abandonn sa pep Seselwa, abandonn nou ser e frer ki bezwen sipor en Gouvernman pou kapab redrese e re ganny en lot sans lavi.

E mwan mon pou pas en mesaz avek tou viktim, avek Lepep Seselwa an antye Sel

opsyon pou Sesel, se *United Seychelles*. Patrick Herminie ki pou vreman ganny soulaze sa bann viktim. Mersi Mr Speaker.

(comments off-mic)

MR DEPUTY SPEAKER

Mersi Onorab. Mon pou dir avek Lasanble Nasyonan en keksoz. Anba *Order 8* ki mon pou dir sa ki mon pe al dir la. Zot konnen bomaten letan mon'n sorti dan lakour, mon'n sorti dan lakour avek en lapriyer. Mon'n dir i annan sa Mosyon Onorab Uranie lo *Order Paper*. E mon'n priye, drog pe afekte tou dimoun dan Sesel, tou fanmir.

Mwan mon sorti dan en fanmir 7 zanfana, e toulezour mon remersye Bondye napa enn mon frer, mon ser ki dan drog. E nou erit vin en legzanp pou nou bann zanfana en pti zanfana nou fanmir Henrie. E mon ti pe dir ki sa size i afekte nou tou, e sirtou nou bann Manm Elekte nou vwar dan nou kominote ki mannyer sa pe ganny afekte.

E mon lapriyer bomaten se ki nou ti ava reste *above politics*. *Let's not play the blame game*. Akoz mwan mon konnen poudir letan nou ep koz politik, bann zofisye bann parti ki bokou nou i la anndan bann Manm Elekte bann lezot Manm ki lo Komite Egzekitiv

parti, Gouvernman. Nou, nou pa'n anmenn drog Sesel nou. Nou pa vann drog nou.

E alor nou pe lager pou nou kominote. So, nou koman politisyen *let's not start fighting amongst ourselves* lo en problem ki pa nou ki kree dan nou pei. Nou tou nou pe lager pou tyonbo bann droger ki pe anmenn drog, reabilit zot. So, mon lapriyer anba *Order 8 let us stay above politics, no blame games*. E pou ki nou lager pou kominote pou Sesel e Seselwa. Ki nou *rid our country of drugs*. Sa mon lapriyer.

Akoz si en kote i komans akiz lot e i anmenn largiman politik dan en deba imen, nou pou mal fini ozordi. E mon pa pou kapab anpes en lot reponn en lot ki'n komans akize.

Onorab Uranie, mon'n kontan ou prezantasyon. *It was the right*. So, mon lapriyer pou nou reste dan sa direksyon. Silvouple mon pe dir sa anba *Order 8* pou *maintain the decorum*, pou nou kapab apros ozordi en size ki konsern tou Seselwa silvouple. Onorab Gill, *you are next on the list*. Mersi.

HON CHURCHILL GILL

Mersi Mr Speaker. Bonzour tou dimoun a lekout. Tou Manm. Mr Speaker, mon'n rikord ou, ou'n pran apepre 3

minit. Ou pou rann sa 3 minit? *Ok.* Mosyon Onorab Uranie i lir koumsa Lasanble Nasyonal Sesel, i demann Gouvernman pou met an plas en Progranm Reabilitasyon konpreansiv pou ede tir nou lafors travayer zenn dan adiksyon e sa i ava soulaz lafanmir Seselwa.

Mwan dan mon prezantasyon, mon le felisit Onorab Uranie ki'n fer en refleksyon tre profon ki pou tous ki annan en lanpler nasyonal e i tous tou fanmir Seselwa. Dan son prezantasyon, i non men si ki tre efreyan. In dir ki i annan 4847 endividi, ki'n rpi dan sa fleo. 4847 i en kantite dimoun. Ki sa i vedir pou pei?

Se i anmenn en lenpak lo lafors travayer. E ler i anmenn sa lenpak, pe i bezwen vwar li pe donn bokou plis *GOP* ki ti a nesaser si sa 4800 dimoun ti dan en lanplwa. Ki sa i vedir lo nou kantite *foreign currency* ki nou anmase atraver lendistri. Bann lendistri leksportasyon. Sa i vedir ki en poursantaz, en bon poursantaz ki relye avek sa group dimoun ekstra ki bezwen ganny *recruit* pou travay Sesel pou ranplas sa 4800 ki'n ganny afekte. I montre nou ki poudir sa i annan en lenpak direk an term sonm ki kout pei.

Ki nou ti pou kapab servi li dan en lot sans si sa group

lafors travayer zot ti dan en lanplwa, zot pa ti'n pri dan sa fleo. Ki sa i vedir lo nou lekonomi? Nou tou nou konnen se loter lekonomi se sekter prive. E sekter prive pou fonksyonnen, zot bezwen annan zonm ek fanm ki annan kapasite pou kapab delivre dan nenport ki kalite travay ki kontribye pou zer lekonomi Sesel.

E la deza i montre nou ki avek sa kantite dimoun ki dan ladiksyon, dan sekter prive osi i annan serten lenpak ki sa i fer. Mr Speaker, mon pou osi tous en size ki petet nou pa realize oubyen nou pa pare pou koz lo la. Me selman li osi i annan son lenpak direk. E dan mon resers e analiz li sa bout i sa premye bout ki apre sa bann lezot konsern i deroul ladan.

Sa se dan sa kantite dimoun ki dan sa ladiksyon 4800. I annan bann fiy, madanm, garson e msye. E nou tou nou konnen dan reproduksyon en pei an term popilasyon nou bezwen annan sa 2 *gender* ki aktiv. Me nou pa realize poudir sa bann dimoun ki'n pri dan sa adiksyon bokou zot pa kapab delivre oubyen *fulfill* zot responsabilite an term zot *gender* ki zot ete.

E sa son lenpak i pou direk lo reproduksyon popilasyon. I en keksoz ki

toultan ler sa size in monte konsernan ladiksyon i pa zanmen ganny tous lo la. Me Selman nou pa realize poudir li osi i annan en lenpak direk lo nou popilasyon an term fason ki nou popilasyon pou grandi pou kontinyen annan zenerasyon Seselwa pou dan sa moter lekonomi dan Sekter Prive.

An menm tan sa size pou ganny adrese ki solisyon ki ozordi ler Onorab in anmenn sa Mosyon ki an plas. Kestyon ankor ki kantite larzan pe ganny depanse pou adres sa size? Eski sa kantite larzan ki pe ganny depanse i pe depans kot i devret ganny depanse pou li anmenn rezilta ki sa Mosyon pe demande? Akoz rezilta ki sa Mosyon pe demande, i rezilta ki pou benefisye pei dan tou son sans.

Alors, se sa ki mon pe demann sa kestyon. Eski sa larzan ki pe depanse lo sa group dimoun oubyen bann fasilite pou sa group dimoun, bann resous ki bezwen pou sa group dimoun eski i pe ganny depanse pou sa rezilta ki nou pe rode?

An menm tan ler nou get lenpak ki sa i annan dan diferan Sekter Lekonomi ki sa i annan, enkli e keksoz fondamantal pe ki sa se lafanmir. Kantite souffrans ki bann fanmir ki annan zanf

frer, ser, papa, manman ki'n pri dan sa ladiskyon ki zot pe pas ladan.

E ler nou gete tou sa lenpak ki sa i annan, i kler ki sa Mosyon i annan en lenpak tre enportan. E i devret ganny pran avek tou senserite e tou lenportans. E sa lenportans i devret ganny revwar, parey Mosyon menm in dir dan en fason konpreansif.

Ki mon oule dir par sa? Sa ki pe ganny fer ozordi, ler sa Mosyon in ganny anmenn i annan nesessite pou revwar dan en fason konpreansif regete si tou sa ki an plas ozordi pou adres sa problem i e anmenn sa rezilta. Ki mon pa krwar i pe anmenn a sa staz. Se pou sa rezon Mosyon in ariv la.

E nou tou ki annan en distrik nou konnen ki mannyer sa fleo i annan lenpak dan nou distrik. E nou konnen la ler nou ep debat lo sa Mosyon, bokou sa bann problem ki mon'n koz lo la ki lezot Manm in koz lo la, e ki lezot Manm a koz lo la o egziste. E zot bezwen ganny adrese, se pou sa rezon ki sistenm an plas ozordi i bezwen ganny revwar dan en fason konpreansif.

Akoz sa ki nou'n fer ziska la i pa'n nesesserman anmenn sa rezilta ki Mosyon pe demande, e nou tou nou konn sa. Alors, mon demann se

retourn otour latab bann dimoun ki bezwen *deal* ek sa bann keksoz ki annan responsabilite pou *deal* ek sa bann keksoz. *Return* otour latab revwar, re *asses* e pran bann desizyon ki Delavan nou a kapab war soulazman ki reel ki nou a kapab revwar lazwa de vivre dan bann fanmir ki zot ozordi zot an pler oubyen zot sagrinen.

Nou a kapab revwar nou bann frere, ser Seselwa ki ozordi nou vwar zot tou le bomaten kot bann bis dan diferan distrik nou a kapab revwar zot pe al travay parey nou, nou pe fer toulezour. E mon oule asir Onorab Rocky Uranie ki mon pou donn li tou mon sipor aköz sa Mosyon i en Mosyon ki merite. E en Mosyon ki devret ganny adrese san okenn rezervasyon. Mersi Mr Speaker.

(APPLAUSE)

MR DEPUTY SPEAKER

Mersi Onorab. Prosen enterven an ki'n demann laparol se Onorab Lemiel.

HON SYLVANNE LEMIEL

Mersi Mr Speaker. Mon a dir bonzour tou bann dimoun ki a lekout. Mr Speaker, mon annan en pti kontribisyon petet ki mon oule fer an sa ki konserne sa Mosyon ki onorab Uranie in anmennen. Mr

Speaker, mon krwar sa Mosyon li menm li in ariv koman en devlopman mon krwar tre enportan.

Letan mon konnen ki i deza annan plan ki deza la pou annan serten Sant Reabilitasyon pou nou bann adikt. Me Selman i en size ki parey ou osi ou ti pe dir taler, i en size ki enportan pou nou tou koman bann Manm Lasanble pou nou diskite en pti pe pli ouvertman lo la.

E petet kot nou kapab donn en pe plis nide ki letan ki sa sant li menm i a ganny fer, i a kapab ganny serten bon nide e ki pou'n sorti kekfwasi kot nou bann Manm dan Lasanble. E ki zot kapab pran pou met dan serten program or konsidere koman serten program. Bon, Mosyon ki pe ganny prezante ozordi par Onorab Uranie parey nou tou nou'n tann dir i pe demann Gouvernman pou met an plas en program reabilitasyon konpreansiv.

E bi sa program ki i pe dir se ki pou soutenir bann travayer zenn ki dan adiksyon. E par sa soulaz bann family Seselwa ki pe sibir lefe sa problem. Mr Speaker, sa mon santi i montre en rekonesans ofisyel mon kapab dir ki adiksyon li menm i afekte pa zis bann endividi, me osi zot fanmir. I afekte lanplwa, e i

afekte sosyete an zeneral li menm.

So, si sa Mosyon petet mon mazine deba i al byen. Mon pa vwar akòz i sipòze en Mosyon ki i pa pou ganny aprouve par sa Lasanble. Si vreman nou konsyansye, nou met politik dekote, nou vin ansanm nou diskite. E nou tonm dakòr lo serten keksoz.

So, mon santi ki petet i kapab vin en soutyen fondamantal pou reabilitasyon, re reentegrasyon e osi devlopman sosyal. Mr Speaker, i annan plizyè Program Reabilitasyon ki'n reisi dan bann diferan pei. E zot kapab ofè bann bon leson petet pou Sesel. Menm si nou bann kontèks li menm i diferan, i annan bann eleman petet komen ki fè zot kapab vin efikas pou nou.

Fè par egzanp ou pran *Canada* i deza annan en program zot. En program en Sant Reabilitasyon medikal pou bann pasyan ki'n pas atravè bann kriz leker oubyen maladi poumon. Ki sa osi nou konnen i afekte nou bann *drug addict*, i afekte bann dimoun ki bwè bokou. E sa lapros entègre laba *Canada* li i annan dan sa sant li men mi enkli ledikasyon lo lasante, lantrenman fizik.

E sa bann sant li, sa bann dimoun i reste dan sa

sant pou en serten peryòd letan kot zot pas atravè sa bann program ki mon pe nonmen. Zot ganny bann sipò psikolojik, zot ganny bann konsiltasyon avèk bann *dietician* ki petet i donn zot *advice* lo kote ki mannyer zot pou byen mentenir lekor atravè manje, atravè legzersis.

Aprè an menm tan son rezilta li menm ki petet laba *Canada* zot in vwar se ki zot in amelyor kalite lavi, in redwir risk pou bann nouvo kriz medikal. Petet Sesel nou ti annan Sesel osi nou ti kapab dir nou ti annan en program. Si nou tou nou mazin byen i en Program Renesans Sosyal ki ti annan son lansman ti fè an 2011 par Prezidan Michel sa letan.

I sa program li menm i ti ganny mete pou adres oubyen pou kouvè 5 sèktè plizomwen ledikasyon, drog li menm, lasante sosyal e aprè lanplwa. Enn de petet mon kapab dir dan sa program petet ti en siksè. Pou en pe letan sa program ti'n anmars, nou ti remarke ki ti annan en rediksyon dan bann biznes drog ki malerezman ozòrdi ou vwar ki i pe *come* dan en *increase* li menm ki nou pe sey lager avèk pou sey redwir.

In annan louvertir Sant Les Canelles, sa *Wellness*

Center. E in annan son louvertir, li menm li i en Sant Reabilitasyon nou kapab dir pou bann dimoun ki petet psikolojikman in ganny tape in ganny afekte. In annan menm par drog, par lalkol. Sa sant i la a zot dispozisyon. Me selman petet i en rekomandasyon osi letan nou pe diskite sa size.

I demann revwar en pti pe sa sant, akòz nou vwar ki lakantite ka ki annan sa sant li menm i tro pti pou cater pou lakantite pasyan ki merit al laba kot *Wellness* pou ganny en tretman. Ti annan sa Program Valer Pou Mwan, Valer Pou Nou Tou par *SNYC*. Nou vwar ki sa program li menm ti annan son sikse ki ti anmennen.

E mon konnen ki *SNYC* i ankò pe ale ek son Program Valer Pou Mwan, Valer Pou Ou. Savedir zot in war ki sa i ti en bon keksoz e zot pe kontinyen. I ti annan bann sipor pou bann manman vilnerab bann dimoun ki dormi dan semen. Sa i enn de petet sikse mon kapab dir ki sa Program Renesans Sosyal li menm ti'n anmennen.

Me nou bezwen kontinyen rod fason pou nou amelyor ankò en pti pe lavi nou bann dimoun ki dan adiksyon. E menm nou bezwen kontinyen rod fason pou nou ed zot sorti dan sa

adiksyon. *UAE* li menm ek Lafrans nou war kot zot ti pe donn sipor Sesel. *UAE* ti pare pou finans en Sant Reabilitasyon Cap Ternay. Me malerezman nou vwar ki i pa ankò abouti.

Linyon Eropéen ek Lafrans li menm ti sipòrt dan bann program devlopman. En program konpreansif pou entegre dan lanplwa sa osi ti lo program. E en eleman kle sa bann program petet ki kapab fer nou reisi se nou devret annan nou en lapros entegral or en lafors entegre kot li menm li i ava annan lo son kote medikal, lo kote psikolojik, sosyal e osi lanplwa.

Nou vwar osi ki petet avek bann tel program parey i bezwen sipor Gouvènmàn, bann sipor finansyel dirab ki nou pou bezwen. Petet i pou ton men pe dan bann rekomandasyon ki letan loter Mosyon li menm i ava konklir son Mosyon pou kapab met ater.

Partisipasyon komite li menm avek bann *NGOs*, ledikasyon lo bann prevansyon. Mon konnen ki sa dan lekol zot deza pe fer li. Be dan landrwa travay osi i bezwen mon panse i annan serten landrwa travay ki annan, e i bezwen kontinyen. E sirtou dan lekol a en tre zenn az nou bezwen pe

kontinyen petet pe edik nou bann zanfan. Akoz i annan en kantite keksoz ki zanfan i war dan lakour. Petet i war paran vin sou, paran kot pe pike devan zanfan, paran kot pe fim zot drog or pe *whatever* devan zanfan.

So, i enportan si zot pa pe ganny sa ledikasyon parey kot lakour, so, i enportan ki petet lekòl nou kontinyen pe donn zot sa ledikasyon pou fer zot konnen poudir sa bann keksoz i mal, sa bann keksoz i pa bon i pa pou bon pou zot lasante. Ki reperkasyon petet pou annan lo zot lasante, e lo zot lavenir.

Nou'n koz lo partisipasyon kominote avek NGOs. E mon krwar la nou devret felisite en pti pe bann NGO, akòz mon santi ki zot vremen pe donn en gro koudmen dan sa lalit kont drog li menm petet pou sansibiliz nou bann zenn, nou bann zanfan. I annan CARE, i annan lezot NGOs osi ki pe met ansanm ki pe zwenn ansanm avek Minister Ledikasyon zot fer ban program, bann lamars nou war zot, zot fer ki i annan nou, nou'n partisip ladan nou osi pou fer sir ki nou donn zot sa sipor pou zot kapab ed sa bann zanfan pou dir non a drog, non a lalkol. E non a bann labi osi lo sa bann sibstans.

E Mr Speaker, nou bezwen vwar osi petet letan nou pe koz lo reabilitasyon li menm nou donn legzanp bann pei, bann program ki zot in annan. E petet bann lezot pei pou Sesel petet konsider nou konteks pou nou. Nou bezwen petet get nou konteks lokal li menm, nou resours ki nou annan li menm.

E petet nou kiltir osi sa pou antre ladan. Me selman nou kapab dir ki i napa en baryer. Nou devret petet regarde atraver sa Mosyon osi nou pe vwar ki petet i pou en loportinite pou fer keksoz ki vremen marse pou nou pep. E ki a kapab retir nou bann zenn, par egzantp kre bann lapros entegral lo kote lokal li menm nou kapab dir kot nou ava annan bann lapros petet medikal, psikolojik, sosyal, lanplwa vin ansanm. Petet kot travayer Minister Lasante i ofer tretman fizik ek medikal pou bann adikt sa i enn.

Apre mon pe mazen petet lo kote psikolojik kot i ava annan enplimantasyon bann group terapi li menm, bann konsiltasyon bann endividyel ek bann sipor emosyonnel ki petet bann adikt li menm i kapab gannnen. Lo kote sosyal, se pou ankouraz zot entegre dan zot fanmir ek dan kominote. Nou konnen parfwa letan nou bann zenn i tonm dan sa bann

lenfliyans parey Mr Speaker, ou war serten fanmir i rezet zot. Zot dan semen, zot napa en landrwa pou zot reste.

E lanmenm ler ki nou vwar zot sityasyon i komans deteryor plis, al manz keksoz dan bin ki pa izyenik, ki pa bon pou zot lasante zot malad. E parfwa ou menm koman sa dimoun ler ou war zot dan sa let i vreman troublan i vreman fatigan. E parfwa nou blanm sa manm fanmir. Konnen? Me selman i devret petet nou annan sa lankourazman kot nou donn sa bann lankourazman sa bann fanmir.

E lakominote osi ki lafason ki mannyer nou tret pete sa bann dimoun ki dan adikt, ki petet parfwa par nou fason fer nou pa pe ankouraz zot pou zot sorti dan sa ladiksyon.

Lo kote Lanplwa, petet Lanplwa an kolaborasyon avek SNYC ki mon konnen in deza annan sa, in deza fer. Me selman entansifye, nou bezwen entansifye sa kolaborasyon.

E ki *Unemployment Relief Scheme*, wi in ganny koz lo la, i ti la. Me Gouvernman in deside pou *phase* li *out*. Me Selman i demann annan en asize e *think* ankore *about* en lot program petet ki en pe parey *Unemployment Relief Scheme*, ki ti a kapab petet soulaz en

pti pe nou bann dimoun ki lo zot program ki nou war zot pe geri ki zot ti a kapab ganny en fason pou zot ganny en mwayen pou zot viv.

Nou pe mazin osi ek bann anplwayer ki donn bann zenn en sans travay. Minister Lanplwa i entansifye sa dyalog ek sa bann landrwa travay, pou ki zot kapab donn en sans sa bann zenn. E entegre zot, donn zot *training*. E sa mon krwar i ede soulaz zot petet zot ganny en lokipasyon osi i tir zot dan sa bann adiksyon.

E osi mon pe mazine letan nou pe koz lo annan en program entegral. Petet letan nou mazine ki mannyer nou itiliz bann resours ki deza egziste osi ki nou annan. Parey nou'n nonmen, nou'n nonm sa Sant Les Canelles ki nou'n dir petet ki bezwen demann revwar, agrandi regarde ki mannyer nou kapab aranz li. *APDAR* li menm, zot in deza annan sa leksperyans dan harm reduction ek bann terapi *methadone* ki zot pe donner.

Pete gete ki mannyer zot kapab ranforsi en pti pe - mon konnen zot al dan bann distrik ki piblik li menm ennler pa tro kontan lafason ki i war zot pe donn sa bann *methadone* an piblik. Mon krwar firamezir i pe annan serten pti laranzman, parey mon konnen Anse Royale konmela zot donn dan sa vye lopital, kot ti ete

anndan kot i maske sa bann dimoun en pti pe olye ki ti pe donnen o bor *Home of the Elderly*. Zot in ekout lavwa nou dan Lotorite Distrik kot zot in pran konsiderasyon. E zot in move en pti pe pli dan kasyet, en pti pe pli dan kasyet en pti pe pli fason pou zot kapab ed sa bann adikt.

Letan nou regard bann NGO lokal, parey CARE ek CEPS Mr Speaker, i kapab ganny bann sipor adisyonnèl. Sipor adisyonnèl an term Bidze, an term petet pou fasilite zot fer serten keksoz zot osi ki zot kapab donn plis sipor sa bann adikt li menm.

Letan nou pe get lo ledikasyon avek prevansyon petet dan lekòl, nou bezwen komans entrodwir bann sesyon dan lekòl lo kote danze adiksyon, valer lavi kot lekòl nou annan bann program e bann *teachers* ki kalifye pou koz lo sa ban keksoz. Kre bann program, bann montaz nou kapab dir kot bann zenn ki'n pas atraver reabilitasyon i vin kot lekòl. I vin partaz leksperyans ek sa bann zanfan. E sa letan bann zanfan pou pe tann sa bann leksperyans kefwawa ki sa bann dimoun in pas ladan. Zot pa pou ganny lanvi petet zot al pran sa drog, al abiz lakol.

E petet zot a dir be non, be sa mannyer sa msye in dir nou in pas ladan oubyen sa

madanm in pas ladan, oubyen sa madanm in dir nou in pas ladan. Nou, nou pa ti a kontan pas ladan. Akoz a sa letan zot ankor tre zenn e i en form edik zot osi.

Lot keksoz osi se bann partenarya enternasyonal Mr Speaker, kot nou kontinyen ranforsi UAE menm, Lafrans, kot UAE parey nou'n dir ti'n donn ti'n pare pou zot donn finansman pou sa sant li menm.

E Lafrans kot ti'n pare pou donn program sipor pou program reabilitasyon li menm. Kontinyen ek sa bann relasyon, petet bann relasyon training pou nou bann dimoun bann finansman. Apre bann model pilot osi ki kefwawa Sesel i kapab aprann lo la. So, menm osi adapte bann model ki'n reisi dan bann lezot pei ki annan bann similiter parey nou isi Sesel, parey bann zil tropikal bann lezot pei ki mannyer zot, zot pe fer ki depan lo touris li menm.

Ki mannyer zot, zot in fer fas *or* ki mannyer zot, zot in kapab *deal* avek sa bann problem ki nou, nou vwar i ankor pe vin en pti pe problem pou nou bann touris. E ki nou konnen touris i nou ganny pen. E atraver sa bann latitud, sa bann fason fer parfwawa ki nou bann adikt i fer i kapab fer nou perdi en pti pe lo kote nou bann touris.

E petet annan en fason en sistenm ki ganny met an plas kot en sistenm kot zot *track* progre nou bann partisipan letan pou dan program. Annan bann statistik ki nou kit annord, ki nou garde pou nou kapab fer bann evalyasyon apre lo kote lafanmir lo kote lanplwa. E lo sa bann dimoun zot menm, si zot in vin en *success story* e ki sa nou kapab share osi avek lezot.

So, Mr Speaker mon krwar mon'n ou a krwar mon tann en bann *ahh* laba konmsi zot in ganny ase. Me selman mon santi ki vre i en size ki nou devret tal ater, nou devret pe diskite. E petet an menm tan avan mon fini pou mwan dir Onorab Uranie mon krwar ou'n fer en bon resers. Ou prezantasyon pou ou Mosyon ti tre byen. E i en Mosyon ki mon santi ki petet en pe letan, en pe lontan nou pe al *recess* la. Sa Mosyon petet i en pe tro tar.

Me i pa zanmen tro tar pou bann bon keksoz ki nou koz lo la Mr Speaker. Ki nou santi i pou anmenn en benefis pou nou zenn la deor e pou nou lakominote. Mersi Mr Speaker.

(APPLAUSE)

MR DEPUTY SPEAKER

Mersi Onorab. Mon pou donn laparol Onorab Aglae.

HON EGBERT AGLAE

Mersi Mr Speaker. Mr Speaker, mon po upran laparol ozordi pou anmenn mon kontribisyon lo sa Mosyon, aköz mon santi ki size ki sa Mosyon pe trete i en size ki vreman enportan. E ki neselit plizyer refleksyon e kestyon byensir lo kote nou'n arive, e kote nou pe ale koman en pei fas a avek sa problem ladiksyon sirtou ki pe target nou bann zenn ozordi.

E parey Mosyon i dir, ki pe afekte en lafors travayer. Mr Speaker, letan mon ti okouran ouswa ganny averti lo bann sityasyon fleo drog kot nou bann zenn ti pe ganny tape pou mwan sa ti boner dan lannen 2000. E mon rapel sa tre byen aköz mon ti pe travay dan Minister Lasante sa letan mwan.

E letan mon ti vwar poudir serten sa bann zenn e menm ki annan bann ki mon ti konnen ki'n dan menm Sistenm Skoler sa letan ek mwan. E ou ti ep tande ki nou ti servi sa term "ki sa enn pe fou". In bezwen admit dan *Unit Psikyatrik* lopital, ganny fermen aköz i ti'n servi en sibstans.

E sa bann letan, bann sibstans ki ti ganny servi ti ase en pe enkonni, aköz sa bann

letan medya sosyal parey i ete ozordi avek sa bann ouvertman i pa ti parey. So, lenformasyon pa ti al ase vit parey i ete ozordi. Me lefe i reste ki mon osi mon annan en bagaz kot i konsern *pharmacy*, e mon konpran ki savedir larealite letan nou pe koz lo bann drog sentetik.

E a sa moman letan Mr Speaker, bokou nou pa ti pe realiz lanplè ki sa ti pou vini *down the line*. E ozordi, nou'n ariv lo en sityasyon kot problem in vin pli grav. Bezwen dir pli grav akòz letan nou pe koz anviron 4800 ki dan ladiksyon, sa nou pe koz drog sentetik. Me osi si nou pe koz lo labi lalkol, e nou konn byen poudir bann lendeks i montre poudir Sesel i en pei ki mon kapab dir preske limero enn lo konsonmasyon lalkol.

I osi en problem, menm si enn i legal e lot kalite drog i ilegal, i *still* en problem. Me nou touzour pe koz lo sa ki ilegal akòz i kont lalwa. Nou'n war diferan program ki ti pe vize ver sanzman *mindset*, leta moral zenerasyon an antye. Nou'n annan Renesans Sosyal, Renesans Moral, Valer pou ou, Valer pou mwan. Bann program ki pe enkilke respe dan vwazinaz e osi bonn vwazinaz.

Si mon pou demann mon lekor en kestyon, eski sa in marse? Moon pou reponn li

koumsa ki sak keksoz i annan son moman letan ki pran son lanplè. E apre anmezir nou evolye, son nesesite ouswa son lefikasite i pou sanze. Kot nou bezwen bouz lo en pli o lanplè ouswa vin avek bann serten program pli inovasyon pou kapab kapte defi ki nou pe fer fas avek.

Ozordi Mr Speaker, soufrans ki bann fanmir pe pas atraver akòz enn son zanfan ouswa enn son pros i dan ladiksyon i fermal, i terib. I rasker letan ou pe vwar enn ki pe ganny met deor akòz i dan en ladiskyon. E i pa pe kontribye, e sa i *main reason* ki i ganny met deor. I pa kontribye, e ler i pa kontribye oule akse resours ki dan sa fanmir.

E i annan bann problem ki leve la. E an menm tan ou war ou ale pou ou pran sa ki ou men mou pa'n kontribye ou pa'n ede aste i kre plis problem ankor. Mon krwar nou tou bann MNAs la anndan, nou tou ki pas devan laport dimoun, nou ganny sa bann testaman parey nou dir par bann paran ki pe fer fas avek bann tel problem parey.

Prezan kestyon pli fondamantal ki nou bezwen demann nou lekor koman en sosyete, koman en pei se ki nou pe fer? Nou ti annan en komansman, *ok*. Nou ti annan

en komansman letan Gouvernman presedans e la mon pa anvi fer politik la mwan en. Mon pe koz larealite.

Gouvernman presedans ti vin ek en program pou sey kapab anmas sa bann zenn. Kreasyon APDAR ti enn, *ok?* APDAR son nesans ti'n vin avek apre ki bann resers ti ganny fer pou vwar ki meyer fason sirtou avek bann led UNODC ki mannyer fason nou kapab *tackle the issue of* ladiksyon dan en pei, dan en sosyete.

Ti annan en kantite vatevyen, diskisyon bann *National Steering Committee* ki ti zenn pou donn bann nide, bann leksperyans, bann expert, bann dokter ti zenn ansanm avan sa. E la ti vwar en nesesite pou annan en antite. Akoz ti santi poudir Sistenm Lasante, pa pou kapab lo li tousel *deal* ek *magnitude* sa problem se sa rezon.

E apre nou ti war poudir letan nou ti fer sa statistic ti montre poudir sa letan ti ganny dir dapre previzyon ki nou kapab annan nou apepre 10 mil dimoun ki lo adiksyon lo drog. Akoz tou kou i dir ou, sa *figures* ki ou gannyen tou kou se multiplr par 10 fwa. Alors, ki'n arive apre? APDAR ti ganny *tie in* avek en program ki ti pour pan bann zenn pou anvoy zot lo en

program sa letan ti *methadone* i ankor *methadone*. Me an menm tan fer zot vin prodiktiv, savedir plas zot dan en lanplwa.

Ou pa kapab pe zis pe resevwar en servis, e en zenn ki sipoze sa ranplasman lafors travayer ki sa bann ki aze ou pa kapab pa pe prodwir pou en pei. Akoz nou bezwen ou pou ou kapab fer larelev e pran bat letan sa bann ki aze pe pran son retreat. *This was the aim* sa program pou kapab plas sa bann adiksyon zenn ki ti dan ladiskyon dan en program travay.

E se sa ki nesans URS ti vini. Akoz URS? En kantite lesey ti ganny fer pou pals sa bann zenn dan bann lezot lantrepriz *be it* prive. Me ti annan en problem lakseptans, pa tou ki ti anvi pran. I parey en *ex convict* letan i vin rod en lanplwa si son rikord pa prop ou war i annan retisans pou anploy li. E drog osi ti mars parey, fodre pa nou kasyet sa i egziste i en form stigmatizasyon dan lasosyete ozordi sa.

E koman en sosyete, koman en pei nou bezwen rod fason ki mannyer nou sey ranvers sa kalite *trend* parey. E se sa ki URS, Gouvernman ti bezwen kre en *scheme* ki pou kapab tied in met zot dan en lanplwa ki Gouvernman i asiste. E zot ed e kontribye

dan pei. E sa tie de pe enport si zot pa kontan li.

I ti ede aköz sa fason kot fanmir ti pe ganny, fanmir pa ti pe aksepte serten dan son fanmir ti pe met anba lavarang i annan ki ti pe dormi dan pti store. Zot ti re entegre, zot ti ganny mete aköz zot ti pe ganny en pti reveni e ti donn manmi, ti donn dadi, ti ed frer, ti ed tantin, ti ed tonton pou li kapab ganny en pti lasyet manze li osi.

E nou ti pe war en kalite transformasyon ki ti pe arive sa letan. Sa ki ti o bor semen, ti'n sort isa bann ki ti pe vann koko, ti pe sorti vol ti'n redwir. *It was real*, en larealite vol ti'n redwir. Mon dan en distrik mon osi ki pe ganny tape ek a bann fleo, ti'n redwir, ok. Me lefe i reste ki apre 2020, in annan en sanzman.

E letan sanzman in arive, direksyon sa Gouvernman pete ti pa ti ep mazin parey sa enn ki ti la avan. Li pou li i ti pe mazin dan en lot konteks. Aköz ti ganny dir dan sa Lasanble, in dir nou pa kapab kasyet larealite. Ti ganny dir aköz nou pe depans larzan dan program reabilitasyon? Aköz nou ti pe depanse? 6enm Lasanble ti ganny dir sa.

Me ozordi mon kontan poudir zot in aksepte poudir nou bezwen annan en program pe enport ou lopinyon politik, sa ki ou

krwar ladan. Sa Gouvernman ozordi i rekonnet ki i bezwen annan en program. Me si sa letan nou ti'n fer sa refleksyon nasyonal, nou ti'n kontinyen siporte depi o komansman, me pa nou i ava lwen ozordi?

Eski koman en pei, nou ti ava'n perdi almost 3an/4an dan kreasyon en sant ki nou napa ozordi. Eski pa nou ti ava'n lwen? Eski nou pa'n zwe politik avek sa sityasyon ki fer ki in met en gran retar dan en program ki ti pou sov sa plizyer milye zenn. Be s ai en refleksyon ki nou bezwen fer. Mon pa pe fer politik mwan, i en realite.

Mr Speaker, plizyer program ti kapab ganny met an mars. E i ti pou annan levolisyon dan program, aköz dan reabilitasyon ti pou annan diferan stage. Mon krwar ti pou annan 4 a 5 *stage* ladan. Me ozordi nou pa kapab enplimant sa, aköz nou napa bann striktir nesaser aköz striktir in ganny kase.

Letan o komansman, e taler i annan ki'n nonmen atraver ou mon krwar Onorab Arissol in nonm Cap Ternay laba. Letan Gouvernman ti pronons son lekor pou fer sa Sant Reabilitasyon Cap Ternay, ok? Wi, ti annan bann lobzeksyon ki ti vini lo magnitud, aköz sa letan nou ti ep koz 45 milyon R40 a R45

milyon depans ki ti pou ganny fer dan sa sant.

Ti pou annan plizyer lasanm. E zot ti war ki poudir i en pti pe tou ambitious, kas li en pe fer desann sa ti ganny fer. Me lefe i reste ki sa site i en site kontansye avek serten bann desandans dan rezidan, wi ti arive serten kontansyon. E Gouvernman ti pronons son lekòr lo la li. I ti dir ki nou a *relocate* li lo en site ki ti pou ganny fer laba *Bon Espoir*.

E larzan ki ti pe ganny donnen *UAE* ti donn €4.5 milyon or dolar sa letan. Ti'n ganny fini materyalize pou komanse. Me lefe ki letan sanzman in vini mon'n dir taler, serten petet zot lideoloji direksyon vizyon pa ti anliny avek sa ki Gouvernman presedans. E la tou keksoz in kase. E la mon krwar nou bezwen retourn keksoz parey i ete i sipoze ete dan en fason.

Nou pou bezwen annan en Sant Reabilitasyon. Kontan pa kontan, lenvestisman pou bezwen ganny mete ladan. Si nou anvi ki sa group zenn ki pe ganny afekte i retransformen dan en fason pou zot vin dan en lavi pli prodiktiv, *somebody has to start somewhere*. E kote ou komanse? Se atraver gouvènanans ki ava met resous, apre i ava met avek bann groupman lentere, bann NGOs ki pare pou ede.

E Sanmdi pou annan en louvertir Port Glaud, kot Vilaz Laferm Lespoir ki pe al reouver. E i en komansman sa. Me Selman i domaz, s ai en komansman me i pa pou kapab kapte tou ki Program Reabilitasyon i demande. So, avek sa nou bezwen regard delavan. E letan mon pe koz lo delavan i bezwen annan en program ledikasyon e prevansyon ki serye e targete.

Ki mannyer nou fer, ki sa ki'n ganny afekte sa ki pe pas atraver sa problem adiksyon i pa enfliyans bann ki ankòr pe swiv dan en fason zot lavi *without* sa problem drog ek lalkol dan zot lavi. Sa i enn, i en ledikasyon depi Sistèm Skoler dan lasosyete, dan bann departman ki *deal* avek bann sosyoekonomik *program* pou zot kapab annan en program konpreansiv.

E se sa ki loter Mosyon ep demande li. En program konpreansiv, i ap vèdir zis ale fer en Sant Reabilitasyon *without* a proper kad. Nou bezwen annan en lankadreman.

Nou Sistèm Lasante ozordi Mr Speaker, letan zot in pran APDAR ozordi DSAPTR zot in ankadre li. Minister Lasante i *overwhelmed* dan en sans, akòz koman son core mandate ki in gannnen avek Minister Lasante prezan i bezwen pran en lot sityasyon

met anba son lezel i kre serten konplikasyon.

Premyerman resours imen, i kre problem partaz resours. E o psi anmenn sa sans ki en program rehabilitasyon se ki ou bezwen donn en kantite letan. Ou bezwen donn en kantite sipervizyon akòz sa kalite kliyan i annan son kalite... ki manner mon pou apel sa - i annan son kalite spesifisite avèk li ki vin avèk. Ki fer ki ou pe separ, ou met en keksoz ansanm ki mwan a mon avi i ti devret separe, pou li kapab ganny son lenpak.

Wi serten ners ti bezwen sorti dan Sistèm Lasante, e al travay avèk APDAR nou ti war sa. E i annan ti fer *part time*. E i ti annan ki ti reste a plen tan. Me lafason ki lezot pei in fer, in montre nou ki poudir nou annan bann even countries ki'n montre nou poudir zot in marse, in fonksyonnen en lazans.

E nou'n pran bann model avèk serten sa bann pei nou. Me parfwà *without proper* resers ouswa lanaliz, nou pran bann desizyon petet dan en fason i zis pou en desizyon petet pirman ekonomik without get sa laspe sosyal ki atas avèk e ki son lenpak. So, nou bezwen vwar sa tou Mr Speaker.

E an terminan, i annan en responsabilite ki osi

bezwen ganny partaze ozordi. E sa responsabilite i bezwen partaz avèk lasosyete. Pa zis Gouvernman sa. Gouvernman i pou fer son bout striktirel, finansyel, e lasosyete osi i bezwen pran son bout pou li kapab vwar ki manner mwan mon zanfàn mon elve li mon fer li grandi anpes li ki i al tonm dan bann problem kot i bezwen al abiz sibstans.

E vwar osi ki bann lenpak, ki bann lakoz ki fer zenn tonm dan labi. Ozordi ler ou koz ek plizyer zenn, i dir ou napa ase aktivite. E letan zot pe asize parfwà i dir ou dan naryen fer, ou al rod en keksoz pou ou fer ki ou pa sipoze pe fer. E enn bann rezon osi nou bezwen asize reflesir Mr Speaker, kwa ki nou'n fer la ozordi ki sa bann program in kase ki ti pe ed bann zenn dan bann aktivite.

Eski nou'n met ase resours? E si nou'n santi nou konsernen avèk? Tousala i bann pwèn ki nou bezwen partaz sa bann kalite blanm parey. Wi, nou bezwen partaze. E osi lafanmir, lafanmir ki sipoze en pilye ansanm avèk bann group relizye dan en sans plizyer fanmir i kase ozordi.

Akòz? Sityasyon ekonomik. Sityasyon pe i fer ki plizyer i bezwen bouze pou al sey rod lavi dan en fason. E letan zot in tap laport petet zot

pa'n resevwar let ki zot ti pe merite, e zot in bezwen al laba. Zanfán parey nou ti dir lontan. Lontan sa ki mwan mon granmoun i akont mwan, i dir koumsa mon ti bezwen aret lekòl pou mwan kapab ed manmi sonny nou bann frer, nou bann ser.

Wi, ti bezwen fer sa, akòz zot ti mizer. Me ozordi i annan en lot kalite form lamizer ki egziste. Menm si nou'n modernize, nou'n ganny elektrisite, nou'n ganny bann *gadgets*, nou'n bouze dan domenn teknolozi. Me i annan en lot form lamizer ki egziste, ki nou, nou pa pe vwar parfwa ouswa nou fer men lizye lo la.

So, Mr Speaker, mon konklir lanmenm poudir mwan mon dakor ek sa Mosyon. Akòz Mosyon pe tous en size ki enportan, sa i nou lafòrs travayer lazenes ki sipoze larelev e pran larelev letan nou bann ki pli aze i *retired*. E osi i ava anpes lakantite *foreigners* ki pe antre dan nou pei, ki pe pran bann travay ki mons anti nou bann zenn ti kapab pran.

So, eski koman en Lasanble, nou pa devret pe tret sa serye? Eski nou pa pou kapab sipòrt en Mosyon parey? Me mon santi ki nou annan en responsabilite kot nou kapab sipòrt en Mosyon parey. E mwan mon pou donn

Onorab sir Rocky, tou mon sipòr. Mersi.

(APPLAUSE)

MR DEPUTY SPEAKER

Bon nou'n ariv ler prezan pou nou pran *adjourn*. Nou pou rebran travay 2er apre midi. E i annan ABC 1er 15. Donk, nou ava *adjourn* la. E nou ava rebran travay 2er.

(BREAK)

MR DEPUTY SPEAKER

Welcome back tou dimoun, e bonn apre midi manm piblik ki pe swiv nou travay pour sa Merkrede apre midi. Avan ki nou ti *adjourn* pou *break* nou ti pe debat Mosyon ki table par Manm Elekte pour *Inner Islands* Onorab Uranie, ki lir koumsa.

Lasanble Nasyonal Sesel, i demann Gouvernman pou met an plas en program reabilitasyon konpreansiv pou ede tir nou lafòrs travayer zenn dan adiksyon, e sa i ava soulaz lafanmir Seselwa.

Lo lalis devan mwan i annan zis en entervenans ki ti'n eksprim lentere pou koze, mon pou donn li laparol la, e mon ti ava demann lezot Manm ki le entervenir pou endike, koumsa pou nou kapab balans letan, akòz nou le *dispose of* sa Mosyon ozordi apre midi pou nou pa trenn li

ziska semenn prosen. Donk mon ava donn laparol Onorab Woodcock.

HON WAVEL WOODCOCK

Mersi Mr Speaker. Mr Speaker, mon'n apresye lapel ki ou ti fer boner avan ler nou break regard an bann Manm ki pe entervenir lo sa Mosyon.

Annefe ou'n fer lapel pou met politik de kote, aköz sa *issue* fleo drog i en *issue* i en problemn ki afekte Seselwa an antye i afekte nou pei, i afekte bokou nou bann zenn. E i annan en lenpak ase signifikan lo nou sosyete.

Mon'n apresye sa ki *Chief Whip US* in dir ki nou bezwen inifye pou nou *deal* avek sa sityasyon sa fleo drog. Me malere Mr Speaker, ki nou annan nou 2 Manm Proporsyonnel, 2 Manm ase resan Onorab Larsen, avek Onorab Tamboo, Mr Speaker. ki zot, zot in pran en lot lapros plito polarize politik pou anvoy bann lensilt si pas *the buck* lo ladministrasyon pou en *issue* ki'n komanse i annan anviron en 20 an sepa plis ki 20 an pase.

Ki ozordi ladministrasyon pe sey travay pou nou osi nou annan en soutyen pou nou *deal* avek sa problemn. I malere Mr Speaker, ki 2 entervenan ki'n koze zot pa'n vin avek en sou rekomandasyon.

Mr Speaker, e mon apel parol klerman ki Onorab Tamboo, in dir poudir le moman sa moman ki sa Mosyon pe vini i le moman apropiye.

Me an menm tan Onorab Lemiel, li in dir poudir sa Mosyon in vin en pti pe tro tar. So war poudir i mank en pe *alignment* dan zot bann deba, dan zot bann deliberasyon.

E mwan mon dakor poudir sa i en keksoz serye nou pa merit pe polariz sa, e fer bann politik bonmarse Mr Speaker. I enportan pour nou fer en analiz pou gete kote sa problemn ti komanse, sirtou kan ki bann *hard drug* Mr Speaker, ti koman antre dan nou pei pou li kre sa lenpak negativ ki'n annan lo lasosyete pour anviron 20 an deza?

E i enportan pou nou gete sa *trend hard drugs, addiction* kote ti komanse, kan ti komanse? Sirtou bann drog parey ozordi nou pe fer fas avek *heroin*, e *cocaine* tout sa.

Mr Speaker, *heroin* parey mon'n apresye ki Onorab Aglae, in partaz avek nou bann letan kot li i ti pe travay dan *pharmacy* kot ti dan boner lannen 2000, ki vreman sa bann drog *hard drugs*, sirtou *heroin* ti komans penetre dan nou sosyete.

E by 2005, anviron dan milye 2005, dapre resers ki mon'n fer sa drog ti pe komans

propaze dan marse lokal Sesel, e bokou bann zenn malerezman ti pe komans servi sa drog.

E by 2011, Mr Speaker, *estimated heroin users* ti'n ariv 1,200 Mr Speaker, sa *by* 2011. En keksoz ki'n komans propaze dan nou sosyete dan lannen 2000. 2005, ti'n ariv lo marse lokal *by* 2011 ti'n ariv 1,200 *addict* apepre *estimated* 1,200 *addict*.

E *by* 2018, 2019. Mr Speaker, 2018, ziska 2019 Mr Speaker, in kontinyen ogmante, e in ariv to the *extent* kot ti'n ariv *approximately* from 5,000 to 6,000 *addicts* Mr Speaker.

Apepre 10poursan nou popilasyon travayer Sesel by 2019, sa bann 6,000 Mr Speaker. E dapre en *Integrated Biological & Behavioural Survey* an 2017, ki ti ganny fer ti annan en *estimated* 4,800 *heroin users* Sesel.

E kot apepre en 1,700 a 2,000 Mr Speaker, ti pe servi *injection* pikir Mr Speaker, ki parey mon'n dir en statistik ki ase serye. E tousala Mr Speaker, *by* 2019 tou sa bann lannen ziska 2019, e sete an 2020 ki Ladministrasyon LDS ki LDS ti antre dan ladministrasyon ti antre dan Gouvernman.

Alor sa *issue* drog mon pa krwar i *fair*, mon pa krwar i byen pour serten bann

Onorab, pou sey pas *the buck* konmsi ki sa in ariv anba *watch* nou ladministrasyon.

I en *issue* ki'n komanse depi byen boner an 2000, e ozordi in *escalate* in ariv lo nivo kot ti annan around 6,000 ekek *drug users* dan nou pei Sesel en keksoz ki'n komans anba zot *watch* Mr Speaker.

E i enportan ki nou sa i lefe Mr Speaker, i pa bann keksoz ki mon pe zis *quote* dan lezer Mr Speaker. Ler LDS nou'n antre dan ladministrasyon, nou ti deklar en lager kont drog, i malere Mr Speaker, poudir ti mank en pe lavolonte ladministrasyon avan pou anmenn en lalit asarnen kont drog.

Nou tou nou konn bann saga ki'n arive dan lepase mon pa al lo la NDA lot, lot - bann zistwar NDA ki'n arive, mon pa al lo sa bann detay. Me selman nou konnen poudir sa lalit anba Ladministrasyon US pa ti pe marse. Bann *Escobar* ti pe *roam freely* - zot ti napa okenn *issue*, zot ti menm pe mars lebra ouver pe fer tou dimoun per.

E personn pa ti le tous bann *Escobar* ki ti an deor Mr Speaker. Mr Speaker, *in fact* mon en pe sagrinan pou tande poudir mon pe tann leko konmkwa zot pe dir enn de sa bann dimoun ki zot pou ganny large apre eleksyon.

Mon pa pou al dir plis ki sa Mr Speaker, me selman Seselwa i annan zorey pou tande, e zot tande. So mon a retourn lo la pli tar Mr Speaker. Me selman en keksoz enportan ki mon bezwen fer resorti, aköz Onorab Tamboo, in koz lo Dokter Konn Tou.

So mon pou koz en pti pe lo Dokter Konn Tou, ki Dokter Konn Tou in fer. e Onorab Aglae, osi in koz en pti pe lo sant reabilitasyon. Nou bezwen annan en sant reabilitasyon, i enportan pou nou get listwar sant reabilitasyon avan 2020, e i enportan pou nou koz en pti pe lo ki Dokter, Dokter Konn Tou in fer.

An 2017 Mr Speaker, *US* ti set up sa ki nou apel *APDAR*, e sa ti vin zis apre 2016 Eleksyon, kot apre Eleksyon 2016, ki Mr Herminie, ti perdi son *seat* koman Speaker, e deswit apre *APDAR* ti ganny kree zot ti donn li sa pozisyon pour li ansarz *APDAR* pou li ganny en lot sez en pe o konmsi.

So ki nou ti war Mr Speaker, apre ki *APDAR* ti'n ganny *set up*? Mon mazin tre byen Mr Speaker, kot ti annan en sant reabilitasyon ti ganny *set up* lo Praslin ki apel *Dove Drug Rehabilitation Centre* i baze Amitie ozordi kot i en *Juvenile* - ou kapab dir en prizon kot bann zenn anba laz

i ganny *incarcerated* pou bann ki fer bann lofans.

Kot ti sagrinan Mr Speaker, zot pe koz bon labous pou fer en sant ki ti pou pran si mon pa tronpe anviron 200 dimoun Cap Ternay, me ler li *APDAR* ti ganny kree, ler *APDAR* ti kre *Dove Rehabilitation Centre a much smaller Rehabilitation Centre Dove*, nou ti war ki ti ganny kit dan labandon, nou ti war ki ti *end up*.

Mr Speaker, vreman, vreman sagrinan ki ti arive zot ti abandonn apre kantite lenvestisman pou etabli en *Dove Centre* pou bann dimoun pour nou bann frer ek ser ki ti pe ganny tretman, ki ti pe swiv bann program reabilitasyon kot sa sant - zis en sel kou zot ti deside abandonn sa sant Mr Speaker, en sant ki *obviously* i pa kapasite parey zot ti pe anvizaze fer, pou zot ki pou fer Mr Speaker? Pou al rod, pou al rod, pou al lwe 2 lakaz o bor lotel Lemuria laba Anse Kerlan pou R60,000 par mwan Mr Speaker, pou fer dalon kontan.

Kan ou annan en sant ki ti'n ganny refer ek tou son bann fasilite, ou abandonn sa sant ou kit li dan labondans ou al lwe 2 lakaz pou R60,000 par mwan Mr Speaker.

E la ozordi zot vin koz nou lo en sant spesyalize kan en sant sa magnitude ki ti lo

en lanpler bokou pli ba, pou abandonn li pou al lwe 2 lakaz pou R60,000.

E sa ti en labi Mr Speaker, ki nou'n diskrit longman dan Lasanble mon krwar ti devan FPAC osi Mr Speaker. Wi, an 2018 program *methadone* ti komanse. E by 2019 Mr Speaker, ti annan environ 2,000 dimoun ki ti'n *enroll* lo sa program *methadone* Mr Speaker. Me i enportan note ki an 2019 Mr Speaker, dapre statistik menm si ti annan URS ek tou sa bann diferan program ki zot ti annan travay, *whatnot* ki zot anvi fer retournen Sesel - ti annan dan - sa bann dimoun ki ti'n *enroll* lo program *methadone* 68poursan Mr Speaker, zot pa ti dan lanplwa. I annan mazorite zot ti fer bann louveraz *casual* swa *self-employed*, 68percent Mr Speaker, pa ti dan lanplwa.

By 2020 environ 75,000,000 ti'n ganny *allocated to prevention and rehabilitation* Mr Speaker. Tousala Mr Speaker, in arive avan an 2020, e *still* nou ti annan malerezman sa kantite zenn nou lafors travayer ki gran poursantaz pa ti dan lanplwa, e en gran poursantaz Mr Speaker, zot ti pe *still* lager pou sey sirmont sa fleo ki zot ti'n tonm ladan.

So apre ki LDS ti antre dan ladministrasyon, e sirtou dan bann komansman 2022, Ladministrasyon LDS ti *shift* anver *hardline enforcement*, kot lotorite konsernen ti *reassert a zero-tolerance stance*.

E ki nou ti war Mr Speaker? Plis lasezi drog dan nou pei, plis entersepsyon bann dav, bann bato menm bann bato lokal ti annan bokou plis entersepsyon in ganny sezi avek zarm avek drog.

E sa ti ogmant *significantly* bokou plis tonn drog dan nou listwar in ganny sezi anba nou Ladministrasyon LDS sezi, e detri.

Nou'n war plis arestasyon, e bokou plis *raid* Mr Speaker, ti ganny fer. Nou'n war *raid* lo Praslin bann landrwa bann dimoun ki mon pa ti pou ekspekte ozordi ti pou ganny aret avek drog, e ozordi nou pe war sa Mr Speaker.

Sa travay enportan asarnen ki Ladministrasyon LDS, e lotorite konsernen pe fer pour nou aret bann dimoun sirtou sa bann *drug dealers* Sesel.

Kontrerman avek US ler zot ti la ki nou ti war US i fer Mr Speaker, ler zot ti la Mr Speaker, ki nou'n war? Nou'n war zot kot zot pe defann bann

drug dealers Mr Speaker, nou'n vwar bann kestyon ariv devan nou Lasanble Nasyonal kot nou'n war Manm Lasanble Nasyonal *US* kot pe defann bann *Escobar* dan Lasanble Nasyonal.

Parey ka Nassim Mr Speaker, kot mon rapel Onorab Vidot, ti anmenn en kestyon regard an Nassim dan Lasanble Nasyonal ki ti ganny deporte zisteman pou size drog.

Nou'n war kestyon, e *PNQ* ki'n anmennen ankor par sa menm Onorab, e osi par *Leader* Lopozisyon, *PNQ* aköz bann *raid* ki lotorite ti pe fer Mr Speaker, dan bann landrwa kot drog ti'n asarnen ti pe avarye Mr Speaker, *Eden Village*, nou'n war sa.

E nou'n vwar menm ler zot ti anmenn, ler nou ti anvi ranforsi sa travay kont drog pou nou aret sa bann *dealers*, dan bann *hot zone* sirtou, kot ler nou ti pas Lalwa pou ki larme i kapab siport lapolis dan sa lalit kont drog Mr Speaker, ki nou ti war?

Zot ti koz kont sa lamannman Mr Speaker. Selman i enteresan zot ti koz kont sa lamannman pou anmenn en lager asarnen kont drog. Me selman ler zot ti fer zot *rally* Mr Speaker, *weekend* pase Dimans? Sanmdi?

Dimans wi, zot ti fer zot *rally* Dimans Mr Speaker, sa

bann menm group dimoun ki ti koz kont sa lamannman pou larme donn sipor lapolis, zot pe dir aköz larme pa ti vin asiste lapolis pou vey trafik pou anpes pou vey zot bann dimoun panga i ganny tape avek transpor Mr Speaker.

Kot ou war, mannyer i dir en pwa de mezir. Mr Speaker, de pwa de mezir Mr Speaker, ou war? En pwa de mezir vwala Mr Speaker. Mersi bokou.

So ou vwar Mr Speaker, lafason ki *United Seychelles* ennler zot get keksoz ler nou, nou ti pe anmenn lamannman konstitisyonnel, en lamannman pou nou kapab fer sa pou nou kapab ranforsi donn sipor lapolis pou lager kont en fleo ki pe detri nou pei.

Zot, zot ti vot kont zot pa ti an faver Mr Speaker. Me selman la ler i konvenab pou zot, ler i *convenient* pou zot la zot dir “arr la i *ok* la pou met larme, fer larme vin travay avel lapolis” Mr Speaker, pou kontrol trafik Mr Speaker.

Lekel? Mr Speaker, parey mon pe dir nou'n tann en kantite keksoz Mr Speaker, ki mon kapab dir mon annan en dezapwentman. E zisteman Mr Speaker, ler ti annan lager *Chief Whip*, dan *United Seychelles* ti annan en *recording* ki ti arive dan zot *caucus* Mr Speaker, ki ti *leak*.

Kot en Onorab, ti ganny rikorde kot i ti dir i annan en plantasyon drog, sa ti Onorab Aglae, ti'n *leak* ti partou, kot mon krwar i ti bezwen vin fer en *statement* devan Lasanble Mr Speaker.

So, kot i ti dir i annan en plantasyon drog ti arive, i ti ganny kestyonnen akòz i ti dir en *statement* koumsa Mr Speaker, so tousala i bann keksoz ki'n arive dan leparse.

E an 2022, DSAPTR ti raporte ki annan anviron 4,267 endividi ki *registered* lo program tretman Mr Speaker, sa i DSAPTR 4,267 dimoun ki Mr Speaker, in anrezistre Mr Speaker, pou tretman Mr Speaker.

Savedir *from* APDAR mon'n donn zot en *figure* taler, nou war poudir i annan en logmantasyon lo lakantite dimoun ki'n ogmante Mr Speaker, si mon pa tronpe mon krwar *figure* ki mon ti'n dir boner anviron, anviron mon krwar mon ti dir 2,000 ekek dimoun la in ariv 4,267 dimoun ozordi ki anrezistre anba DSAPTR pou tretman pou bann program tretman Mr Speaker.

Sa sete an statistik an 2022. E an 2022 Mr Speaker, nou ti war ki annan pou bann ki ti konplet tretman ti annan anviron 99 ki ti konplet zot tretman. Malerezman ti annan

en i en bann ki ti perdi zot lavi, 49 ti perdi zot lavi.

E ti annan ankor selman 179, nouvo *registration* an 2022 Mr Speaker. E bann laz i konsantre ant 25 a 45an Mr Speaker, malerezman sirtou *the bulk* ki'n tonm dan sa fleo drog avek sa fleo drog Mr Speaker, sirtou bann hard drugs danzere.

Mr Speaker, *cocaine*, *crack cocaine* avek bann lezot drog danzere. E avek program *methadone*, e bann servis reabilitasyon Mr Speaker, lakantite *drug users* ozordi in *plateaued*.

I pa'n- ou kapab dir *from* bann lannen 2000 an montan, i pa'n annan sa lanplè sa *increase* parey ti annan *from* 2000, 2005, 2011 ziska 2020.

So, ou'n war poudir in tenir en pe son *increase* lakantite dimoun ki pe servi sa grog ozordi. Savedir i annan serten travay ki pe ganny fer kot lenformasyon pe sorti kot ou war mwens dimoun Mr Speaker, pe antre, pe servi sa bann *hard drugs*.

Me i *still* reste lefe sa 5,000. 6,000 ekek nou bann frer ozordi ki ankor dan sa bann adiksyon, aze ant 25 a 40 an. E ki Gouvernman ozordi pe fer pou ed sa bann zenn? E pou kontinyen sa travay pou kre plis *awareness*, pou anpese ki nou ganny sa kantite dimoun ki komans

servi sa bann *hard drug* parey ti arive lo komansman ler sa drog ti antre Sesel.

Parey mon dir dan bann *early 2000* ziska dan bann 2018 koumsa kot ti'n vreman pik, en kantite nou bann zenn ti pe servi sa bann drog. E parey nou dir nou vwar poudir ozordi sa in *plateaued*, in desann.

Me i *still* reste nou en *significant amount of* zenn ozordi Mr Speaker, ki malerezman zot ankor anba sa lenfliyans, zot ankor anba sa fleo drog avek lalkol.

Mr Speaker, ki Gouvernman pe fer pou ed sa bann zenn ozordi? An levidans i la - mon'n koz lo bann program ki deza an egzistan anba *DSAPTR* Mr Speaker, i annan bokou travay ki pe ganny fer avek bann zenn.

E zisteman si ou pou get dan Bidze pour 2025, ou pou deza war bann travay ki nou Gouvernman Ladministrasyon *LDS* pe fer, parey nou annan sa program Laferm Lespwar Mr Speaker.

Si mon pa tronpe inogirasyon pou fer sa Sanmdi ki pe vini, kot Dyosez Katolik, legliz Katolik ki pe fer sa an partenarya avek Gouvernman ki'n ti donn en alokasyon Bidze R4.1,000,000 pou ede fer renovasyon lo 2 sa bann batiman laba, pou fer sa program kot i pou en

program spirituel, an menm tan i en program kot bann addict i kapab vini travay lo laferm fer *organic farming*, *live stock* avek bann lezot program pou ede *rehabilitate* sa bann zenn Mr Speaker.

Sa i en program ki Gouvernman in antre ladan an partenarya Mr Speaker, avek legliz *Catholic*. E sa travay ki pe ganny fer Mr Speaker, i pa kapab en travay ki zis Gouvernman.

I bezwen en travay kot tou bann *stakeholders* i vin ansanm swiv sosyete sivil, bann legliz bann *NGOs* nou tou ansanm nou bezwen vin ansanm pou donn en koudmen pou donn en sipor, e nou Lasanble in siporte Bidze pou sa program Laferm Lespwar ki mon senserman krwar i pou ankadre bokou, bokou sa bann zenn ki'n tonm anba lenfliyans drog.

Parey mon'n dir ki pou lanse byento Port-Glaud Mr Speaker, e i pou koman en *pilot* pou nou gete si i en sikse. E si en sikse mon krwar i en keksoz ki nou kapab petet idantifye lezot teren lo Praslin, lo La Digue, or petet lo en lot zil kot bann zenn i kapab osi antre lo sa program kot zot pe travay an menm tan zot pe ede dan ed nou avek nou lo kote sekirite alimanter, pou zwe plis lo kote *organic farming*, e *livestock*.

Mon krwar en keksoz ki bon, ki mon sipote, e mon krwar poudir sa i en linisyativ ki enn ki Gouvernman an partenarya avek Dyosez Katolik sirtou ki'n inisye sa.

Mon krwar en keksoz ki bon, ki pou ed bokou sa bann zenn Mr Speaker. E an plis ki sa Mr Speaker, nou konnen poudir zisteman mon'n ganny en konversasyon avek Stravens, Praslin ki ansarz nou program reabilitasyon lo Praslin *DSAPTR*.

E pou le moman zot baze i en landrwa ki zot pe deservi Praslin pou fer zot bann program. Me lide sete, e i dan Bidze pou 2000, pou sa lannen pou Anse Boudin Centre Praslin, en alokasyon R3,000,000 pou *renovate* li pou kapab *accommodate* bann pasyan bann *addict* Mr Speaker.

So i deza annan pa mal keksoz ki pe ganny fer deza, bann linisyativ ki pe ganny pran. I sanble osi poudir menm *CARE* osi Mr Speaker, i annan zot *Special School* ki en pilot *programme* Mr Speaker.

En program 3 an ki pe target bann zanzan *from P1* pou bann etidyan P1 pou 3 an Mr Speaker, e Gouvernman pe fer provizyon en alokasyon bidzeter R1.8,000,000 Mr Speaker.

So sa i de ou trwa bann keksoz ki nou ladministrasyon

deza pe fer pou nou ed sa bann zenn. E plis linisyativ ki nou kapab vin avek Mr Speaker, i pou ede nou bann zenn.

E mwan mon senserman krwar ki nou bezwen fer nou mye pou nou ed zot, e kominote osi i bezwen zwe en rol Mr Speaker, bann biznes.

E mwan Mr Speaker, mon byen avek mon konn en kantite menm lo kote Praslin dan mon distrik, nou annan bokou bann lakonpannyen Mr Speaker, konstriksyon, e lezot.

Ki Mr Speaker, zot donn sans sa bann zenn, kot zot pran sa bann zenn, e bann laferm mon konnen zot pran sa bann zenn pou travay avek zot. Sa bann zenn i ale bomaten i pran zot bann sou latizann zot *methadone* apre zot vini zot travay.

E i annan bann lakonpannyen ki donnen sa bann kalite sipor, e mon fer lapel avek plis lakonpannyen pou donn sa bann sans zenn, pou zot ganny en louveraz pou zot kapab soutenir zot lekor, e zot fanmir, i annan ki annan fanmir osi Mr Speaker.

E mwan mon ankouraz lakominote pour nou annan en pti pe plis tolerans, donn zot en pe sipor. Si annan en louveraz ki ou konnen zot kapab fer aköz bokou sa bann zenn ki'n tonm anba sa bann lenfliyans dan lepase zot ti bann zenn debouryer, i annan

bann ka osi kot sa bann zenn ti annan bann entelizan zot ti annan en bon louvraz.

E ou pou soke i annan bann zenn ki dan bann pozisyon ase o, i annan ki ankor pe travay Mr Speaker, ki pe swiv sa program *methadone*, e nou pa bezwen koman nou aprann poudir in tonm anba sa fleo nou zis pous zot nou zis met zot a kote. Nou bezwen donn zot sa soutyen, donn zot sa sipor.

E parey mon'n dir Mr Speaker, Gouvernman i deza pe met an plas en program reabilitasyon konpreansiv Mr Speaker, pou ed nou bann zenn travay, pou ed nou bann zenn travayer ki'n tonm dan bann diferan adiksyon, ou pa kapab anmenn en Mosyon pou demann Gouvernman pou fer en keksoz ki deza pe fer.

I mean si ou ti dir Gouvernman pou kontiny sa travay, ouswa entansifye travay. Me pa demann Gouvernman pou met an plas en program kan i deza annan program, bann program anba lazans *DSAPTR*, e lezot program ki pe ganny antreprann par parey monn dir Dyosez Katolik, *CARE* e lezot.

E i annan plizyer program deza an mars, so mon santi poudir sa Mosyon pe demann Gouvernman pou

fer en keksoz ki deza, ki deza pe fer.

Petet si loter Mosyon ti konsider amann son Mosyon, me selman *now* mon a dir li Mr Speaker, Gouvernman i deza pe fer en kantite, e nou war nou'n war rezilta par lefe ki nou war poudir sa *increase* dan lakantite dimoun bann zenn ozordi ki pe tonm anba, bann nouvo zenn ki pe antre dan sa adiksyon i annan en rediksyon.

I pa pe mont sitan vitman lo sa pik parey i ti ete dan bann *early* 2000, Mr Speaker. I annan en plato la Mr Speaker, so savedir i annan serten travay ki pe ganny fer ki pe marse, e la ki demande se plis travay pou nou travay avek bann ki deza *addict*.

Pou ed zot parey mon'n dir plas zot dan travay kre loportinite pour zot Mr Speaker, aköz sa ki pou ed zot pou zot evolye pou zot devlope Mr Speaker.

Akoz ler zot *idle* lanmenm ler ki zot kontinyen tonm dan sa bann lenfliyans ki fer li difisil pou zot sorti dan sa *addiction*. Alor Mr Speaker, sa Mosyon ki devan nou i en Mosyon ki zisteman pe demann Gouvernman pou deza fer en keksoz ki Gouvernman i deza pe fer.

En kantite, annefe i pe fer bokou plis ki ti pe ganny fer anba ladministrasyon

presedan, avek sa de mo mon dir ou mersi Mr Speaker.

(APPLAUSE)

MR DEPUTY SPEAKER

Mersi Onorab, mon war lanmen Onorab Lemiel anler.

HON SYLVANNNE LEMIEL

Sorry Mr Speaker. Mersi Mr Speaker, petet mon ti a kontan *raise en matter of privilege*, e osi pou petet demann Onorab Wavel Woodcock, aköz mon pa'n zanmen okouran in annan lager *Chief Whip*, dan *Caucus United Seychelles*.

E ki li i pe dir ki i ti annan parol ki Onorab, Onorab Aglae, in dir. Parfwa i enportan ki nou koz keksoz ki laverite nou pa vin koz keksoz ki mansonz.

Akoz dimoun la deor pe ekout nou, e nou pe konfiz dimoun deor, lager *Chief Whip* dan *Caucus US* pa'n zanmen egziste Mr Speaker, mon le met sa lo rikord.

Mon pa konnen si dan *Caucus LDS* in annan, me dan *Caucus US* i pa'n zanmen annan lager *Chief Whip*. Mersi.

MR DEPUTY SPEAKER

Mersi Onorab, lefe ki ou *Chief Whip*, parti *US* ou'n klarifye ki sa zanmen in arive, e mon pa bezwen demann lot kote. Be selman mon'n toultan dan *Caucus LDS* zanmen in annan

lager *Chief Whip*, lo kote *LDS* osi.

Now, i 2 er 30, i 2 er 30 e mon ti'n dir ek bann Manm endike lekel bann ki pou koze, donk mon annan en lalis mon pe fermen. Aköz inisyalman la anba *Order 57(11)* mon pou bezwen enpoz *time limit* pour nou kapab fini dan dele letan.

E i annan en Manm ki'n fek lev son lanmen, i fer ki mon ti pe al donn bann Manm ki reste pou koze 15 minit.

Me aköz i annan en Manm ki'n leve mon pou bezwen redwi ankor pour nou kapab fini, so mon pe donn zot 10 minit *from now* 10 minit tou dimoun ki pou koze.

E prosen entervenon ki lo lalis se Onorab Bastienne. Ou lo lalis wi, napa ankor ki pe ganny azoute *everybody* ki pe koze la 10 minit, 10 minit. Mersi bokou, Onorab Bastienne.

HON DESHEILA BASTIENNE

Mersi Mr Speaker. bonn apre midi Mr Speaker, bonn apre midi tou koleg Onorab, bonn apre midi tou dimoun a lekout, espesyalman nou bann zenn, e tou dimoun dan Perseverance.

Mr Speaker, sa Mosyon ki devan Lasanble anmennen par Onorab Uranie, i en Mosyon ki annan diferan fason enterpret li.

Mon dir diferan fason enterpret li, akòz le 28 Fevriye 2022, mon ti anmenn en Mosyon ki mon ti demann Gouvernman pou akseler travay pou etabli en *Juvenile Centre* pou kapab reabilit bann zenn anba laz ki'n viktim labi fleo sosyal dan pei, dan nou pei Sesel.

Fleo sosyal ki ti enkli labi drog, labi lalkol, e osi labi fizik. Mr Speaker, sa Mosyon ti konsantre lo zenn anba laz, akòz se la kot nou ti santi ki travayer ki travay lo fleo sosyal ki enkli tou sort kalite adiksyon i devret komanse.

Mr Speaker, nou tou ki ti la dan sa Lasanble, e piblik an zeneral nou konnen ki zenn anba laz i ganny servi par bann *drug dealers*, par serten manm fanmir zot menm.

Tonton, kouzen, zot profite zot servi zot bann pti neve, zot bann zanfan inosan pou fer tranzaksyon bann sibstans, dan sa lespri ki zanfan pa pou ganny dekouver.

E ki pou pli fasil pou zot fer zot tranzaksyon ilegal ganny pase. Mr Speaker, mon rapel byen ki letan mon ti anmenn sa Mosyon annan adilt la deor ki ti dir ki mon pe demande pou met zenn dan prizon.

Akòz li sa adilt i paret li menm li i ti pe servi zenn pour fer son tranzaksyon ilegal. Mr

Speaker, letan mon pe konpran Mosyon Onorab Uranie, i kler ki a pe al dan menm direksyon kot i a pe osi demann en program reabilitasyon pou ede tir nou zenn dan adiksyon, tir zot dan tranzaksyon ilegal, e an lot mo sa Mosyon i viz lo sa menm fleo sosyal ki pe paraliz nou lafors travayer. E pe kontribye pou anmenn retar dan nou lekonomi.

Mr Speaker, ozordi i vremen sagrinan pou war lakantite zenn ki pa pe travay pou zot kapab fer zot kontribisyon dan lasosyete.

Senpleman akòz zot in anprizonnen par tout sort sibstans danzere. Zot pa kapab konsantre, zot pa kapab delivre, zot pa kapab fer en rezonnman serye.

Akòz zot krwar ki tou sa ki zot pe fer ozordi anba lenfliyans drog i byen. Mr Speaker, la i kler ki Lepep Seselwa i war ki tan ki lafors travayer i fay, napa kontribisyon, zenn pa pe kontribye dan sa pei an rezilta adiksyon nou pou war arive fer fas avek bokou defi.

Tel ki sa sityasyon ozordi lo laz pansyon ki ozordi US zot menm zot pe sey fer li vin en lot zouti politik, amwen Mr Speaker, petet anba US en nouvo planet pou al ganny formen kot zis zot pou aroz later, e larzan pou pouse.

Mr Speaker, bi sa Mosyon se ki Gouvernman i met an plas en program rehabilitasyon konpreansiv pour ede tir nou bann zenn travayer dan adiksyon, donn zot sipor pou rekipere, e retourn dan lasosyete.

Sa demars i pou osi ede pou soulaz soufrans bann fanmir Seselwa, ki pe ganny afekte par problem adiksyon ki zot bann zanfann in tonm ladan.

Mr Speaker, si Onorab-si loter Mosyon, ti'n fer byen son *homework* i ti pou war li ki bokou, e bokou demars in ganny fer, e ankor pe fer anba sa Gouvernman pou ki zenn i sorti dan adiksyon.

E menm pou sa bann ki pa ankor komans al ver sa direksyon pou zot pa fer li. Mr Speaker, letan nou regard zanfann lekòl pe fer lamars dan semen, pe kriye avek zot plakar "*Say no to drugs!* Pa tous drog, drog i detri lavi."

Ler ou war zot pe penn lo zot miray lekòl, "Drog pa bon, i en fleo destriktif." Konbyen nou lezot zenn ki debout, oubyen adilt ki pou en minit, e konpran ki sa bann zanfann pe set fer?

E ki mesaz sa bann zanfann pe sey pase pour nou fitir zenerasyon demen? Mr Speaker, ozordi nou annan NGOs tel ki CARE, sanmenm

sa lenstitisyon ki'n fer bokou program lo drog.

Zot in komans lo nou grass root, zot in komans avek zanfann. Preski tou le Sanmdi CARE ti pe fer program drog avek sansibilizasyon lo drog avek zanfann lekòl.

Nou annan legliz Catholic li menm ki'n donn landrwa pou fer en sant pou ed bann adikt, donn zot en landrwa konfor pour zot kapab vin detann, e vin reflesir lo sityasyon lavi ki zot ladan.

Nou annan Alcolik Anonim, tousala se sipor ki ti deza la an plas, e ki ankor pe travay. E la tre byento nou pe al war louvertir en lot laport dan distrik Port Glaud, Laferm Lespwar.

Kwa sa? Napa nanryen ki pe ganny fer pou ede nou bann zenn sorti dan adiksyon? Loter Mosyon, li menm i en Manm COGA, Mr Speaker. kot ansanm nou ti al vizit en lot brans DSAPTR lo Praslin.

I annan de, i ti war i annan demars deza ki li menm li i okouran Mr Speaker, ki nou pe fer pour nou kapab sov nou bann zenn dan adiksyon.

Gouvernman in met R50,000,000 dan Bidze, si nou isi dan sa Lasanble ki nou isi dan sa Lasanble enkli loter Mosyon li menm nou'n vote pour ki zot ganny, pou ki bann dimoun ki dan adiksyon i ganny zot latizann, i ganny zot

swen, i ganny zot *methadone*. Me ki nou war Mr Speaker? apre sa doz *methadone*, en boug i vini i vann son drog ankor lanmenm, e zot pa oze dir non.

Mr Speaker, mon pou dir ankor program reabilitasyon i annan dan pei, e i pa'n zanmen arete. *DSAPTR*, i ankor pe donn servis Praslin, Mahe, napa okenn laport ki'n fermen.

Me malgre ki mannyer Lopoziyon pe koze, konmsi Gouvernman in ferm tou sa program. Mr Speaker, me la nou pa pou kapab zis koz lo sansibilizasyon, dyalog lo dyalog, ledikasyon lo ledikasyon.

I osi enportan ki sa bann dimoun, sa bann endividi ki dan sa sityasyon, e osi bann ki pe mazin fer sa semen i pran zot responsabilite, zwenn sa bann program, aprann ekoute, e leve pran sa konsey ki en dimoun pe donn zot, e sanz zot fason fer.

Mr Speaker, ozordi tou servis ki pe ganny donner kot adiksyon swa drog, swa lalkol i konsernen i *free*, napa nanryen ki ou pe peye tou bann servis ki pe ede tir bann dimoun dan adiksyon zot laport i ouver pou nenport dimoun, pou nenport laz, nenport krwayans politik, ou larelizyon.

Napa okenn *label* lo okenn laport, ni okenn *building*. Tou sa ki le antre dan sa laport kot i pou ganny sipor, kot i pou ganny led i a fer li avek zot *own free will*.

Mr Speaker, Gouvernman in siporte, e ankouraz fanmir ki'n leve, e pran zot manm fanmir a ker pou anmenn zot swa Sid Lafrik, swa *Ile Maurice*, swa Langleter, kot zot mwayen i permet pou zot al dan bann sant pou zot kapab tir zot zanfandan adiksyon.

Mon ti deza *Maurice* lo en *course*, mon ti zwenn avek trwa Seselwa ki *Terre Rouge* dan en sant kot zot ti pe sey rod zot gerizon.

Savedir i montre ou ki sa ki annan sa *willpower* i leve i fer sa zefor. Mr Speaker, bokou manm fanmir pa pe asize, e esper Gouvernman tir zot zanfandan adiksyon ozordi.

Bokou paran i leve, i pran zot responsabilite pou zot osi ed zot zanfandan. Savedir ler nou koz lo adiksyon nou pa kapab larg tou lo zepol Gouvernman, nou bezwen anmenn depi paran *on board* akoz zot osi zot zwe en rol.

Mr Speaker, mon konn landrwa travay ki ti menm pare pou sipor zot travayer ki ti'n tonm dan adiksyon, akoz zot ti war ki par en senp fot i ti

tonbe, e dan li i annan sa potansyel pou li releve.

Me ankor Mr Speaker, plis zefor i tonm lo sa endividi. Mr Speaker, i osi bon note ki bokou landrwa travay pe aksepte nou bann zenn ki ozordi zot pe montre sa lentere pou zot sorti dan adiksyon.

E pe ed zot avek en travay, bokou Seselwa la deor pe ede, kantmenm par en pti zournen zot pe anmas nou bann zenn ki'n tonbe pou en fason pou kapab ed zot releve, e re pran zot responsabilite.

Ankor mon pou dir ki sa i pou depan antyerman lo zot *willpower*.

MR DEPUTY SPEAKER

Ou 10 minit in arive Onorab.

HON DESHEILA BASTIENNE

Mr Speaker, ler mon lir sa Mosyon, mon'n ekout serten Manm Onorab, koze konmsi in vin avek en lentansyon pou blanm Gouvernman, ki i pa pe fer ase pou siport bann dimoun ki dan adiksyon.

E ki tou sa bann problemm adiksyon in komans anba Gouvernman *LDS*. Ankor Mr Speaker, sa Mosyon, sa ki fer mon soulaze se ki atraver ou Mr Speaker. Onorab Aglae, in aksepte ki i ti war sityasyon sa fleo boner depi lannen 2000.

Mr Speaker, sa Mosyon i ti pou byen ale. Me lafason ki

son prop Manm, atraver ou ankor Onorab Tamboo. Mr Speaker, in gat sa Mosyon tro bokou kot in profite pou fer en politik sal ranpli avek fo lakizasyon.

Apre ki mon'n evalye tou sa bann sipor ek led ki Gouvernman pe kontinyen fer apre sa salte drog ki in vini erite an Oktob 2020, ki swadizan anba *APDAR* dirize anba SS Herminie, kot i ti fer lo nou zenn mon vreman regrete ki mon pa pe vot pour sa Mosyon dan lafason ki in deroule. Mersi.

(APPLAUSE)

MR DEPUTY SPEAKER

Mersi Onorab. Mon ava demann bann Manm Lasanble, sa enn ki asiz o bor sa Manm ki pe al koze la, gete ki ler i komans koze, dir li letan son letan pe fini, mersi. Onorab Vidot, *you are next*, 10 minit la i 43 savedir ou dwatet fini 14 er 53 mersi.

HON AUDREY VIDOT

Mersi Mr Speaker. bonn apre midi Mr Speaker, tou Manm Onorab, tou dimoun ki a lekout. Mr Speaker, mon pou komans mon lentervansyon par kot en langazman Ladministrasyon *LDS* dan son *manifesto* ler i ti ganny elekte Oktob 2020.

E mon kot sa morso. “*We will start on a clean page with respect for the Rule of Law, for the Democratic Institutions that we have worked hard to bring into being with a commitment to justice and fairness. We will keep what is good and safeguard your rights and benefits.*” Fen sitasyon.

Mr Speaker, si *LDS* in bliye ki paz son komitman ek son promes mon a demann li retournen al regarde ki ti promet avek lepep Seselwa.

Akoz si zot in bliye, mon’n fer zot rapel pou zot al re gete. Mr Speaker, mon’n komans avek sa *quote*, enn nou’n war plizyer lensidan ki’n arive dan sa pei kot atraver sa langazman i *LDS* in fer avek pep Seselwa zot pa’n onore.

E atraver ou Mr Speaker, mon byen pou mon dir avek mon frer koleg Onorab Wavel Woodcock, i pa fer premye fwa atraver ou Mr Speaker, ki ler ou dan sa sez Onorab Woodcock, in fer bann tel lakizasyon, tel alegasyon, e mansonz anver mwan koman sa Manm dan *United Seychelles* ki swadizan i pe dir e siport dimoun ki fer trafik drog.

Rezon ki mwan Onorab Vidot, mon ti anmenn en kestyon dan sa Lasanble, se pou kestyon Ladministrasyon *LDS*, aköz ki ti deport en madanm ki zot ti al fer

lakizasyon konmkwa i fer trafik drog Sesel?

Akoz zot pa ti anmenn li devan sa menm lazistis, sa menm bann lenstitisyon ki zot in mansyonnen dan zot *manifesto LDS*? Zot ti pou fer pou anmenn ki sa madanm i ganny zize, i ganny kondannen, parey tou lezot dimoun ki’n fer tranzaksyon drog dan sa pei.

Akoz ou ti deport li? Aköz ou ti pe per ki si a mansyonnen serten dimoun, ki ou konn tre byen pangar i mansyonnen zot non? Aköz zot ti ganny deporte?

Mr Speaker, non, fer fason pli byen dapre zot, se deport en *drug dealer*, aköz i ti *girlfriend* garson entel, prezan i bezwen servi resours Lepep Leta pou li kapab deport li.

Mr Speaker, ler Onorab Woodcock, i anvi manz son bannann la, fer sel pran tou ek son lapo tou zet laba menm kot li, aköz lo mon lapo i pou glise.

Mr Speaker, atraver ou mon bezwen demann sa kestyon avan ler mon antre direk lo sa Mosyon. Kote Onorab Gervais Henrie, *MNA* elekte pou Mont Buxton ti ete ler i ti pe priye *above politics*, ler 6enm Lasanble dan tou sa pti problem ki ti annan ti larg lo ledo Prezidan Danny Faure?

Ler sa menm Onorab, ek son bann koleg lo lot kote

latab, ki annan zot ki ankor la ti pe dir “sistenm 43an pa bon, sistenm i annan problem.” La zot pa ti war lekel ki ti pe zwe *blame game*? Eski zot in bliye?

Be si zot, zot in bliye nou dan *United Seychelles* nou pa bliye, *blame game* ti komans avek zot. E Mr Speaker, mon pa sirprann pou lafason sa de enterven an avan mwan, e mon pa ni pou sirprann en bann ki pou koz apre mwan, kwa ki zot pou al dir.

Akoz sa pti moman letan dan *lunch break* ler mon’n pas dan koridor, mon konnen lekel ki’n fini donn zot direktiv kwa ki zot pou vin dir, dan sa peron pou mont anler la pou al kot dan direksyon biro Speaker, mon’n fini war lekel mon pa sirprann.

I konfirm parol mon koleg Onorab Loze, kot i ti dir i annan de Sekreter Zeneral, enn ki lo papye, apre enn ki ankor pe dir donn direktiv deryer rido.

Mr Speaker, mon ava prezan vin lo lentervansyon lo sa Mosyon. Mr Speaker, Mosyon ki devan nou Lasanble pe fer trwa pwen enportan.

Met an plas en program rehabilitasyon konpreansiv, si mon memwar i byen depi lepok Ladministrasyon US negosyasyon, sipor finansyel ti ganny rode pou fer en sant rehabilitasyon.

Me ler Seselwa in vot pou sanzman pou fer pli byen, ziska ozordi mazorite bann viktim espesyalman bann paran ki lespwar ti sitan o, ti pe espere pou zot war en sipor vin anver zot pou donn lanmen tyonbo zot lanmen pou ki zot kapab fer fas avek defi ki swa enn zot pros ki annan lafors ek kouraz pou travay kapab ganny serten sipor pou li kapab re debout ankor, e pou li kapab kontribye dan sa lekonomi pei.

Ankor pep Seselwa pou ganny en sans pou zot zize. Lekel ki ti vreman annan pep sa group dimoun a ker? Lekel vreman ki ti konpran zot soufrans ler zo ti pe plennyen? Zot ti war poudir zot ti bezwen dan sipor.

Dezyenmman, ede tir nou lafors travayer zenn dan adiksyon. Mr Speaker, mon bann koleg lo sa kote latab in fer sorti kler, adiksyon i en maladi, i bezwen ganny son tretman, i bezwen ganny son konsiltasyon, son rehabilitasyon.

Ki mannyer i pou kapab program li, ed li pour li kapab cope, e leve al debourye al travay, e kontribye dan lekonomi pei, parey tou lezot son bann frer ek ser ozordi ki dan en lanplwa ki’n nobou kapab sekiriz en lanplwa in nobou kapab leve debourye.

Pa bliye *LDS* dan zot *manifesto*, zot ti dir zot pa pou kit okenn zanfan Sesel deryer. Me atraver zot bann sanzman radikal i annan en kantite keksoz ki zot in fer, ki zot in kas bann bon program ki ti ed bokou sa bann zenn.

Bokou sa bann fanmir ki ti kapab ganny soulaze, kot zot zanfan oubyen enn zot pros ti kapab al leve debourye an menm tan i ti pe antre lo son program.

Me i ti annan lespwar ankor ki i ti pe esper zis sa bout reabilitasyon, pou li kapab ed li ankor an plis. Malerezman *LDS* son fason fer pli byen se detri tou.

Prezan zot vin dir nou *blame game*? Be zot ki'n komanse, se zot ki'n fer ler ou mal ou bezwen aksepte. Mr Speaker, soulaz fanmir Seselwa.

Ou konnen depi 2 semenn pase dan sa Lasanble Nasyonal, nou'n vwar tou sort kalite Mosyon sorti kot en ladministrasyon, en parti ki sorti anba- pe siport en ladministrasyon responsab.

Zot in vin avek en bann Mosyon ki target ki swa zot oponan politik, rod tou fason pou sey denigre oubyen rod tou tirayman avek zot kolez isi lo sa kote latab.

Zot in rod tou fason pou sey apiy sa dernyen pti bout difil pou sey rod sekour avan

le 27 Septanm. Dapre zot, zot krwar poudir sa ban kalite Mosyon i pou ed zot tenir lanmenm.

Mon pa pe war zot mwan. Ou konnen aköz zot pa pou tenir lanmenm? Aköz pep Seselwa, pep Seselwa i konnen lekel group dimoun ki'n akote zot diran sa 4 an 10 mwan.

Pep Seselwa i konnen lekel bann ki'n la pou ekout zot, ki'n la pou donn zot sa sipor moral, ki'n la pou konsey zot tou dilon sa 4 an 10 mwan.

E zot konnen lekel group dimoun ki koz pou zot. se pou sa rezon ki ou war Septanm ki pe vini la le 27, Seselwa i konnen poudir *United Seychelles* i sel opsyon pour Sesel. *United Seychelles* i sa group dimoun, bann dirizan ki annan lentere pou ekout konsern son pep.

E se pou sa rezon ki mon pou felisit mon kolez Onorab Uranie, pou anmenn sa Mosyon devan nou Lasanble, aköz Onorab Uranie, in fer sir ki li in *raise above politics*, in fer sir ki'n vin anmenn en Mosyon ki dan lentere pep Seselwa.

Mwan zot kapab gele, plennyen lot kote si zot anvi. Me selman larealite, e laverite i la. E se pou sa rezon ki mwan Audrey Vidot, mon pou siport Onorab Uranie, avek sa Mosyon aköz mwan osi dan mon distrik mon annan zenn

ki pe fer fas avek bokou difikilte, e ki pe rod sa sipor, e sa lankourazman pour ki zot kapab ganny le nesaser pou zot kapab leve debourye, sonny zot fanmir, e kontribye dan zot lakour. Mersi Mr Speaker.

(APPLAUSE)

MR DEPUTY SPEAKER

Dan *lunch break* mon ti la dan peron, e mon ti pe koz avek Onorab Arissol, Phillip Arissol. Onorab Georges Romain, e Onorab Sathya Naidu, tou le 3 sa Manm pa lo lalis ki pe al koze apre midi.

Mwan mon pa bezwen pran lord avek personn pou dir mwan e ki mon pou koze avek lo *precinct* Lasanble Nasyonal.

Dezyenmman, pou bann Manm Lasanble, droger dan nou kominote, droger ki swa sa ki servi, sa ki vann, sa ki fer *whatever* i pas zot letan zour tou politisyen.

Ki ou rouz, ki ou ble zot pa le nou pou en sou. Selman ou konnen ki nou pe fer la anndan nou? Nou pe lager ek kanmarad aköz droger, nou merit pe koz avek en sel lavwa pe dir avek lotorite *deal* avek sa bann boug ki pe enport drog, ki pe afekte nou kominote, tou le de.

(Interruptions)

MR DEPUTY SPEAKER

What I'm saying pou tou le de kote lataab. *Because mon'n koz avek zot bomaten lo sa size, guys drugs is killing this country, it's killing this country.*

So annou pa donn zot rezon pou zot kontinyen epanouir, en zot legoizm pe touy nou lazenes bann dimoun ki dan drog, zot legoizm pe touy nou lazenes. Prosen enterven an 10 minit se Onorab Hoareau.

HON JOHN HOAREAU

Mersi Mr Speaker, bonn apre midi Mr Speaker, bonn apre midi tou Manm, e tou dimoun ki pe ekoute. Mr Speaker, sa probleman ki nou pe koz lo la i pa fer premye fwa nou koz lo la dan sa Lasanble.

Premyerman, i annan de Manm lo nou kote lataab ki'n anmenn Mosyon Onorab Desheila Bastienne, e Onorab Andy Labonte, ki'n anmenn Mosyon ki koz lo sa size adiksyon drog, e fason pou ed sa kominote oubyen sa group dimoun ki nou apel zot bann toksikomann, zot in adikt avek sibstans.

Alor mon pa pou tro bokou, mon pa pou gaspiy tro bokou letan pou repet bokou keksoz ki'n ganny dir. Me selman i nesaser pou met detrwa keksoz an perspektiv.

Premyerman, lo sa size URS ki'n ganny fer resorti an plizyer repriz lo lot kote latatab. URS ti en *scheme* ki ti annan en peyman ki ti ganny donnen avek sa bann dimoun R5,500.

E ti annan ki ti pe travay *half day*, ti annan ki ti pe travay *full day*, e ti annan en pes dezord konplet ti napa *monitoring*, ti napa okenn sirveyans lo sa bann dimoun si vreman zot ti pe fer sa travay oubyen zot pa ti pe fer sa travay.

Alor i ti zis en *burden lo tax payers money*, e nou Gouvernman in deside pou retir sa bann keksoz dan nou sistenm ki ti pe zis *bleed the system*.

Dezyenmman Mr Speaker, ler nou get fason ki serten Manm lo lot kote latatab in koze, mon zwenn ou ler ou'n demande pou ki nou *rise above petty politics*.

E annou aret maltret kanmarad, nou'n vwar lot kote latatab ki en Onorab, in menm maltret nou lo sa kote latatab koman karya. Eski sa i en fason pou nou edik nou bann zenn, edik nou dimoun deor la ki pe ekout nou?

Mr Speaker, in osi ganny fer resorti ki "petet ti devret annan en lazans spesyal pou *deal* avek sa bann problemm reabilitasyon, e tretman pou drog."

Sa ti ganny fer par Onorab Aglae, me selman nou konnen nou menm poudir avan ti annan en lazans spesyal ki ti pe *deal* ek sa, ki ti annan li en *board* par lao 20 dimoun. E an plis ki sa Minis Lasante ti deside ki sa lorganizasyon i devret retourn anba lasante, aköz i en problemm lasante. Adiksyon i en problemm lasante parey Onorab, ki'n koz avan mwan in fer resorti.

En problemm lasante ou bezwen *deal* avek li anba en kad lasante, e i fer bokou plis sans ler nou ti pe re get fason ki nou lekonmi i fonksyonnen pou nou zer nou resours pli byen, ki bann fonksyon sa lorganizasyon i ti ganny donnen anba Minister Lasante. Sa in fer ki nou maksimiz nou resours, e nou servi pli byen sa pti morso larzan ki nou annan.

Mr Speaker, parey in ganny fer resorti, sa problemm adiksyon drog, e son bann tretman reabilitasyon i enn ki enportan parski ler *Afrobarometer* ti fer sa *survey* isi Sesel dimoun li menm ti dir poudir i devret en priyorite.

Dezyenm plas priyorite dan gouvrenans pei aköz apre lekonmi, aköz lenportans ki annan lo lekonmi li menm lo laklas travayer, lo dimoun ki pe travay, lo la kantite mende ki annan dan pei, e lo la

kantite *burden* ki pe mete lo nou sistenm lasante.

E ler nou pe koz lo nou sistenm lasante, nou vwar ki ozordi i fer lapenn pou vwar ki nou pe deal avek en dezyenm zenerasyon adiksyon, seta dir bann zanfann bann baba ki'n ne avek drog dan zot disan.

E ozordi zot in ariv 18 an, e zot osi zot pe soufer avek bann problemn mantal, zot pe soufer avek bann lezot problemn ankor *hepatic* ki kout bokou larzan pou nou trete dan nou sistenm lasante.

In menm dir kot par lao \$500 par semenn pou sov lavi sa bann dimoun ki ganny *hepatic C*, e ler zot in ariv en staz avanse.

Mr Speaker, tousala i kre en lenpak lo nou lekonmi, i kre en lenpak lo nou sistenm lasante, e i kre en lenpak lo nou kominote ki nou pe viv ladan.

Alor Mr Speaker, ozordi zour ler nou pe koz lakantite dimoun ki bann toksikomann, nou vwar poudir nou'n ganny sif poudir i annan apepre 4,800 ki'n ganny anrezistre, e sa dan li menm i apepre 4.8poursan nou popilasyon.

E i annan letid ki'n ganny fer ki dir i kapab mont ziska a 10poursan son vre sif, menm si sa bann ki reste pa ankor anrezistre.

Vedir tou sa bann dimoun preski 10poursan

bann dimoun ant 13 an a 74an parey in ganny dir oparavan avek par prezantater Mosyon, ki pe servi sa bann sibstans i pe anmenn en keksoz kim koman ou kapab dir sa? I pe anmenn e fardo lo pei li menm. Akoz ler nou pe get Bidze ki Gouvernman in vote pou fer tretman, pou donn bann soutyen avek sa bann dimoun an 2023, ti 46,138,000 an 2024 ti 48,422,000 e an 2025 in vin R51,269,000.

Alor i montre ou ki kantite larzan ki pe ganny mete ladan, i annan bokou dimoun deor ler ou koz ek zot, zot ankoler. Zot dir ou koumsa poudir "sa larzan ti ava pli byen ganny zere dan lasante, oubyen dan ledikasyon, oubyen dan lezot sekter lekonmi pei."

Me selman nou annan en leker pou sa group dimoun, nou annan en leker pou zot akoz nou konnen poudir *once* ki ou'n antre ladan i difisil sorti, e ou bezwen tretman, e ler ou'n vin en adikt i vin en problemn medikal.

E se pou se la rezon ki anba gidans *UNDP*, e bann lezot lorganizasyon pou lasante i demande, i egzerse ki nou met serten resours pou nou kapab tret sa bann dimoun ki adikt.

Mr Speaker, Mosyon pe demann en striktir

konpreansiv. Be ler nou gete eski napa en striktir konpreansiv? Mon pa pou dir poudir sa striktir i fek komanse 2020.

In komanse avan, me i annan en kantite keksoz ki ti bon ki nou'n kite, sa ki pa bon nou'n tire. E la nou kapab dir i annan en striktir konpreansiv.

Parski ler mon'n get rapor *DSAPTR* 2023, mon vwar poudir tretman ek reabilitasyon i ganny donnen. *Harm reduction* pou *detox* pou lo *threshold methadone management*, pou *exchange of needle programme*, tousala i ganny donnen.

Nou vwar poudir *psychosocial unit* i prezan, nou'n vwar poudir *prevention education* i prezan, nou'n vwar poudir i annan *evaluation monitoring and quality assurance*.

Alor mon demann mon lekor, ki kwa an plis ki loter Mosyon ti ava anvi nou annan? Mr Speaker, mwan mon krwar poudir petet parey in ganny sizere avan par Onorab Woodcock, se ki loter Mosyon ti devret modifye son Mosyon, e demann Gouvernman pou kontinyen amelyor striktir, sa bann striktir ki deza an egzistans pou kapab donn en pli bon servis petet.

Mr Speaker, mwan mon krwar poudir ozordi nou pe kontinyen koz lo menm size ki nou'n koz plizyer fwa, me selman i vre ki nou Gouvernman in ekoute, e in pran bokou keksoz an menm.

Ozordi zour nou kapab di poudir nou Gouvernman in negosye pou ganny larzan pou en sant reabilitasyon. E en lokasyon provizwar ti'n ganny mete Larivyer Anglez, vi ki demann pou sa sorti kot sa bann bayer de fon, oubyen bann dimoun ki pe *provide* sa bann *funding*, i dir ki sa sant i bezwen o bor en sant lasante.

Akoz i kapab annan bokou reperkisyon ki neser *immediate* response kot en klinik, kot en sant lasante. Alor Mr Speaker, mwan mon krwar poudir mon pa pou vot pour sa Mosyon aköz i pa pe *ascertain* poudir i annan bokou keksoz ki'n ganny fer.

I pe zis anmenn serten kritik atraver serten Manm ki'n koze. Alor mwan mon pou dir “Kit li lanmenm, e *no turning back!*”

(APPLAUSE)

MR DEPUTY SPEAKER

Prosen enterven an Dirizan Lopoziyon.

HON SEBASTIEN PILLAY

Mersi bokou Mr Speaker. bonn apre midi tou koleg Onorab, e

bonn apre midi tou dimoun ki pe swiv sa deba dan Lasanble. mon'n ganny loportinite pou kapab *between* lazournen pou ekout diferan entervenans ler zot in koze lo sa Mosyon, ki'n ganny mete devan Lasanble.

E la nou'n atann bann prezantasyon ki'n ganny fer par bann Manm lo lot kote latab, e bann largiman ki'n ganny avanse, e mon bezwen demann zot en kestyon tre senp.

Eski zot, zot marse dan zot distrik? Eski zot, eski zot koz ek dimoun dan zot distrik? Eski oule dir mwan senserman, eski senserman zot oule fer Seselwa la deor krwar poudir Gouvernman i an kontrol sa problem reabilitasyon, e drog, e Gouvernman pe fer progre, progre sibstansyel an se ki konserne sa problem reabilitasyon ek drog?

I mean si zot pe mwan sa *then, mes amis* zot annan en kondisyon serye. Akoz ler nou regard tou statistik ki ganny prezante avek nou ozordi nou annan la probableman 14poursan nou popilasyon ki lo en adiksyon, oubyen labi sibstans dan en fason ou en lot, 14poursan.

Now si nou servi en matematik senp, dan sa 14poursan ki reprezant apepre 14,000 dimoun ladan nou prezimen ler nou kalkile

80poursan i bann zenn, 80poursan i bann zenn.

Savedir en pe plis ki 10,000 si pa plis nou bann zenn. E zot le dir ek mwan poudir en Mosyon ki demann enn Gouvernman pou met en plan konpreansiv, zot pou konsantre lo bann pwent politik ki'n ganny fer, e non pa regard merit ki sa Mosyon i prezante, e loportinite ki sa Mosyon pe donn Lasanble Nasyonal.

Pou vin ansanm, e lans en lapel ek Gouvernman pou pran en aksyon konkret. E sa ki nou pou fer apre midi se ki nou pou fer en deba.

E mon'n antann Speaker, dan Chair, dir poudir bann droger i zour nou tou. Be zisteman si bann droger i zour nou tou, akoz ou pa fer en lapel avek ou kote latab pou zwenn avek nou, e siport sa Mosyon?

Oubyen zis ou pe *grandstand* devan piblik ozordi, e pou fer krwar poudir sa i pozisyon ki zot le pran oubyen nou pou le pas pou pli bon boug.

Ou konnen bomaten nou ti ganny en Mosyon, nou ti ganny sa ki zot pa rapel nou ti ganny dir, "vwala en ledikasyon dan kwa ki Lasanble i bezwen fer, e kwa ki en mazorite i bezwen fer, e kwa ki en lopozisyon i bezwen fer."

Me ler mon'n regard dann bann Mosyon ki nou'n aprouve dan sa Lasanble i paret mwan a sak fwa ki *LDS*, en Manm *LDS* in anmenn en Mosyon, e la mon pou vin pou Onorab Bastienne, li menm li.

Son Mosyon ler ti pase par egzantp pour Onorab John Hoareau, par egzantp ti pas avek 20 vwa, *meaning* bann Manm *US* ti vot an faver ek son Mosyon.

Pour Onorab Bastienne, ti koz lo en *Juvenile Centre*, ti annan 20 pour, ti napa personn kont ti napa abstansyon. Pour Onorab Andy Labonte, ti annan 22. Onorab Henrie, pour Onorab Esparon, ki ti koz lo Polisi kler Reviz Lalwa kot i protez bann travayer ganny agrese ti pas par 29.

Konmsi ki mannyer sa bann Manm ki la ler zot, zot in solisit nou sipor, nou nou'n pare pou donn zot, zot sipor nou sipor. Me selman ler nou, ler nou, nou solisit zot sipor zot bezwen tour en *party line*, *hard line*, e pa kapab kas zot *party line*.

E la Onorab Esparon, mon dezapwente ek ou, aköz si annan en Manm dan sa Lasanble ki nou'n siport preski tou Mosyon ki ou'n anmenn se ou, *ok*.

Non, mon dir ou mon dezapwente ek ou, mon dezapwente ek ou Onorab.

Aküz si annan en Manm ki nou nou'n siport tou Mosyon dan sa Lasanble se ou.

(Interruptions)

HON SEBASTIEN PILLAY

Ou a koze taler ou a dir sa ki ou annan pou ou dir. Onorab Hoareau. Mr Speaker,

(Interruptions)

HON SEBASTIEN PILLAY

Taler ou a koze, taler ou a koze. Onorab Hoareau, Onorab Hoareau, nou'n siport ou Mosyon e ou ti kapab annan sa grander lespri ozordi apre midi pou ou kapab siport sa Mosyon.

Me ou konnen ki zot problenm zot? Zot problenm se ki, zot pa kapab i enposib pou zot kapab tir politik, e konsantre lo lesansyel ki devan zot.

E zot la, zot gognarde, zot fer gou, zot riye aköz i gou, zot dan mazorite fer li. *Ok*, si en dimoun i mal pronons propriyete zot bezwen fer komanter lo la.

Parkont, parkont ler en dimoun i dir la sanpye nou pa fer komanter lo la. *Ok*, konmsi mon pa ganny en, sa ki mon ti a kontan konpran se, eski Seselwa in donn zot en mazorite pou vin fer komedi, e *show* dan Lasanble?

Komedi e *show* kan i annan dimoun ki pe mor ek adiksyon, i annan dimoun ki pe agres dimoun akòz adiksyon, ou annan dimoun ki pe vol dimoun akòz adiksyon.

Me selman nou pa kapab vin ansanm kantmenm nou dir poudir tou droger pe zour nou, pou nou dir en keksoz, “lala sa pa pe ganny fer, sa pa pe ganny fer, annou *deal* avek? Fodre tou toultan, toultan nou pe dir tou keksoz i byen, tou keksoz i byen. Me ou konnen ki sa i remind mwan Mr Speaker? I *remind* mwan bann Lasanble ki manner Onorab Loze ti dir sa?

SPPF ki zot ti dir in fatigue, kot ler zot ti dan *pickup* deryer zot ti dir sa bann Manm Lasanble *SPPF* i zis tonm dakor ek zot Gouvernman, zot in vin egzakteman parey.

Egzakteman parey e zot ti dir tousala i mal pou fer tousala pa devret fer, zot, zot pou en Lasanble ki defann lentere lepep e ozordi ki zot fer? Zot vin la e Onorab Georges in dir bomaten atraver ou Mr Speaker, zot, zot la pou defann Gouvernman, zot la pou defann Seselwa ki'n met zot la, zot la pou defann Gouvernman.

Be annou met tou konsiderasyon politik 2 kote annou regard sa ki annan

devan nou ozordi. Ti annan en plan pou annan en *rehabilitation village* konplet, ki ti ganny *funded* par UAE. E Onorab Georges ti lo *Board APDAR* ansanm ek mwan e i okouran e nou ti al miting e nou ti koz lo tousala.

Fast forward 2020, tou sa bann plan i ganny *scrapped* akòz nou annan problemm personnel avek en dimoun. Me kwa ki pli sagrin mwan, yer mon ti ganny en *call* avek sa dimoun, avek bann dimoun ki pe travay lo sa proze Laferm Lespwar pou dir nou poudir nou'n ganny lenvitasyon nou 2 Onorab Aglae si nou pe *attend*.

E mon ti'n konfirman, e la ozordi apre midi mon tann poudir sa i en linisyativ *LDS*. Selman lo lenvitasyon i dir poudir sa i en linisyativ Dyosez Katolik avek en lot lorganizasyon me atraver ou Onorab Woodcock nou kapab al lo verbatim in koz lo ki manner sa i en linisyativ *LDS*.

Mon ti a kontan demann sa bann dimoun eski zot pe fer mwan vin en aktivite politik? Pou vin glorifye en dimoun politikman? Non, be non mon bezwen demande akòz zot pa kapab, zot pa kapab toultan *get away* avek sa ki zot anvi dan sa pei e personn pa kapab dir zot naryen, e zot pa kapab vin pran laglwar al travay zot kanmarad kan pa zot ki'n delivre pa zot ki'n fer.

Nou bezwen *face* la realite an fas, sa Mosyon in vin devan Lasanble akòz i annan en nesesite e ti ava meyer ki nou sipòt li. *Now*, si zot ti oule amann sa Mosyon zot ti ava propoz zot lamannman i ti la parey zot dir nou toultan, swa nou, nou pares nou pa oule travay be la mon pou dir zot, zot in pares zot pa oule travay.

Now, mon napa letan pou no fer politik bon marse lo en keksoz ki pe afekte nou e Lasanble pe al fini. So, nou ti ava ganny loportinite pou nou zwenn kanmarad e dir be lala avek en sel lavwa nou dir be lala i bezwen ganny fer.

Me Mr Speaker, me an konklizyon senp konklizyon ki nou annan pa ni bezwen fer politik. Seselwa la deor i war pou li menm ki degre *successful*, ki degre marse sa bann program *DSAPTR* pe marse, bann ki lo adiksyon i pou war. Bann program ki'n ganny montre ki mannyer ti annan bann landrwa bann *halfway*, bann *shelter* ki ti annan bann diferan program tousala in preski i non egzistan.

Ozordi zot in koz nou *care* kan zot menm zot, zot ti koup larzan ki Gouvernman i donn *CARE*, ozordi zot vin koz nou lezot travay ki pe ganny fer kan zot menm zot ki ti koup larzan e apre zot dir nou zot ti pe al fer *MAT Klinik English*

River nou pa konnen ki'n arive.

Konmsi sel baz ki zot annan ti annan labi, labi, labi, labi, labi e ozordi labi i ron zot e naryen zot pa fer *about it*. So, Mr Speaker, mon i tre senp, Mosyon in ganny anmennen par en Manm lo sa kote latab e sel rezon sa Mosyon pa pe ganny sipòte se akòz i en Manm *US* ki'n anmennen. E Lasanble ozordi apre midi pa kapab separ son lekor *from* sa kote latab ki nou pou reprezante pou nou vwar sa ki byen dan sa Mosyon.

Mon par kont mon pou sipòt sa Mosyon akòz mo krwar i neseser pou annan sa deba, i pli byen annan en deba lo sa Mosyon i en deba lo *Maison Du Peuple*. I pli byen annan en deba lo sa Mosyon ki en Mosyon pou al rod Komite pou al gete lekel Manm ki pa'n deklar *asset*. Akòz sa i tous apepre 14 mil Seselwa la deor e zot fanmir, zot paran zot zanmi.

E si nou oule krwar poudir nou kontinyen zwe politik ek sa size ek sa *workforce* ki nou annan pou kontinyen ogmante, mon pa konnen mwan, ou riye Onorab Bastienne, i byen ou riye akòz Perseverance napa problem drog. I parey mwan poudir ou pa enterese ek Perseverance napa problem drog e sa nou konpran sa, nou konpran akòz

ou pa dakor, ou pa oule ede dimoun Perseverance i ok. Napa problem.

MR DEPUTY SPEAKER

Your time is up Onorab.

HON SEBASTIEN PILLAY

So, mwan mon pou siport sa Mosyon. Mon remersi ou Mr Speaker, pou ou latansyon. Mon konsernen *about* sa *statement* ki Onorab Vidot in fer zafer pe donn lenstriksyon dan peron.

Me ou'n eksplike so nou ava krwar ou, nou ava krwar sa ki ou, ou'n dir nou. An relasyon ek sa ki'n pase dan peron. Mersi Mr Speaker.

MR DEPUTY SPEAKER

Sa ki mon oule dir aköz ou'n dir en keksoz ki mwan mon'n dir. *I think it's unfair* en komantr ki ou'n fer vizavi ler mon dir droger i zour tou dimoun. Aköz i dan en konteks ki mon ti dir, bomaten deba in komans byen.

Mon'n felisit Onorab Uranie, par lapros ki in pran, me 2 ou Manm komansan par Onorab Larsen, apre anplifye par Onorab Tamboo e apre li mon ti koze poudir drog i en keksoz ki afekte kominote ki nou an Manm la anndan nou sorti e nou reprezante. E alor annou tir nou an konsiderasyon politik *rise above* e annou adres sa size

nasyonal ki pe afekte nou nasyon.

Sa ti ganny dir bomaten e la apre midi mon ti pe sey anplifye ankor poudir ek zot be annou arete, politiz sa zize e poudir i ou laverite ou pa'n ede ou'n fer keksoz en pe pli pir ankor.

Donk, mon pou repet lapel, i reste detrwa Manm pou koze, *let's get back to the essential of the motion* parey *Order 59* i demann nou pou reste *on the specificity of* ki Mosyon pe demande, Onorab Esparon mon vwar ou lanmen anler.

HON REGINA ESPARON

Mr Speaker, mon pe demann en *point of order* parske Onorab LOTO in nonm mon non i dir i dezapwente ek mwan.

Mon zis anvi fer li konnen poudir mon pa anba son dominasyon mwan dan sa Lasanble. *Ok*, mon pa pran lord avek li mwan, mon ti ganny elekte Glacis mon ki ti al lo poto elektrik pa li. Alor mon pa vin pran lord ek li...

(APPLAUSE)

HON REGINA ESPARON

...alor pa *cross* mon *line* parski zanmen mon'n *cross* son *line* mwan. Mersi. Reste dan ou *lane*.

MR DEPUTY SPEAKER

Pwen note Onorab parske ou non in ganny mansyonnen ou'n klarifye sa. Pou annan, ki pwen Onorab?

HON SEBASTIEN PILLAY

Mon annan en *matter of privilege* ki'n arise la. Pa konsern sa ki Onorab Esparon in dir.

I *ok* pou ou e mon ti a kontan ganny konpran ek ou, i parey mwan ler ou dan Sez i *ok* pou ou fer komantr lo bann Manm lo mon kote latab, napa problem sa. Me selman ou *fail* konpletman pou zanmen mansyonnen okenn non lo ou kote latab.

Par egzanp ou'n dir mwan 2 Manm lo mon kote latab e menm mwan mon pa'n ede. I byen, koman Speaker ou annan drwa, tou drwa pou fer ou komantr. Be mwan mon asize mon'n ekout Onorab Woodcock mwan, so i osi i pa'n ede, akòz ki ou bezwen swazir toultan pou lavans ou pozisyon toultan lo nou kote e zanmen pare pou mansyonnen lot kote?

Mon ti ava ekspekte poudir ou osi ou fer ladan, sa i zis ou fason fer *so it's up to you* pou deside ki mannyer ou fer li. Mersi.

MR DEPUTY SPEAKER

Ok, Onorab, bomaten lo lalis depi 11er letan Onorab Uranie

i komans koze ziska midi edmi letan Onorab Aglae i fini koze, se zis bann Manm US ki ti koze, zis bann Manm US e si deba bann in al dan en direksyon se zot ki'n anmennen.

Akoz enn fwa ki en parol i ganny dir, in fini vin *part of the debate* e *it's ok for another member to respond* e *this is what* mon ti *warn* nou Lasanble bomaten, mon ti dir zot pa al dan sa direksyon akòz zot pe ouver en laport. Be solman kot nou pa ankòr perdi sa deba la, annou rebran, annou redres bato.

Mwan mon pe get Onorab Uranie depi bomaten MNA konmsi son Mosyon i annan merit, i annan en kantite merit dan sa Mosyon *let's get back to* sa ki Mosyon pe demande.

Onorab Labonte ou ava Manm ki ava entervenir la avan ki nou *adjourn*, apre zot ava al bwar en tas kafe konmsi zot ava kalme en pti pe nou a retournen silvouple kit li annord. Mersi.

HON ANDY LABONTE

Mersi Mr Speaker. Mr Speaker, pou mwan ler mon pe get sa Mosyon ki'n anmennen par Onorab Uranie i senpleman parey ou'n dir i en keksoz pou mwan i pros avek mon leker, ou konnen plizyer fwa mon'n koz lo drog, labi

sibstans an zeneral drog, lalkol.

E mwan mon en zenn Onorab ki'n toultan travay avek sa bann dimoun ki lo labi sibstans e mon'n toultan pare pou ed zot. E ler mon tann Onorab Tamboo avek Larsen koze Mr Speaker, zis en keksoz mon'n anvi demann mon lekor konmsi kot zot ti ete pandan sa bann letan ki nou, nou ti pe diskit lo drog avek lalkol? Eski zot ti tande oubyen eski zot ganny akse avek *verbatim* ki zot retournen pou zot kapab lir lo la?

E en lot keksoz ankor mon ti a kontan demande Mr Speaker, ler mon'n tann Onorab Sebastien Pillay osi fer son lentervansyon mon zis demande le 30 Mars 2022 ki ti fer? Petet mon pa konnen si mon bezwen demann 5 minit dan letan pou li repet- pou li dir mwan kot i ti ete, aköz zot tou, zot tou lo sa kote zot ti *walk out*, zot pa ti siport sa Mosyon ki mon ti anmennen.

E non Mosyon ti ganny demande Mr Speaker, mon Mosyon ti ganny demande:

- Prenon kont restriktirasyon kot *APDAR* in prezant- prenon kont restriktirasyon kot *APDAR* in prezan vin *DSAPTR* en divizyon anba Minister Lasante, sa Lasanble i demann Gouvernman pou revwar son Polisi e stratezi lo

reabilitasyon e tretman program pou lit kont labi sibstans.

Mr Speaker, sa ti anmennen le 30 Mars 2022, e personn lo lot kote pa ti siport sa Mosyon, zot tou zot ti *walk out*. Pou la senp rezon aköz i montre ou poudir zot pa ti pe siporte bann endividi ki lo labi sibstans. I montre ou ipokrizi dan son totalite Mr Speaker.

La parey zot toultan dir, 2 zour avan eleksyon zot deside pou zot fer krwar poudir zot an faver, aköz zot bezwen vot sa bann zenn. Mr Speaker, i nepli ler pou fer nou bann zenn krwar dan zot aköz nou zenn pa krwar dan zot.

E nou lo sa kote latab nou'n toultan kontinyen siporte, nou'n siporte wi, nou pa siport drog, nou pa siport drog si oule nou pa siport droger, me selman nou konnen pou siport sa bann endividi ki vin en viktim pou toultan siport zot dan toutsort fason.

Mr Speaker, pou mwan ler mon lir ankor sa Mosyon anmennen par Onorab Uranie, vre ler in fer son lentervansyon bomaten ti fantastik son lentervansyon. Aköz i montre ou poudir i annan serten senserite dan sa ki i pe demande, me par kont tou sa ki'n pran laparol apre sa, in montre ou pirman ki zot pe sey fer, zot pe sey fer krwar avek

Lepep Seselwa poudir nou Ladministrasyon pa pe siporte e in kennsel tou.

Ki zot al koze, lo *URS*. Be les mwan dir zot en keksoz Mr Speaker, bokou sa bann zenn ki ti lo *URS* i dir mwan ozordi parey Onorab Woodcock in fer resorti, zot, zot pe dir sa bann zenn al netway bin non, sa bann zenn ozordi zot dan en lanplwa formel, i montre ou poudir zot annan serten kapabilite e zot kapab travay zot pare pou zot kontribye otan ki zot ganny sipor.

E se sa ki nou anvi montre nou zenn, nou anvi montre zot poudir wi, nou Gouvernman pou siport zot me zot osi zot bezwen siport zot lekor. Akoz ou pa kapab anmenn e bef o bor delo- o bor larivyer me selman si i pa oule bwar delo ou pou fors li, petet zot annan en fason pou fer li mon pa konnen Mr Speaker, ou konpran?

I kler, i kler, akoz zis mon demande, dir mwan kwa ki'n ganny kennsel? Sa kantite larzan ki pe ganny donner anba *DSAPTR ok*, i annan en sant ki Prezidan in pronons son lekor ki pou ganny konstrir. Mon ti a voudre zot vin avek keksoz konkret direkteman dir ek nou kwa ki zot ti a swete ki nou fer an plis petet nou ti a war poudir vre zot annan en vizyon, en stratezi.

Nou ti annan en gro *SS* ki ti ansarz drog, Mr Speaker, ki ti arive, i ti pram sa- en *jeep* dapre konpran ki ti saroye ladan? Manze koson.

(laughter)

HON ANDY LABONTE

Zis mon - konmsi zis Mr Speaker, montre nou kwa ki senser dan zot parol? Monte nou. Mr Speaker, i annan enn ankor i oule vin koz dizef R1, be i groser dizef sa Mr Speaker?

(laughter)

HON ANDY LABONTE

Konmsi par ler ou demande si vreman ki nou senser oubyen nou pare zis vini, viktimiz dimoun e zot anvi kontinyen fer sa. E mwan mon pou kontinyen dir la parey ou yonyont laba, ou pa'n zanmen mont anler lo en poto elektrik e ou pa pou zanmen gannyen en eleksyon.

MR DEPUTY SPEAKER

Onorab!

HON ANDY LABONTE

E mwan Andy Labonte la. Mon'n mont ankor lo poto.

MR DEPUTY SPEAKER

Onorab Labonte! Onorab Labonte! Onorab Labonte! *Hold on, hold on. Address the*

Chair and get back on the Motion, listen, wi, wi.

(comments off-mic)

HON ANDY LABONTE

Si Onorab Loze sak fwa i tann...

MR DEPUTY SPEAKER

Non, non, non! Mon pe koze, mon pe koze! Onorab! *Don't let anyone get to you* isi anndan. Yer mon'n fer demann ou si ou pa lapo, mon ti pas o bor ou mon tap ou lo ou zepol mon'n dir," eyy.. ou lapo i epe ou?" Ou ti dir mwan- ou ti reasir mwan wi, ou ok. *So, get back to the, get back to your Motion.*

HON ANDY LABONTE

Mr Speaker, egzakteman akòz mon lapo i epe menm ki'n mon dir zot anvoye, anvoye, me selman ou bezwen reponn li fer li konnen kot i debout, konn son *lane* parey Onorab Samynadin ti dir avek en lot Onorab laba i bezwen konn son *lane* akòz dan mon *lane* i pa pou antre.

Mr Speaker, retourn *back* lo Mosyon. Mosyon sa ki pe demande sa ki Gouvernman i deza pe fer. Alor, nou ti a swete zot dir nou kwa egzakteman zot anv, kwa ki zot anv nou fer an plis.

E nou, nou pou kontinyen dir avek bann

endividi ki'n vin labi sibstans nou Gouvernman pou kontinyen siport zot akòz mwan mon enn parmi bann endividi ki mon'n toultan pare pou siport zot mon ede.

E DSAPTR i konn tre byen e la mon anv felisit sa bann travayer DSAPTR pou sa bon travay ki zot pe fer e nou Gouvernman pou kontinyen siport zot akòz nou war nesosite e valer pou nou remet nou bann dimoun dan travay parey nou'n fer ler nou aboli URS.

Akòz URS ti en labi ki zot, zot ti servi pou zot ganny dernyen eleksyon malerezman pa ti marse zot ti perdi e zot ti krwar nou, nou pou fe menm parey ozordi pou nou redonn larzan. Get ozordi, zot war laliny plen kot ASP? Non, nou kontinyen *stick* avek nou prensip ou konnen akòz, Seselwa i war ki nou pe fer e Seselwa i apresye Mr Speaker, sa ki nou pe fer.

Alor, mon pou dir avek Onorab Uranie mon konpran, mon konpran kwa ki ou pe demande, me selman i en travay ki nou ladministrasyon i pe fer- i deza pe fe li, e i pe fer li tre byen. E nou pou kontinyen fer i dan sa fason me selman la pa en pti minorite parey zot ki pou dir nou sa mazorite ki nou pou fer.

Akoz nou konnen nou lo bon semen e le 25, 26, 27 Septanm pep Seselwa pou montre poudir nou dakor avek sa ki *LDS* pe fer e nou pou kit li lanmenm.

Mr Speaker, avek sa 2 mo, mon pou dir ek zot Andy Labonte pou retourn ankor dan Lasanble e Wavel John Charles Ramkalawan pou reste *State House*. Mersi.

MR DEPUTY SPEAKER

Mersi Onorab. Mon krwar avek sa entervansyon i demande ki nou *adjourn*, nou a pran en tas kafe ouswa dite pou nou rebran travay 4er.

I reste 4 Manm pou entervenir lo lalis e mon swete ki nou retourn lo lesansyel Mosyon ler nou retournen 4er.

(BREAK)

MR DEPUTY SPEAKER

Welcome back. Pou nou dernyen erdtan travay, parey mon ti dir avan break i reste nou 4 Manm pou entervenir avan ki nou annan *right of reply*. E nou reste lo *rule* 10 minit mon pa pou fer lapliferans. Hon Roucou.

HON MICHEL ROUCOU

Bonn apre midi Mr Speaker. Mersi. Bon apre midi tou dimoun ki pe ekout nou, spesyalman bann zabitan Mont Fleuri bann zoli dimoun.

Mr Speaker, annefe lo Mosyon anmennen par mon koleg Onorab Uranie i al koumsa. Lasanble Nasyonal Sesel, i demann Gouvernman pou met an plas en Program Reabilitasyon konpreansiv pou ede tir nou lafors travayer zenn dan adiskyon e sa i ava soulaz lafanmir Seselwa.

Mon vreman dakor avek sa Mosyon Mr Speaker, e menm dan letan *break* 10er mon ti zwenn avek Onorab Uranie dan koridor mon ti pe dir li poudir mon apresye son Mosyon, e sa letan mont i pou donn li sipor. Me selman Mr Speaker, ki'n arive malerezman apre nou war poudir son bann lezot koleg lo son kote latab ki'n koz apre li ki mannyer nou, nou'n ganny trete lo sa kote latab karya, napa keksoz ki zot pa'n dir i nou lafot.

Pourtan nou, nou pa ti la sa bann letan ler drog ti antre Sesel. Nou, nou senpleman bann endividi ki'n ganny responsabilite ki anvi travay pou ed nou pep. Mr Speaker, ozordi napa en Gouvernman ki ti a voudre war son pep li menm li pe tonm dan en leta kot son lasante li menm li e mantalman. E ozordi Sesel laplipar nou dan nou distrik ler nou pase nou war bann zenn - bokou bann zenn ki nou'n lekol avek, nou'n grandi ouswa paran i nou vwazen ki

zot in war zot in vin bann lesklav sa pwazon ki apel drog.

E mwan ozordi ler mon get sa Mosyon Mr Speaker, depi bomaten mon pe mazinen ki solisyon ki Gouvernman i kapab sey vin avek. Mr Speaker, ozordi en dimoun ki malad i leve bomaten ouswa dan lannwit i al kot dokter i al rod en solisyon oubyen i al rod en rezilta pou gete ki vreman i arive ek li.

E nou war poudir Gouvernman i ep met diferan program oubyen diferan fason fer pou seye pou ed bann ki ozordi i dan adiksyon drog ouswa lalkol li menm li. Be ki zot sa bann dimoun zot pe fer pou ed zot lekor? Ki zot pe fer?

Dan mon distrik an partikilye Mr Speaker, souvandfwa ler mon fer vizit mon zwenn mon byen ek bokou bann adikt. Mon zwenn zot, mon koz ek zot i annan ki vin vwar mwan. I annan ki mon menm konnen ki dan mon kominote kot mon reste Mr Speaker, ki mon byen avek zot Mr Speaker. E ki nou ek zot menm zot kote zot kapab zwenn Gouvernman lanmwatye semen.

Ozordi Gouvernman i met li en Bidze pou li kapab seye adrese. E menm pou sey *maintain* ki dan sa adiksyon Mr Speaker. E ozordi ler ou ep gete i annan bokou fanmir pa tou i annan bokou Mr

Speaker, ki zot ipokrit dan sa lager oubyen dan sa led pou ed bann ki pros o bor zot.

Get en kou dan nou prizon Mr Speaker, opre tou bann fasilite ki ganny mete, bann kondisyon ki ganny mete e nou *still* poudir ki nou war bann fanmir ki pe rod en fason pou fer antre drog dan prizon pou zot al afekte sa enn ki dapre zot, zot kontan. Me ki mannyer nou ekspekte ki Gouvernman li menm li i pou kapab fer sa travay san led bann ki nou kontan mon kapab dir?

Mr Speaker, lot kote lataab monn tande ki poudir se ki Gouvernman ozordi pa pe fer naryen, sa Gouvernman in *fail*, pa pe fer naryen. Be mon a donn nou en legzanp, ozordi Mr Speaker, anba Ladministrasyon LDS ou nepli tande ki bann zanfan, bann frer, pe ganny anvoye pou al garanti. E menm Gouvernman in al anplis pli lwen dan sa lager i annan ki'n menm troun dan pei ou war zot avek zot fanmir Mr Speaker. E kote zot Mr Speaker, ki zot, zot in *fail* sa bann dimoun.

Mont Royale Mr Speaker, *Mont Royale* an 2013 ki ti ganny batir 2001 Mr Speaker ti pran dife. Apre sa ki ti arive? I ti baze dan mon distrik in ganny abandonnen in zis la. Napa naryen anplis ki'n ganny fer anplis bann kliyan ki ti

laba Mr Speaker, ti ganny transfer North East Point. Ozordi nou tann zot pe dir ti annan en plan ki ti pou fer sa reabilitasyon. Be *Mont Royale* ti la li tou sa letan.

10an Mr Speaker, *Mont Royale* in ganny abandonnen la. Osi Mr Speaker kantite zenn ozordi ki nou'n war avek sa larger asarnen ki Gouvernman pe anmennen ki mor avek *overdose* aköz drog. Ozordi bokou paran pe soufer Mr Speaker. Sa bann zanfan kantmenm nou war zot pe marse dan nenport ki leta ki zot ete zot annan en fanmir ki kontan zot Mr Speaker.

Mwan mon'n temway sa aköz mon'n attend bokou lanterman kot nou war bokou bann adikt in mor dan nenport ki fason Mr Speaker, zot fanmir sa latansyon ki donnen i donn zot sa pli zoli lanterman i montre ou sa lanmour. I montre ou poudir laplipar sa bann zenn ki nou war ki tonm dan sa adikt Mr Speaker, zot annan en fanmir par deryer ki kontan zot.

E mon menm annan en paran ki mon ti attend Lanterman son zanfan i ti dir mwan, "Be Onorab entel i annan son lasanm lao, anvi ki i dan sa prion drog i war li i lesklav i war li pe viv i dan en lavi koumsa." E ozordi Mr Speaker, bann NGO zot

bezwen zot osi fer en pti pe plis an term ledikasyon.

Bann zanfan ozordi pa oubliye drog pe antre dan nou bann lekol. E bann zanfan pe ganny servi pou antre ek drog dan nou lekol. E mwan koman en paran mon kapab se dir ki mon enkyet mwan ler ou get bann lenformasyon ki ou ganny donnen se pa vey tel draze tel isi ki pe antre dan lekol koz ek ou zanfan lo la.

E ozordi mon krwar ki i annan en travay, sa travay i bokou pli gro ki nou pe gete la anba. E si nou pa fer atansyon, si nou pa ed Gouvernman dan sa konba pou ed sa group dimoun ki deza ladan pou pa perdi sa lot zenerasyon. I annan en travay an plen pou nou fer.

Mr Speaker, letan nou get bann larestan pei ozordi bann pei ozordi dan Lafrik bann pei ki ou kapab dir zot annan en bon Sistenm Reabilitasyon Sid Lafrik li menm li ki zot enn parmi bann pei dan Lafrik ki zot osi zot pa pe ganny eparnye avek sa problem.

E en lot pei ankor i annan *Norway*, apre Lanmerik bann pei ankor ki annan bann fason ki zot met an plas pou zot travay avek bann adikt, bann dimoun ki'n tonm dan sa bann pwazon li menm li, Mr Speaker, e mwan mon krwar dan sa koman en pti

popilasyon Sesel nou war poudir Gouvernman ozordi Gouvernman pe fer son mye, Gouvernman pe donn son tou.

Me selman sa travay nou pa kapab depan lo zis lo Gouvernman. Nou bezwen annan disiplin - nou bezwen annan disiplin kot pou nou kapab edik nou pep poudir se ki keksoz la deor i serye. E nou bezwen tir lipokrizi dan sa travay aköz ler en kote li menm pe sey son mye, nou war poudir i annan en kote ki pa pe ede.

Ozordi bokou lakour nou war poudir *still* i annan paran ki malgre i annan Gouvernman ki fer son mye, i annan paran ki pe toler zanfann pou zot fer sa bann aktivite.

E mwan mon dir Mr Speaker, mon ti'n pare pou mwan donn mon sipor sa Mosyon. Me selman avek direksyon ki Mosyon li menm li in ale, *sorry* mon pa pou kapab donn mon sipor. Gouvernman pe fer son mye ek bann keksoz ki in dir, napa senserite avek serten Manm lo lot kote dan sa lager li menm li. Mon krwar poudir i annan Manm ki pou bezwen *realign* zot lekor pou zot get keksoz pa zis politikman.

Annou get li dan en fason ki deme nou kapab dir bann parey ou'n dir Mr Speaker, ki ozordi i annan bokou zot pa pe ganny en konpran sa travay ki

nou pe fer pou ed zot. Malgre ki zot napa respe pou bokou nou. E nou, nou pou kontinyen sa lalit pou nou kapab anmenn en fason ki demen sa lot zenerasyon li menm li i pa tonm dan sa prizon. E menm mon zanfann osi Mr Speaker, nou zanfann, bann zanfann dan nou kominote ki nou ava kapab ed zot.

Mon annan lespwar, mon annan lespwar pou sa travay ki Gouvernman pe fer aköz mon'n war bokou laprev deor la Mr Speaker. I annan zenn ki nou zwenn zot i dir mwan ki poudir li i ti en adikt, ozordi mon'n sorti mon pe travay mon annan mon fanmir. E savedir i montre ou poudir i annan bokou keksoz ki Gouvernman pe met an plas avek son lekip pou fer sir ki demen nou kapab *deal* ek sa sityasyon li menm li. Mersi.

MR DEPUTY SPEAKER

Mersi Onorab. *Right on the spot 10 minutes.* Onorab Loze, *you are next.*

HON JOHAN LOZE

Mersi Mr Speaker. Mr Speaker, ozordi *Africa Centre for Strategic Studies*, i dekrir lakot les Lafrik koman *the heroin coast*.

Sa in vin aköz lakot les Lafrik in vin en larout tranzit pou en komers drog *illicit* ki

sorti Afghanistan ouswa laba kot zot apel *the Golden Triangle* i desann i pas atraver lakot Lafrik pou li al dan bann pei Was.

E i annan sa ki zot term koman bann biznes tranzitwar ki'n devlope kot bann marse in ganny ouver *tout le long* lakot Lafrik. E i annan bann *gang* kriminel ki'n devlope, evolye, e ki'n anmenn sa bann keksoz - sa bann pwazon lo lakot bann pei les Lafrik.

Sa in arive san led ou lasistans politisyen, e se sa kot sa bann keksoz in komanse. Letan sa bann dimoun zot, zot in fors ouver zot marse dan bann boner dan bann lannen 2000, aköz si ou pou al *Maurice* ou pou war zot in tonm viktim zot osi.

Madagascar in tonm viktim, *Zanzibar*, *Tanzania*, *Kenya* set aköz sa. Be sa i dekrir ki mannyer in komanse. I annan en pwen parkont Mr Speaker, personn nou pa'n tous lo la.

I annan sa zafer *marijuana* ozordi Sesel, sa deba lo *marijuana*. Eski i devret ganny fer *available* anba kontrol, anba lezisasyon? Eski i devret annan en sours *marijuana* prop, swa atraver *pharmacy*, ouswa dispanser Kot nou pep i kapab ganny akse avek?

Eski *marijuana* i devret ganny tire kot i ganny kontrole

par la kriminalite, par eleman kriminel? Mon konnen aköz nou politisyen nou ezite pou fer sa konversasyon, pou fer sa deba.

Aküz posiblerman napa personn nou ki anvi ganny blanmen, ou pran responsabilite pou okenn *fall out* ki kapab arive aköz sa.

Be eski i pa tonm dan nou *purview* pour nou propoze ki nou anmenn Lalwa, nou met an plas lezisasyon pou finalman pou *referendum*, e ki sa i a vin enn bann size kot nou les nou pep deside zot menm atraver en vwa demokrasi direk?

Eski sa i pa pou en size ideal pou les nou pep pran zot desizyon, en desizyon enformen o tan ki en desizyon enformen i kapab ganny pran lo sa size?

Ki mon pe dir Mr Speaker, se ki nou bezwen en fason avans devan. Nou bezwen en *way forward* lo sa bann keksoz, nou pa kapab kontinyen reste parey nou ete stagne e pa bouze.

Mr Speaker, nou'n koz bokou lo mon tann kot pe dir i annan Bidze 50,000,000 tan milyon, bon, 2017, ti napa milyon ti napa larzan ti napa sipor.

APDAR in ganny kree, nou'n evolye, nou'n bouze, nou'n fer keksoz diferaman e

nou'n aport sipor swen sipor, e soutyen pour sa bann viktim.

Be ki nou, nou pe dir? I pa ase. Sa ki mon tann zot pe dir lo lot kote, se ki i ase pa bezwen Mosyon, pa bezwen siport Mosyon, pa bezwen nanryen i *ok*, annou bat lanmen pou Gouvernman dir *bravo* ou pe byen fer *fine*, *we're done*.

Mr Speaker, i pa ase. I annan en kantite ankore ki nou kapab fer, ki nou devret fer, ki nou bezwen fer. nou bezwen form bann profesyonnel, nou bezwen form plis profesyonnel ki kapab apros sa size, e *deal* akoz bann toksikomann.

Ozordi, i annan keksoz pe degrafe laba lot kote Mr Speaker. Ozordi nou annan nou en *pool* personnel ki'n ganny formen. Be zot, zot in plito ganny formen pou *deal* avek bann adilt, bann toksikomann adilt.

Be nou pa'n vreman cater pou sa ki mon koleg ki'n koz avan mwan la mon zanmi Mont Fleuri Onorab Michel Roucou, in dir ki pe antre dan lekol, nou komans annan bann toksikomann anba laz.

So, nou bezwen donn formasyon bann profesyonnel ki pou *deal* zis avek bann miner, menm bann zanfan. *Now*, drog i en moter lapovrete dan okenn pei kot i ete, sa nou bezwen admet.

I enn bann pli pir lakoz lapovrete; i vol ou, ou lafors travayer, i vol ou pep zot lazenes, i vol zot lanvi, i vol zot larises i fer zot vin apovri.

Me par konsekan lapovrete i en moter pou la *toxicomania* - i pou adiksyon. Kantite fwa ou war bann dimoun ki tonm viktim lalkol, lalkolizm pa zis lalkol, me lalkolizm, la toksikomann - ladiksyon drog, zot bann dimoun ki ankre dan sa ki ou apel lapovrete kronik, zot pa kapab sorti, zot *lock* ladan. Ler mon dir lapovrete kronik manman, zenerasyon an zenerasyon konmsi gran manman ti ladan, manman i reste ladan, zanfan i ladan, nesans ziska lanmor.

Alors taler nou'n ganny demande, ki konkretman dir zot ki nou le? Nou le swen, sipor, soutyen, en program en stratezi pou *deal* avek lapovrete an relasyon avek adiksyon.

Annou komans sonny sa lakoz depi kot i ete. Mon pa pe dir le sel lakoz mwan, mon pa pe blanm *LDS* mwan, mon pa pe fer politik selman mon pe zis dir annou atak li kot sa problem i ete.

Akoz nou tou nou konnen, si ou annan ou en sityasyon lapovrete kronik sa bann dimoun zot a ki ou dir *sub depressive*, zot dan en depresyon permanan, zot

dezespere, e zot fasilman vin viktim okenn predater, okenn predater.

Ki lo *ghetto*, ki dan biro i annan en ta predater nou tou nou konnen. Okenn predater ki pou trenn zot dan sibstans, ouswa dan labi sibstans.

Be sa i bann keksoz ki nou, nou ti a kontan trouve arive, ki nou ti a kontan vwar sa bann keksoz konkret. Be *further* Mr Speaker, zot in koz lo sant reabilitasyon, zot in koz lo sant ki'n brile, zot in koz lo menm mon krwar Onorab John Hoareau, in dir nou in fer en *statement to the effect of* nou Gouvernman in al negosye, e la pe al ganny en sant.

Be vwala kot nou problem i ete, depi Zanvye 2020, i annan en lagreman ki'n ganny sinyen lavalier \$3.6,000,000 Ameriken, dolar pa rounpi, ant Sesel avek UAE, sinyen par Prezidan Danny Faure.

Le 15 Zanvye 2020, apre COVID in vini, apre Gouvernman in sanze LDS in antre. Be lagreman ti siny 2020, \$3,6,000,000 pou nou konstri en sant reabilitasyon, nou pa'n kapab fer li 2020.

Dizon nou pa'n kapab fer li 2021, finansman in fini agree, etabli, e sinyen. Be foutou va we! La nou 2025, nou 2025, zot manda gouvènen pe al lo tanto, oli

sant reabilitasyon? La zot vini zot re envante zot dir nou zot Gouvernman in negosye.

Be ti annan negosyasyon, ti annan lagreman ti'n fini sinyen. E mon koz sa pa dan lesans tap zot, be konbyen sa bann zanfàn ki zot pe koze, sa bann toksikomann ki zot pe koze ki ti'n kapab ganny sove? Konbyen ki pa'n ganny sove? Konbyen ki ti'n kapab ganny tire dan adiksyon, *granted* probableman zot ti pou re tonbe, akòz ou re tonm plizyer fwa.

Be ti'n kapab ganny tire re met lo en bon semen, si zot ti'n fer sa sant pandan letan ki zot ti'n devret fer li. Desizyon pou pa fer ti antyerman zot, zot Gouvernman.

Kapab annan en bon desizyon, kapab en move desizyon, me son rezilta ki nou, nou pe vwar se ki ozordi nou pe demande ki i annan sa i ganny met an plas, konplet avek son program pou adres son sours ki lapovrete, konplet avek met sa sant debout lo son de lipye, formasyon pou bann plis profèsyonnel.

Posibleman Mr Speaker, si nou kapab met en program letid. Mr Speaker, kantite letan i reste mwan akòz mon pa pe war mon ler?

MR DEPUTY SPEAKER

Ou zis lo ler, ou ti komans 4 er 12, 10 minit *yeah* ou la.

HON JOHAN LOZE

Mon a zis termin sa Mr Speaker. Met an plas en program dan Liniversite Sesel kot nou a kapab donn formasyon nou bann profesyonnel dan sa domenn ki pou al ed nou bann toksikomann. Mr Speaker, mon'n reste lo size, mon pa'n fer politik, mon pa'n al rod figir personn lo poto.

Akoz Mr Speaker, en keksoz ki mon kapab dir ou fransman, mwan mon pa krwar en dimoun ki annan en poto antye dan son labous devret pe rod figir son prosen lo poto. Mersi Mr Speaker.

(APPLAUSE)

MR DEPUTY SPEAKER

Prosen enterven an Onorab Georges.

HON BERNARD GEORGES

Mersi Mr Speaker. Mr Speaker, permet mwan avan mon al lo Mosyon pou mwan prezant en seri kondoleans; premyerman, avek ou permisyon mon ti a kontan aport nou kondoleans pour lafanmir ansyen Minis Jérémie Bonnelame, ki'n kit nou.

I ti Minis, i ti Anbasader, e i ti Sekreter Zeneral, *dans La*

Commission l'Océan Indien. In fer en long karyer. E in kit nou ozordi, mon ti a kontan aport nou kondoleans a son fanmir.

Mon ti a kontan osi avek ou permisyon aport nou kondoleans avek Onorab Pillay, ki'n perdi son boper ozordi, e mon ti a kontan lo mon non personnel demann avek Onorab Pillay, pou anmenn mon kondoleans personnel a son madanm.

En madanm ki mon kontan bokou, e ki mon estimen, e ki mon respekte. E trwazyenmman mon kondoleans i al osi pou Onorab Lemiel, ki'n perdi enn son tonton Mr Conrad Balette.

Alor Onorab, nou anmenn nou kondoleans lo sa kote latab, e mon kondoleans personnel pou ou ek ou fanmir a sa moman difisil dan zot lavi.

Mr Speaker, mon kontan Mosyon Onorab Uranie, e mon kontan li pou de rezon prensipal. Zot ava permet mwan en morso *or* en komansman en pe pli leze avan mon al lo Mosyon li menm.

Enn bann rezon ki mon kontan sa Mosyon se ki Onorab Uranie, in rekonnet ki atraver sa Mosyon ki *US* pa pe vin dan Gouvernman an Septanm sa lannen.

E mon dir sa Mr Speaker, pou en rezon tre senp, ler mwan mon'n anmenn mon

Mosyon *Maison du Peuple* semenn pase, enn apre lot lo lot kote latab zot in dir mwan ki mon Mosyon in ariv 12 mwen 5, e ki nou pa pou ganny okenn letan pou nou fer sa Komite, e fer okenn rekomandasyon lo *Maison du Peuple*.

Me menm keksoz i aplik pou Mosyon Onorab Uranie. Onorab Uranie, pe demann sa Gouvernman met an plas en program konpreansiv pour atak drog.

Sa Gouvernman parey nou konnen ankor annan zis 2 mwan, avan prosen eleksyon, e si Onorab Uranie, ti sir ki parey zot pe dir ki se zot ki sel opsyon pour Sesel, e ki se zot ki pou ariv *State House* an Septanm, swa i ti a kit son Mosyon ater, e fer Gouvernman US fer sa program konpreansiv an Septanm, ouswa i ti a anmenn son Mosyon bomaten pou dir ki nou Lasanble Sesel i demann avek Gouvernman US ki pou vin o pouvwar an Septanm pou met an plas en program konpreansiv.

Lefe ki pa'n fer ni enn ni lot, selon mwan in admet dan li menm malgre ki pa pou fer li ofisyelman ki se *LDS* ki pou la an Septanm, e pou sa prosen 5 an.

(APPLAUSE)

HON BERNARD GEORGES

Me dezyenm rezon i rezon prensipal ki mon kontan Mosyon Onorab Uranie, e ki ti ava'n merit nou sipor parey bokou nou in dir, se aköz i tous en problem fondamantal, e en problem ki tous nou tou, sakenn distrik isi Sesel enkli sa ki pou mwan. E set enn bann rezon ki mon'n fer li mon devwar pandan sa bann dernyen lannen ki mon'n deservi lepep Les Mamelles dan sa Lasanble Nasyonal, pou koz lo sa size drog. E pou montre aksyon olye zis koz vagman, e filozofikman lo sa problem.

Mr Speaker, ou ava rapel ki an 2016, osi tou ki nou'n vin dan Lasanble Nasyonal dan 6enm Lasanble, enn bann premye Mosyon si non premye Mosyon ki Lasanble ti debat sete Mosyon mwan mon'n anmenn pour demann en lager antoure pou konbat sa fleo drog.

E mon ti dir a sa moman ki i annan trwa konponan sa lalit drog. Enn se *supply*, trafikier, enn se *demand* adikt, e lot se lasante, lasante piblik i en problem lasante piblik.

E mon'n dir ki fodre nou tackle tou le trwa ansanm similtaneman. Aköz si nou redwi *demand*, *supply* pou tonbe, si nou redwi *supply demand* pa pou annan.

Me antretan bann adikt pou bezwen sipor, e zot pou bezwen ganny akonpannyen par Gouvernman, lekel Gouvernman ki an plas pou soulaz zot, aköz adiksyon i en problemn lasante piblik.

Mr Speaker, mon pa'n aret la, mon'n pran laparol ler Mosyon pou konstitye *APDAR* ti vin devan Lasanble Nasyonal, e mon ti menm demande ki mon ti a kontan vin lo Komite *APDAR*.

E parey zot ava rapel mon'n bliye si ti Prezidan Michel, oubyen si ti Prezidan Faure, me an tou le ka ler *APDAR* in ganny *set up* Onorab Pillay, i dir mwan Prezidan Faure, mon ti ganny apwente koman *Vice-Chair APDAR*, e Onorab Pillay koman en manm, e parey i ti dir ler i ti pran laparol pli boner nou ti travay fortman, e o tan ki nou ti kapab pou fer ki sa program ti ava reisi.

E menm Mr Speaker, mon konnen ki mon pa'n zis fer sa, me mon'n debout mon'n al tro lanterman zenn dan mon distrik ki'n mor aköz drog, e mon'n debout dan legliz *Saint Therese*, e mon'n dir mon'n anvoy en mesaz kler avek tou bann trafikan drog dan mon distrik, mon pa kapab koz pour lezot, e mon'n dir zot si gard i vin kot zot, i vin fer lafouy pa rode lekel ki'n anvoy zot pa blanm zot vwazen

se mwan ki'n anvoy zot, blanm mwan.

Mr Speaker, nou bezwen fer sa bann deklarasyon enportan si nou anvi ki nou elimin sa fleo. Me mon pa'n zis aret la Mr Speaker, mon'n anploy adikt, e mon ankor pe anploy bann dimoun ki pe soufer avek sibstans.

E sey donn zot en nouvo lespwar, donn zot en nouvo souf montre ki zot malgre zot adiksyon zot annan en plas dan lasosyete.

E mwan ava dir ou Mr Speaker, bann personnelman bann dimoun ki travay pli for dan bokou ka se bann dimoun ki al tir zot malad bomaten ki al pran zot *methadone* apre ki vin travay, ki fer en travay ekstraordiner.

E mon'n fer en propozisyon, mon'n fer en propozisyon Onorab Loze, in tous en pwen enportan in dir ki propozisyon ki nou kapab fer? ki nou pe demann avek en Gouvernman pou fer?

Aküz Gouvernman ki la ozordi, Gouvernman ki pou la demen, Gouvernman ki pou la apre demen nou pou bezwen fer fas a sa problemn ki apel drog dan nou pei.

E si nou, si nou tou ansanm en lager antoure parey mon ti demande an 2016, nou a kapab arive trouv serten solisyon.

Me Mr Speaker, avek drog *unfortunately success is failure*. Nou to sikse i telman ki annan de fwa ou demann ou lekor, *why bother?* Akoz ki nou devret fer tousala?

E sa se bann kestyon ki nou pe demande depi bokou lannen. Si en dimoun, en adikt ki sorti lo adiksyon, e sa se en statistik se pa mwan ki pe envante.

Si en adikt ki reformen i *backslide* se en adikt ki ou'n perdi. Ou'n pas tou ou letan pe travay avek li e i *backslide*. E 80poursan, 80poursan adikt ki sorti lo sibstans i *backslide* dan en peryod 8 an depi ki zot in sorti lo sibstans.

So problemm i grav, e problemm pa pe ganny pa pou kapab ganny solisyon a kour term. Sa i enposib. Sel solisyon se tret bann adikt, *reduce supply, reduce demand* napa lot fason fer.

E se la kot Mosyon Onorab Uranie, i annan son merit aköz en program konpreansiv i bezwen ganny etabli. Me la kestyon se, ki program konpreansiv? Ki mannyer nou pou *tackle* sa?

Si 80poursan adikt ki trete, e ki sorti lo sibstans i *backslide* dan 8 an e si en sant reabilitasyon, e konpran mwan byen mon bann zanmi mon bann koleg - en sant reabilitasyon i pou tret kekfw 10 a 15 dimoun, dizon 100

dimoun a lafwa, e i pou pran li 18 mwan pou fer ki sa dimoun i sorti lo sibstans e avek en risk apre ki ganny 8 an i pou *backslide*, e nou annan 4,000 ekek - ki groser nou latas ki devan nou? *It's a major, major, major problem*. E mon kontan ki sa Mosyon in vin devan nou aköz i fer nou *focus* lo sa bann defi ki devan nou.

E sa bann defi Mr Speaker, se bann defi ki grav - ki grav, *methadone* in en mon kapab dir in en sikse. Me i en sikse parsyel, aköz sel keksoz ki nou'n kapab fer aköz nou napa bann lankadreman, se fer sa ki nou apel en *low threshold methadone*.

Donn en dimoun en son dose *methadone* bomaten, e ekspekte ki i pou kapab *last* ziska demen bomaten. Nou konnen ki bokou i retourn lo *ghetto* dan apre midi. Me i en komansman. Sa ki nou devret annan se en *high threshold methadone* program kot i pran son *methadone* epi i ganny akonpannyen lazournen pour li pa retourn lo *ghetto* pour li evantelman sorti lo drog.

Me menm si i pou sorti 8 lo 10 pou tonbe dan en peryod 8 an. Donk ki mannyer ou pou *deal* avek sa? Mon konnen ou pe al dir mwan mon letan pe fini Mr Speaker, mon pe mon ava zis dir ankor enn de keksoz.

E se sa, se sa refleksyon ki nou bezwen, ki nou bezwen fer la ozordi. Mon pa kapab, mon pa kapab arete san mansyonn plizyer linisyativ ki'n ganny pran akòz zot bezwen ganny sipor.

Sant La Rosier par egzantp ti enn, Mon Royale Onorab Roucou, in koz lo la Laferm Lespwar ki pou ouver dan distrik Port Glaud Sanmdi.

Me an partikilye mon ti a kontan koz lo en madanm, anefè en group madanm ki'n komans, ki'n fer *self help*. Zot pa'n esper Gouvernman met en program an plas, zot ti annan zanfàn ki ti tonm dan adiksyon, e zot in fer en lasosyasyon ki ti apel "*Parents with Hope*."

E la mon ti a kontan, mon ti a kontan idantifye remersye madanm Julina Payet, ki enn mon aktivis Les Mamelles ki ti enn sa bann paran, e ki ankò enn sa bann paran ki pe lit avek en zanfàn ki dan adiksyon.

E sipor pa'n toultan la pour sa bann linisyativ prive, mon bezwen mazin *CARE*, ki'n fer en kantite travay lo ledikasyon ki al dan bann lekòl.

Nou menm nou asiste zot annan de fwa ler zot vin vizit nou dan lekòl. Tousala Mr Speaker, se en deba ki nou bezwen annan. Me sa ki mon

ti a kontan fini avek se dir annou sorti lo filozofi.

Filozofi pa pou anmenn nou okenn par. Annou al dan bann deliberasyon konkret, annou rod bann solisyon konkret, e sel fason nou pou kapab fer sa se parey mon ti swete an 1900, an 2016, ler mon ti anmenn mon Mosyon lager antoure, se ki koman en Lasanble sa enn malerezman pe al fini, e nou'n perdi sa loportinite menm ozordi. Me koman en Lasanble, koman en nasyon vin ansanm, e annan en deba kot nou pou trouv bann solisyon ki bann solisyon Seselwa ki nou kapab aplik avek nou pozisyon e nou sityasyon isi.

En mo final pou *mover* Mosyon Onorab Uranie, mon'n dir ou mon kontan ki ou'n anmenn sa Mosyon, akòz in anmenn en refleksyon, i malere ki Mosyon in pran en lapant politik ki pou fer ki malerezman avek sa bon lentansyon, e kekfwa lafason ki'n ganny *frame* i pa pou ganny nou sipor.

Me malgre sa mon krwar, ou pa devret sorti isi dan sa Lasanble avek en defèt, mon krwar ou devret dir *at least* ou'n kapab fer ki en konversasyon in kapab arive pandan en zournen. Mon remersye ou Mr Speaker.

(APPLAUSE)

MR DEPUTY SPEAKER

Dernyen enterven an ki lo lalis pour entervenir lo sa Mosyon se Onorab Arissol, avan ki nou donn drwa repons.

HON SANDY ARISSOL

Mersi Mr Speaker. Bonn apre midi tou dimoun ki a lekout. Mr Speaker, premyerman letan mon komans koze mon ti a kontan deklar mon lentere lo sa size drog ki nou pe koz lo la.

Mon anvi fer konnen poudir tou dimoun ki pe ekout mwan mon pa dan biznes drog, mon pa vann drog avek mon kominote kot mon reste, ni mon madanm ki dormi o bor mon pa vann drog avek personn.

Mon bann zanfan ki mon annan ziska prezan pa pe vann drog avek personn, e nou pa dan biznes drog. So se pou sa rezon letan nou koz lo drog nou bezwen get dan lakour kot nou, apre nou vini nou fer bann gran deklarasyon ki nou'n tande depi bomaten.

Mon ti a kontan premyerman, dezyenmman dir avek Onorab Rocky Uranie, zoli Mosyon lentansyon fantastik, be selman ti ava enportan pou Onorab Rocky, dan son repons dir nou si in deza fer en rapor par egzant, pou li fer en rapor an relasyon avek drug *trafficking* dan son distrik, kantite i annan.

Eski in anmenn devan, oubyen bann dimoun dan son distrik ki pe ganny afekte? Konmsi pou nou osi kapab konpran poudir Onorab Rocky Uranie, pandan sa dernyen 4 an ki'n la pe al lo 5 an koman Manm Elekte in swiv son bann zenn dan son distrik, e pou ki rezon i pe anmenn sa Mosyon, Mr Speaker.

Me trwazyenmman sa ki malere se letan li in anmenn en tel Mosyon avek bi pou nou reste lo en laliny, e mon kontan apre midi en *memo* in sorti, e lapros prezan in sanze konpare avek lapros bomaten kot "karya" ti'n antre dan Lasanble Nasyonal ki pa ti neser.

E souvandfwa i ganny fer par bann Manm ki napa en distrik sa, bann Manm Proporsyonnel ki rantre ki fer tou *sort* kalite dezord, kan letan ou annan bann Manm Elekte ki annan en distrik ki konekte avek zot dimoun zot, zot pe sey rod en semen pase pou zot dimoun. Se sa ki nou'n vwar lo kote *US* ti'n arive.

Mr Speaker, an relasyon avek sant reabilitasyon ki nou'n tann koz lo la an relasyon avek *UAE* wi, ti annan en negosyasyon ek *UAE* ki mon'n tann Onorab Loze, koz lo la.

E la letan nou pe koze mon bezwen reasir tou dimoun ki pe ekoute poudir sa

Proze Sant Reabilitasyon ki pou fer dan distrik Larivyer Anglez kot Onorab Andy Labonte, zis lot kote semen, kot lot kote semen sa lot sant ki ti bann zenn in ganny vann par US.

So Gouvernman pe al fer sa sant reabilitasyon dan distrik La Rivier Anglaise, e letan nou pe koze la son plan i kot *Planning*, e byento nou ava kapab ganny en larepons an relasyon avek ki zistans in arive.

I ti'n ganny propoze pou al *Bonne Espoir*, malerezman UAE pa ti dakor parski ti tro lwen, e i ti tro lwen avek bann sant medikal, zot a rapel i ti ganny propoze an premye lye Port Launay dan distrik Onorab Egbert Aglae, ki'n koz lo la bomaten.

Me zot a rapel lekel ki ti anmenn miting petisyon pou demande pou dir, "Pa fer dan nou distrik, nou pa ti a kontan" sete Onorab Aglae, li menm li ki ti pe koze bomaten avek bann rezidan ki ti demande pou ki sa pa ganny fer dan son distrik.

E sa i dan rikord i la, e ti lo medya nasyonal an relasyon avek sa sant reabilitasyon ki mon'n tann li pe koz lo la bomaten, e tou dimoun a konnen Mr Speaker, parey zot tou zot konnen poudir letan ou ganny en donasyon avek en pei i pa neseserman ki ou

Gouvernman i annan kontrol lo la.

Me toultan zot vin avek bann kondisyon, pour zot konnen kwa ki ou pe fer avek zot donasyon ki ou'n donn zot. Mr Speaker, size drog i en size ki tous tou dimoun, e mwan koman en papa i konsern mwan.

E se pou sa rezon mon kontinyen siport mon Gouvernman, parski letan Onorab Uranie, pe anmenn en Mosyon pou annan en program reabilitasyon konpreansiv, mon asire avek sa sant ki pe ganny konstri la par mon Gouvernman i pou konstri.

Sa program reabilitasyon i ava antre pour ki nou kapab ed bann zenn ki dan sa problem adiksyon drog.

Me parkont sa ki nou osi bezwen konsyan Mr Speaker, letan Onorab Uranie, parey Onorab Loze, toultan in dir en Mosyon eleksyon mwen senk, kin vin avek 4an in la in anmenn en Mosyon la.

E nou kontan son Mosyon, be selman son Mosyon i an retar parski tou sa ki li pe demande oubyen ki ti a swete Gouvernman i deza pe fer en kantite keksoz Mr Speaker.

Mon a donn detrwa sikse par egzanp, letan nou pe asize nou pe koze la nou, mon'n dir

Drug Rehabilitation Centre i a pe koman i kot *Planning* byento i ava komans konstri.

Zidisyer zot in bril anviron 2 ton drog Zidisyer, aköz zot in bril 2 ton drog? Parski nou'n sezi Gouvernman avek *Coast Guard* zot in sezi drog dan nou lanmer, e tou dimoun in vwar.

Sa i en lager ki nou'n fer depi ler nou'n antre dan ladministrasyon. Letan lot ladministrasyon ti napa kouraz pou lager kont drog ek bann droger, nou ladministrasyon nou'n antre nou'n fer le nesaser.

Parski letan nou ti pe vizit bann distrik bann paran ti koz ek nou, bann manman ti pe plere, papa i plere parski son zanfàn ler i al lanmes bomaten son zanfàn i pase i pran sa menm poul ki ti pou fer en bouyon pour lafanmir li i pran i al vann pou R2 zis pou li ganny en laliny.

E nou, nou Gouvernman in antre in konbat kont drog dan nou pei Mr Speaker. e mon fyer se pou sa rezon mon pou "kit li lanmenm!" Parski mon annan laprev ozordi, poudir mon Gouvernman in lager kont drog.

(APPLAUSE)

HON SANDY ARISSOL

Letan nou Gouvernman i vini i deport bann endividi ki pe

vann drog avek nou zanfàn dan lakominote, mon Gouvernman i pran li i met lo en avyon fer li retourn laba dan son pei mon kontan Mr Speaker.

Parski mon Gouvernman i montre avek bann paran poudir nou serye dan sa travay ki nou pe fer, letan nou dan Lasanble Nasyonal nou vot Bidze.

Bidze nou vote pou bann dimoun pe viv adikt pou ganny *methadone*, anviron 58,000,000 nou vote dan Bidze, plis ki Bidze Lasanble Nasyonal.

Parski nou konsernen avek bann adikt. Me parkont dimoun deor i dir ek ou "non, aret donn zot *methadone*, nou larzan sa fer zot al travay, anvoy zot lo zil, fer zot al anmas koko."

Pa mwan ki dir Mr Speaker, bann dimoun deor ki gete ki pe swiv. Me parkont koman en Gouvernman nou dir "non, zot osi zot bann imen, zot in tonbe alor i enportan pou nou atrap zot lanmen lev zot koman bann imen pou nou kapab siport zot dan sa tonbe ki zot in tonbe."

Se pou sa rezon lo sa kote LDS nou vot Bidze nou, pour ki nou kapab siport zot. La mon kontan Port Glaud pe al ganny sa sant i osi.

Parski sa i en diskisyon ant legliz Katolik avek

Ladministrasyon LDS, e sa larzan ti dan Bidze sa nou'n vote nou sa donasyon ti dan Bidze.

E nou LDS toultan nou vote nou, nou pa zis vini nou koze, nou koze fer gran deklarasyon. Me nou montre laprev, nou serye parski nou Gouvernman pe delivre dan sa ki pe fer Mr Speaker.

Letan nou dan Lasanble Nasyonal nou ti vote pour ki militer i asiste bann zofisye lapolis dan sa travay danzere ki zot fer. ki nou ti vwar? Eski nou ti ganny sipor? Non.

Ti annan en kantite kritik lo la, "bann la solda pou bat dimoun, pou komans shoot zot."

Be ki nou'n vwar? Ozordi Onorab Churchill Gill, ki ti kont yer i vini i dir, aköz larme pa ti zwenn avek lapolis pou ed zot dan sa travay.

Parski Onorab Gill, in konpran poudir sa ki ti vote *party line* pa'n ede vreman. Me ozordi li menm Churchill Gill, i pe rode pou ki larme i asiste lapolis dan sa travay danzere ki zot fer. Be selman li i ti pe demann sa dan e lot konteks Mr Speaker.

Annou get anvil nou bann *sex workers* ki nou ti vwar ti'n *flood* lavil. Eski i annan menm kantite ozordi dan nou lavil?

Non, in redwi. Aköz in redwi? Parski bann zenn ki pe

pran *methadone* ozordi i annan en rediksyon, e i annan plizyer zenn mwan on konn de fiy ki reste Bel Ombre letan zot pran zot *methadone* mon'n vwar zot pe travay, parski zot in rann mon en servis dan en landrwa kot mon'n ale.

Tousala i bann travay ki nou Gouvernman i deza pe fer Mr Speaker. Nou, nou pa vin dan Lasanble zis nou koze nou koze. Se pour sa rezon mon pe dir, "Kit li lanmenm, *no turning back!*"

Parski i annan laprev ki nou Gouvernman pe fer travay Mr Speaker, avek nou bann zenn ozordi e an relasyon avek drog. E mwan mon kontan lafason ki keksoz pe ale, e mon kontan poudir tou sa ki nou pe demande ozordi Mr Speaker, i kontinyen marse byen, e pei i kontinyen bouze.

E Onorab Aglae, ti fer sorti en keksoz bomaten li Onorab Aglae, ti dir ek nou poudir size drog i fer i en lot kalite lapovrete, se pour sa rezon dimoun i antre dan drog.

Mr Speaker, Patrick Herminie, ti donn en *interview* Patrick Herminie, ti donn en *interview* le 6 Mars 2017, e sa menm kestyon ti ganny demande avek li sa letan koman sa dimoun ki ti ansarz APDAR.

Kestyon ki ti ganny demande. "*Do you think the country's high cost living is*

pushing some to sell drugs, even if they don't use it themselves?"

Larepons ki li i ti donnen, *"No, I think it's greed."* Mon repete. *"I think it's greed, and we are also very materialistic. It is part of what i was saying earlier about the infantilisation of nation, they want to earn without working, they want big cars and houses, but they don't want to work. Drug brings easy money and a huge amount."*

Mr Speaker, savedir i deza reponn kestyon ki Onorab Aglae, ti pe dir ki sa en *big interview* ki ti fer avek *Today* le 6 Mars 2017. I pa vedir akòz ou mizer ou al dan drog, non.

Mizer ozordi dan nou pei, avek mizer ki nou granmoun ti koz lo la 40 an pase i diferan. Ozordi si ou mizer ou pa anvi leve pou ou al travay, ou reste dan lakour kale, sa ki fer ou mizer ozordi.

Me akòz ozordi letan nou get bann dimoun get voyaz ozordi, get kantite dimoun i voyaze, parski i travay i fer son pti *savings* i balans son larzan pou li pey son det, pou li sonny son zanfan en pti de kote pou li kapab voyaze.

Emirates ozordi i mont plen i desann plen li Mr Speaker, parski nou annan bann dimoun serye dan nou pei ki balans son bidze ek

bann dimoun ki pa neseserman anvi travay.

Apre ler i zwenn en *MNA*, i zwenn en dimoun i dir ek ou get sa mon pa travay pa ganny nanryen, alor zot anvi ouver tiyo pou nou donn bal. Nou pa kapab nou koman en Gouvènmman serye nou bezwen responsabiliz nou dimoun.

Be i annan en keksoz nou pa ankor koz lo la nou tou nou pe koz *APDAR*, nou tou nou pe koz *methadone*. Be sa dimoun li ki ganny afekte li kan i pou pran son responsabilite li koman en dimoun pou li dir get sa mon frer fek mor yer in al lanterman, fek kriye sa enn laba i lopital, be mwan kan mon pou get mon lavi en kou?

Konbyen manman Mr Speaker, ki'n anmenn son zanfan *Maurice*, in anmenn Sid Lafrik, in sey al partou pou fer son zanfan akòz?

Parski i kontan son zanfan, me eski sa menm zanfan ler i retournen i ekout son paran? Non. I annan ki'n sove. Me i annan i re tonm dan adiksyon.

Alor eski pei, *NGO* ki Onorab Georges, in koz lo la, legliz ki an partenarya avek Gouvènmman pe al fer, eski nou menm nou koman en Lasanble pa nou pe sey nou mye pou nou ed nou bann

zenn? Eski nou pa pe fer ase Mr Speaker?

I annan en kantite posibilite la deor. Fodre pa nou, nou tonm dan sa bann pyez pou dir i vin en lager politik. Non. Nou, nou met lanmen ansanm, nou vot Bidze, nou *set the tone* kler.

Me selman i reste avek sa endividi pou li dir “mon pa anvi sorti ladan, oubyen mon anvi sorti ladan.” Mr speaker, drog i la pandan en bann lannen e letan nou lanmer i *vast*, nou lakot i gran *LDS* in fer en kantite sikse pandan sa 4 an edmi ki nou’n la konpare avek bann ladministrasyon ki’n la oparavan ki’n zis koze, mwens aksyon.

Be nou ozordi nou annan en kantite laprev devan nou. E mon anvi re fini lo sa pwen ki mon ti komanse, sant reabilitasyon pou fer dan distrik Onorab Andy Labonte, e li ki pou al ouver parski li ki pou *MNA* sa distrik letan sa sant i ouver par nou Gouvernman.

(APPLAUSE)

HON SANDY ARISSOL

E mon ti a kontan konklir Mr Speaker, par dir nou tou nou konn Parti *US*, nou tou nou konn Parti *SPPF*, e nou tou nou konnen letan Mr Renee ti fer *rally Gordon Square* kote ti al fini.

Ler *SPPF* ti fer *rally*, alors en zour depi kot ou vini kot *Honey Pot*, *Frères Mariste* o bor lekol *Saint Jean-Bosco* la *US* ti’n *flood* lavil, ti’n *flood* - sa *rally* ki mon’n war *Mini Stadium* ki zot pa’n kapab ranpli *Mini Stadium*.

Lo semen ou a krwar ti annan en koze piblik sa bout semen o bor zot, pa li *US* ki nou konnen Mr Speaker. I annan en problem parski *mini rally* in fini lo en *Mini Stadium*, e zot in vin en *mini* parti, e zot pou al fini pli ba ankor plis ki sa.

Avek zot bann sez ki la vid zot pou al fini pli ba ankor, nou tou nou konnen zot osi zot konnen. Se pour sa rezon zot in vin avek sa fristrasyon depi *Mardi* zot en pe ankoler.

Be selman la mon kontan sa *tone* apre midi in sanze pou zot montre poudir zot diferan, zot anvi. Me selman Lepep Seselwa pe get zot de pre. Mr Speaker, mon bezwen dir avek Onorab Uranie, nou pa pou kapab siport ou Mosyon Onorab Uranie.

Parski nou Gouvernman pe sey son mye pou fer, e zot lo zot kote zanmen zot aprouv Bidze ki nou vote zisteman pou nou kapab ed bann adikt. Alor pa kapab ganny sipor lo nou kote.

Letan nou, nou deza pe fer sa travay ki ou pe demann nou pou fer, e laprev nou

annan en kantite la Mr Speaker. Mon ava termin la Mr Speaker, mersi bokou.

MR DEPUTY SPEAKER

Aprezan in ariv ler pou nou donn dwa repons loter Mosyon, e Mosyon ki nou ti pe diskite depi bomaten i dan non Manm Elekte, pour *Inner Islands* Onorab Uranie.

HON ROCKY URANIE

Mersi Mr Speaker. I byen regretab ki mon'n tann tou Manm lo lot kote latib i dir ki Mosyon i bon, Mosyon i annan son merit, me selman zot pa pou vot lo sa Mosyon zis aköz zot pa'n kapab *rise above politics*.

Mosyon ti pe demande, ki Lasanble Nasyonal i demann Gouvernman pou met an plas en program reabilitasyon konpreansiv pou ede tir nou lafors travayer zenn dan adiksyon, e sa i ava soulaz lafanmir Seselwa.

Onorab, in dir mon anmenn sa eleksyon mwen senk. Me eleksyon mwen senk, me ler le 27, eski nou problemn drog i pou ale Sesel? Problemn drog pou la pou nenport ki Gouvernman *deal* avek.

E sa Mosyon i la pou ouver lespri, grander lespri tou Manm Lasanble, e nenport ki Gouvernman a lavenir ki vini.

Mon pa ti le nonm Gouvernman *United Seychelles*, aköz mon pa ti anvi politiz sa Mosyon.

E Mosyon pa'n demann spesifik Gouvernman *LDS* in dir Gouvernman. So kantmenm in vin la i eleksyon mwen senk mon krwar Onorab Georges, atraver ou ek Onorab Arissol, ti devret war grander lespri sa Mosyon ki Gouvernman.

So be it nenport ki Gouvernman parey mon'n dir mon pa le politiz li i bezwen fer en program konpreansiv. Mon ti anvi met sa o kler Mr Speaker.

Mr Speaker, Onorab Arissol, mon konn li depi lontan i kontan fer en kantite demagozi, i dir size drog i tous tou dimoun. Zidisyer in detri drog, pe detri drog, me nou konnen depi lontan drog pe ganny detri dan pei.

Son Gouvernman pe lager asarnen kont drog, me prezan ki drog i deroule dan pei, *LDS* ti *champion* anvoy adikt lo zil, me ozordi zot in sanz zot *tune*, letan nou ti annan *NDA* lo zil La Digue nouvo ladministrasyon in deside tire, e prezan trafikan i fer sa ki zot oule.

La *weekend* pase apre ki mon'n pas en landrwa, byensir avek Onorab Sebastien Pillay, zot in ganny lenformasyon, so se la ki zot in deside taye pou

al bulldoz en *ghetto*, bulldoz en landrwa kot adikt i vini.

So, pou mwan nou bezwen vin pli proaktiv avek bann keksoz. Mr Speaker, si mon pran premye pwen Onorab Larsen, in dir ki “drog i en kriz nasyonal ki pe afekte nou lekonomi, ki demann tou latansyon, i kree fristrasyon dan fanmir.” E ki preski tou Manm in dakor avek.

“Mankman en sant konpreansiv byen entegre” in dir in koz lo la. E se sa ki nou adikt pe rode, *ok*. E ki mon’n vwar se ki Onorab Desheila Bastienne, e Onorab Roucou, zot osi zot aksepte ki annan sa bann problem.

Onorab Roucou in dir ki Mr Speaker, “drog pe antre dan lekòl, drog pe antre dan prizon.” So alors i montre ki annan en mankman, i manke bann ki bann keksoz an plas pou anpese ki sa bann keksoz i arive.

Me *still* i deside dir ki i pa pou sipòrt sa Mosyon. Onorab Desheila, avek son grander lespri in dir ki li i ti anmenn en Mosyon ki en pe dan sa laliny. Me mon Mosyon i pli larz i anglob sa ki pou li.

So mon krwar i ti devret pe sipòrt, i devret *LDS* tou sa ki’n koze zot devret annan sa ki nou apel lentelizans emosyonnel, pou fer sir ki zot pa les lemosyon politik p[artizan afekte merit sa

Mosyon pou zot vot lo la, pour nou donn Seselwa en *fair deal*.

Pa zis bann adikt, me nou ki la bann ki pa adikt akòz nou osi nou ganny afekte par aksyon bann adikt. Onorab Tamboo, in dir ki “malgre, malgre tou mansonz, tou mansonz ki zot in koze pandan sa lannen problem i reste, problem i reste, e ki nou bezwen *deal* avek”

En lot Onorab, in dir ki “i annan program an plas, program depi lontan in la in komans depi nou letan, parey *CARE* annan bann lamars lo semen kont drog, *say no to drugs*, e tou bann lezot sant pti sant ki’n ganny kree in komans dan nou letan.”

Me *still* nou vwar ki sa i pa ase, en program konpreansiv i kapab ede ki tou sa bann sant, sa bann landrwa tousala petet pa travay an saylo. Me i annan sa bon kordinasyon ki pou entegre tou dimoun.

Onorab Lemiel, in koz bokou, e in dir bokou keksoz ki byen, mersi Onorab Lemiel, pou sa bann bon kontribisyon ki ou’n anmennen. “Nou kapab tir leson”, parey in dir, “lo bann bon program reabilitasyon ki bann lezot pei parey *Canada*, e lokaliz li Sesel.

Pou fer ki sa i t satisfè, i ava satisfè sa ki nou pe rode pou ede avek reabilitasyon

nou bann dimoun lo adiksyon.” Nou bezwen revwar bann sant ki deza an plas parey nou’n dir, fer zot vin en pe pli o nivo pour zot kapab ankadre nou bann dimoun ki annan adiksyon.

Enteresan ankor i Onorab Loze. Onorab Loze, in vin avek sa ki nou dir, “nou bezwen annan en program ledikasyon, en program *training* pou nou bann profesyonnel, akòz pou travay avek sa bann adikt nou bezwen bann profesyonnel kalifye ki pou kapab travay avek zot.”

E pour sa in menm sizere ki “Liniversite Sesel i kapab fer en program letid spesifikman pou *train* sa bann profesyonnel.” E ankor in al spesifikman pou ofer program pou bann kapab deal avek bann zanfan, e in dir ki, “drog i pou i moter lapovrete.”

In dir ki, “nou oule soutyen, nou le swen sipor pou *deal* avek lapovrete.” Akòz ler dimoun i dan lapovrete zot vin viktim bann predater pou trenn zot dan labi sibstans.

E Onorab, in fer remarke ki Prezidan Danny Faure, ti siny en lagreman \$3.6,000,000 pou konstri en Sant Reabilitasyon ki pli boner Onorab Aglae, osi ti koz lo la.

Me sa ti ganny fer avan Eleksyon 2020, me apre 2020,

ki nou’n vwar en nouvo ladministrasyon in vini, me ziska la nou pa konpran ki pe arive vremen avek sa program, avek sa sant ki pou ganny konstri.

MAT klinik ki ti pou ganny konstri la, Larivyer Anglez ziska la i ankor zis en promes, me nou pa pe vwar nanryen.

Mr Speaker, letid zanfan i bezwen byen ganny enformen pou pa servi drog byen boner depi byen zenn dan bann pti laklas, e sa in ganny fer resorti par detrwa Onorab.

Me *still*, me *still* zot pa krwar, zot krwar i bezwen sant konpreansiv pou reabilitasyon, me *still* zit deside pou pa vot anver sa Mosyon.

Mr Speaker, Onorab Georges, mon retourn lo li ankor en kot atraver ou. Pou plizyer fwa zot ti koz, mon kapab dir mal lo *methadone*. Me la in dir ki *methadone* i en sikse, i en sikse parsyel, e i en komansman, e i en komansman.

So alors se pour sa rezon ankor ki nou bezwen en program konpreansiv ki al pli profon. Onorab Georges, in fer konparezon ki kantite dimoun ou pou kapab trete, ki kantite ki kapab re tonm dan adiksyon.

Me ki nou fer? Ki nou fer? boner dan mon lentervansyon,

lentrodikeyon Mosyon nou'n dir ki pou annan ki pou re tonbe, me nou pa kapab les zot lanmenm nou pou bezwen re anmas zot.

E sa i en lager pou nou tou Mr Speaker, aköz si ler i re tonbe ou les li, be akfer nou la? Nou la pou ede koman bann Manm Parlman e koman bann endividi dan lasosyete pou nou antoure nou tou parey in dir, "pou nou lager antoure," pou kapab anmenn en solisyon pou sa problemn.

I vre ki i kout larzan, i pa bonmarse. Onorab John Hoareau, in fer sa kler ki bann dimoun labi sibstans i devlop bann maladi, e i vremen koute pou sonny zot.

So alors sa i enn bann rezon aköz mon krwar Onorab John Hoareau, ti devret i osi pe siport sa Mosyon, pou anpese ki nou kontinyen depans kantite larzan zis koumsa menm avek bann pti bout *here and there*.

Me plito annan en programn vremen konpreansiv ki pou le fitir, le fitir zenerasyon i kapab vwar en sanzman, en sanzman dan nou pei nou ava kapab re ganny nou lafors travayer Mr Speaker, pou ki zot a kapab kontribye dan nou lekonomi.

Mr Speaker, sa i al pli larz ki sa ler nou'n tir nou lafors travayer dan drog,

byensir i pou annan en lefe domino ki swiv li.

Vedir enn pou annan pli bon fanmir kalite fanmir, byensir zanfann pou ganny pli byen disiplinen, e sa zanfann ler i ganny pli byen disiplinen i pli kapab respekte son ansenyan lekol, laprantisaz i vin plis, i anmenn pli bon rezilta pou son lekor, pou son lekol, e pou pei kot nou kapab ganny plis profesyonnel pou anmenn bann kontribisyon ki nou pei i bezwen.

Alors Mr Speaker, en kantite in ganny dir, me mon pa pou al an detay dan tousala. Me en keksoz ki reste kler, en keksoz ki reste kler parey sa de dernyen semenn ki'n pase nou'n vwar bann Mosyon ki'n vini.

Nou'n vwar bann Komite ki ti anvi ganny formen, petet la osi pou la nou ti kapab demann Gouvernman en komitman, en komitman ki vremen nou pou bezwen atak sa problemn ki pe roz nou pei.

Aköz nou tou nou konnen ozordi ki sa i enn bann *main* laköz ki nou pei i dan problemn, la petet zot ti kapab dir "annou sey form en Komite ki pou kontinyen met presyon lo Gouvernman pou fer sir ki met plis larzan petet pou kapab fer ki sa sant i ganny konstri, pou ki nou kapab tir nou bann zenn dan adiksyon."

Me i malere Mr Speaker, i malere pou dir ki apre ki mon ti'n demann tou Manm pou fer en kontribisyon, e sizesyon pou anmenn sanzman koman Manm Parlman responsab, nou'n vwar ki i annan ki'n plito akòz enn in fer sorti en pwen politik, me li in plito i osi alòrs pa'n le *rise above* sa.

Me plito anvi servi met politik avan, avan *deal* avek *real* problem ki drog la ater ki pe ronz nou lazenes, e nou pei. So Mr Speaker, mwan mon senserman krwar ki mon Mosyon, i en bon Mosyon parey zot in dir.

Me selman i malere, i malere ki mon'n vwar sa bann kalite refleksyon ki kontrandi zot lekor, e zot pe deside akòz zot annan mazorite, mazorite zot pa pou vot pour sa Mosyon kantmenm i annan son merit.

So mon swete ki Seselwa la deor, bann paran ki pe soufer la deor, bann adikt zot menm zot in kapab swiv, e vwar lenportans ki Lasanble Nasyonal mon kote latap in met anver zot.

Me lafason ki LDS in reakte anver sa kantmenm zot in vwar poudir i en bon program, zot in deside zis les politik, les politik pas par la tou keksoz.

Avek sa Mr Speaker, mon dir mersi tou mon bann Manm ki'n koz lo sa Mosyon, e siport mwan. E mon pou *still* dir

mersi bann Manm LDS ki'n vwar poudir mon Mosyon ti bon, kantmenm zot pa'n kapab *rise above politics* pou zot annan sa *emotional intelligence* pou fer sir ki zot desizyon i pa baze lo lemosyon, me plito lo merit.

So alòrs Mr Speaker, mon swete ki ozordi swar ler nou fini nou al se nou, nou tou nou kapab fer en legzanmen konsyans pou vwar si vreman, si vreman nou ti annan sa bann adikt aker, e annan nou pei aker pou *deal* avek sa sityasyon.

Mr Speaker, sa ki mon pou al dir aprezan i napa nanryen pou vreman fer avek sa Mosyon li menm, me senpleman pou remersye nou bann siporter *United Seychelles* ki ti vin ranpli nou *Mini Stadium* Dimans. Mersi Mr Speaker.

(APPLAUSE)

MR DEPUTY SPEAKER

Le moman in arive aprezan pou nou pran en vot lo Mosyon ki nou pe debat lo la depi egzaktaman 11er 03 bomaten, Mosyon i lir koumsa.

Lasanble Nasyonal Sesel, i demann Gouvernman pou met an plas en program reabilitasyon konpreansiv, e ede tir nou lafors travayer zenn dan adiksyon, e sa i ava soulaz lafanmir Seselwa.

Mon a demann tou bann Manm ki an faver pou endike silvouple? Mersi. Mon ava demann tou bann Manm ki kont pou endike silvouple?

(APPLAUSE)

MR DEPUTY SPEAKER

Mersi Madanm Clerk, rezilta vot lo Mosyon ki mon fek lir, i annan 7 Manm ki'n vot an faver, 22 Manm in vot kont, okenn Manm pa'n *abstain*. Donk sa vot pa'n pase.

Mosyon pa'n ganny aprouve par Lasanble. nou pe apros lafen nou travay pou ozordi, e sa semenn nou pou rezwenn Mardi prosen, me avan nou disperse rantre dan lakour, mon ti a zis kontan zwenn Dirizan Zafer Gouvernman ki'n pran laparol lo komansman son entervansyon lo Mosyon Onorab Uranie.

Pou prezant kondoleans lo lapar Lasanble Nasyonal koman enn Lenstitisyon Nasyonal, pour lafanmir ansyen Minis Jérémie Bonnelame, Mr Bonnelame, in en personnalite enportan dan Sesel, dan public service, dan politik Sesel in annan en long karyer, in Sekreter Prensipal dan Gouvernman depi 79 ziska 86.

In dan diferan Minister. IN osi annan *portfolio* Ministeryel diferan Minister

depi 86 ziska 93, apre an 97 ziska 2005, e parmi bann responsabilite ki'n annan in Minis pou Men Power, Transpor, Lagrikiltir, avek Lapes, e son dernyen pos Ministeryel ti *Foreign Affairs*.

In osi Sekreter Zeneral Komisyon Losean Endyen ant 93 a 97, e reprezantan permanan Sesel kot Nasyon-z-Ini ant 2005 a 2007, e in osi *Chairperson* CAA. Donk in en personnalite enportan ki koman politisyen a en moman nou'n bezwen annan enteraksyon *some sort* avek li.

E lo lapar Lasanble mon ava osi profite pou prezant kondoleans pour lafanmir Onorab Lemiel, ki mon aprann i annan en pros dan son fanmir ki'n mor, e osi Dirizan Lopoizisyon, pou en lanmor ki'n arive dan lafanmir son madanm, e koman mon annan laparol in annan de lanmor osi dan mon distrik yer swar, mon prezant mon kondoleans pour bann zanan madanm Jorenda, e osi lafanmir Mothe, mon prezant mon kondoleans.

Donk mersi pou zot partisipasyon pou sa semenn, nou ava *adjourn* la, e nou pou re pran travay Mardi 9er bomaten.

(ADJOURNMENT)

